

湛然集

夫文章天下之公共言賦者自以與
賈馬爭麗則言詩者自以與李
光焰逞辭藻者不讓蘇黃特歌詞者
輒輕吳蔡以至氣衝雲霄而莫肯相
下及其較量長短探賸妍醜得其全
者鮮矣厭人望者鮮矣
中書湛然性稟英明有天然之才或
吟哦數句或揮掃百張皆信手拈來



非積習而成之蓋出于胸中之穎悟
流于筆端之敏捷味此言之語之其
溫雅平淡文以潤金石其飄逸雄淡
又以薄雲天如寶鑑無塵寒冰絕翳
其照物也瑩然向之所言賈馬麗則
之賦李杜光焰之詩薛藻蘇黃歌詞
吳蔡兼而有之可謂得其全矣厭人
望矣

外省官府得

居士文集古律詩雜文五百餘首分
為九卷恐珠沉於海玉隱於山而輝
彩未著特命良工板行于世使四方
士大夫如披雲覩日快願見之心嗚
呼言者心聲也
中書之言自詠物之外多以
國事歸美為章句雖稷契之忠臯陶

之嘉禾易過此癸巳歲十二月望日
平水冰巖老人王鄰序

乾坤之運否之則塞泰之則通日月
之光蒙之則晦廓之則明聖人之道
鬱之則滯推之則行化而裁之謂之
教神而明之存乎人天之未喪斯文
陰有所主宰亦有所托付數不終隱
待其人而益弘况乎啓端發源於新
造之初枝傾拄邪于積亂之後以任
當世之重以行衆人之難必有命世

大賢超人異行舉歷代非常之事卒
前哲未成之志與時標準卓然為吾
道之揭夫道之不明久矣去古而今
情其性典謨遠而淳風衰雅頌息
而淫辭作以大學中庸為虛位以致
知格物為迂論聖門閉而不開正路
梗而莫辟加之兵革以來百餘年間
宇宙之內昏々默々如夜之未晝夢

之未寤醉之未醒病之未藥伏陰未
覩于太陽寒谷未熙于春律黍苗之
渴望未蘇黔首之倒懸未解夫欲濟
塗炭而域仁壽滌瑕穢而鏡澄清療
國脉之膏肓細天維之罅漏草莽萬
有權輿百度典禮樂于板蕩之際拯
詩書於煨燼之餘黼黻皇猷經緯政
體變干戈而俎豆易荒服而衣冠斷

雕反撲鑄頑成仁扇美化以風六合
沛膏澤以雨群生教績將絕之時功
畫無形之世非天下之至神其孰能
與於此哉惟我

中書湛然居士天姿英挺上智誠明
著龜其識鈞鼎其器聳四方之具瞻
遇千載之嘉會作
朝廷之翰維

社稷之楨牢籠區夏宰制山川提封
不牧之邦郡縣不毛之地正璣衡而
泰階平明曆數而靈符定開元建極
盡彌綸之術驟帝馳王入酬酢之計
以唐虞

吾君為遠圖以成康吾民為己任涵
養于事業形容于文章得之心不受
一塵應之手自能三昧游戲妙場掀

揭理窟運天地之橐籥奪造化之機
緘論性則窮其深源談道則索其隱
旨以聖經為根本故其文體用而精
微以史氏為枝葉故其文氣焰而宏
麗盤詰訓誓其格言詠歌比興其奧
義雖出師征伐之間猶銳意經濟之
學觀其投戈講藝橫槩賦詩詞鋒挫
萬物筆下無點俗揮灑如龍蛇之肆

波瀾如江海之放其力雄豪足以排
山嶽其輝絢爛足以燦星斗斡旋之
勢雷動颯舉溫純之音金聲玉振片
言隻字冥合玄機奇變異態靡有定
跡曩乎出于見聞之外鏗錡炳耀盪
人之耳目所謂造物有私默傳真宰
胸中別是一天爾蓋生知所稟非學
而能如庖丁之解牛游刃而餘地公

輸之制木運斤而成風是皆造其真境至於自然而然公之于文亦得此不傳之妙若夫湛然之稱不可以形尋不可以言詰其處之也厚其資之也深靜于內為善淵演于外為道派即其性而見其文與元氣俱粹然一出于劉正觀夫所稱其人可知矣然則作之者創于

始亦在乎述之者成其終適有中省都事宗仲亨最為門下之舊收錄公之餘藁纖悉無遺今又增補雜文誠好事之君子舉其全帙付之於

門下士高冲霄李邦瑞協力前修作新此本以示學者可謂兼善之用心省丞相胡公善

君之文揄揚溢美勒成為書中有或

悞者更加釐正命工刊行于世益廣其傳真得仁人之雅意

省寮王子卿李君實許進之王君玉薛正之皆欣然響應共贊成之

二公承宗公之志畢其能事同

諸君累求為序僕以兵塵中來舊學

荒廢不敢應命蓋

公之心術至曠不能盡探之於文

公之文章高致不能具陳之於序雖其文皆

公之寓言筌蹄而忘象是亦

勲業之餘蘊

公如不言則人將何述焉嘗謂雲漢為章天之文言辭可法人之文故觀乎天文以察時變觀乎人文以化成天下文之為用大矣哉今

公之為言非徒示虛文而已實救世行道之具所以柱石名教綱紀彞倫鼓舞士風甄陶人物豈惟立當代之典章端可為將來之軌範於戲大禹不治水吾民憂其魚孔子不作經王道幾乎熄夫以文德開通濟物密藏諸用扶持聖道之久弊幽而復顯見天意之所屬為時求定而能樹治本

遏亂源活生靈福奕世其功德無慙于先聖斯文之不墜皆公之力焉是言也非獨予之所言迺天下之公言也歲次癸巳十有二月初吉襄山孟攀鱗序

湛然居士文集卷之一



和黃華老人題猷陵吳氏成趣園詩

和平陽王仲祥韻

和李世榮韻

和李世榮見寄

和李世榮韻

再用其韻

又索六經

和移刺繼先韻三首

和薛伯通韻

鹿尾

過金山用人韻

過雲中贈別李尚書

和裴子法韻

和許昌張彥升見寄

和南質張學士敏之見贈七首

和張敏之鳴鳳曲韻

和孟駕之韻

和陳秀玉綿梨詩韻

和冀先生韻

和黃華老人題猷陵吳氏成趣園詩

雪溪詞翰輝星斗紙蠹塵蒙詩一首湛然揮墨試續貂
囁嚅使人難出口丁年彭澤解官去遨遊三徑真三友
悠然把菊見南山暢飲東籬醉重九猷陵吳氏治荒園
成趣為名良可取養高不肯事王侯閒卧林泉了衰朽
今年

扈從過秦川可憐尚有蕭條柳歸計甘輸吳子先鹿詞
已後黃華手知音誰聽斷弦琴臨風痛想紗巾酒嗟乎
世路聲利人不知曾憶淵明否

和平陽王仲祥韻

一聖揚天兵萬國皆來臣治道尚玄默政簡民風純
明、我嗣君寬詔出絲綸洪恩浹四海聖訓宜書紳逆
取乃順守

皇威輔深仁貪饕致天罰長吏永良循河表背盟約羽
檄飛邊塵

聖駕親徂征將安億兆人湛然陪

扈從書劍猶隨身翠華次平水草木咸生春冰岩上新
句文質能彬彬、冰雪相照映珠玉如橫陳詩筆君獨步
唐都一逸民

聖政固二三裁物惟平均綜名必核寔求儒務求真經

術勿踈廢筆硯常可親竚待寰宇清園丘祀

天神選舉再開闢仲祥當超倫一旦騰達時獻策宜詵

詵

和李世榮韻

聖主題華旦熊羆百萬強兵行從紀律敵潰自奔忙百

谷朝滄海群陰畏太陽黎民歡仰德萬國喜觀光堯舜

規模遠蕭曹籌策長巍然周禮樂盛矣漢文章神武威

蕪德徽猷柔濟到自甘頭戴白誤受詔批黃我道將興

啟吾儕有激昂厚頰懸相印否德泰朝緹佐

主難及聖為臣每願良

翠華來北闕黃鉞討南疆明德傳雙葉寬仁洽萬方九
服無不軌四海願來王兵革雖開創詩書何可忘洪恩
溥曉露嚴令肅秋霜符應千齡運功垂萬世昌綿延
國祚燁々受天祥多士咸登用群生無敗戕此行將告
老松菊未全荒

和李世榮見寄

雲橫北海西駟騎來天際梅軒真可人新詩遠相惠其
聲若良金其臭如芳蕙文艷理無華詞雄言不侈筆力
似黃山驚浪雲奔勢犀象牙角新蠶蜂鎰尾細遙想醉
嚼盃梅塢清陰翳閑散玉麒麟可得羈而係吾子卧東
山誰治今之世好陳十漸書毋用六奇計萬里入
龍庭何須嘆迢遞時方涉大川舟楫須君濟

和李世榮韻

多謝梅軒不惜春聲詩來寄格清新詞源莫測波千頃
筆力能扛鼎萬鈞憂國心情常悄悄閑居容止自申申
誰知板蕩中魚後蕭洒河東有若人

再用其韻

梅軒相別又三春別後文章與日新不忿散財霑造化
好將幽隱入陶鈞我遊北海年垂老君卧南陽志未伸
遙想冰魂政無恙一枝迴施儼頭人

又索六經

我愛平陽李世榮一番書史再鐫銘欲令吾子窮三傳
故向君家乞六經簡冊燦然新制度文章宛爾舊儀刑
莫教幼稚空相憶日々求書到鯉庭

和移刺繼先韻三首

澤民我愧無術略且着詩鴻慰離索詩書滿載升金山
絃歌不輟踰松漠世上元無真是非安知今是而非昨
連城美玉涅不緇百鍊真金光愈燦已悟真如匪去來
自然胸次絕憂樂斷夢還同世事空浮雲恰似人情薄
尚記吾山舊隱居松風蕭瑟松花落枕流漱石輕軒車

吟煙嘯月甘藜藿春山寂々春溪深蕭條庭戶堪羅雀
而今不得安踈慵自笑條籥因鵬鸚勉力
龍庭上萬言男兒志不忘溝壑

其二

當年不肯讀三略獨抱遺經伴閑索流行坎止不尤人
自甘萬里涉窮漠富貴榮華能幾時生死都來如夢昨
千年興廢漚浮沉百歲光陰電飛燂常笑梁鴻歌五噫
竊學榮啟彈三樂未能仁義戢干戈勉將敦厚懲澆薄
近有人從故隱來黃花無限開籬落問渠林肉與丘糟
奚如飯麥而羹藿又聞麋鹿滿姑蘇阿瞞不復遊銅雀

塗中曳尾希莊龜江夏沉舟悲禰鴉吾山佳處歸休乎
鹿逸平林魚縱壑

其三

祖道門庭元簡略見孫草履添芒索擬心鷄子過新羅
起念白雲橫大漠迥殊四句有無中元非三際來今昨
大海纖塵一點飛洪爐片雪寒光燦寧論業障本來空
半偈徒誇寂滅樂細切清風非異事更將明月判來薄
玲瓏四面亦無門充塞十方絕壁落羅列珍羞渠不食
痴人猶自貪藜藿祇圖龍領摘明珠誰知虎口存活雀
坐脫猶迷一色邊崎嶇鳥道一作去路橫秋鴉可笑人間荆

棘林死者填溝空塞壑

和薛伯通韻

滴々秋光溢遠山穹廬寥落酒瓶乾一作塞天空詩章
平淡思居易禪理縱橫憶道安不忿西風霜葉脫難禁
秋雨菊花殘廬山舊隱天涯遠夢裡思歸夢亦難

鹿尾

銜輿秋獮獮南岡鹿尾分甘

賜尚方濃色殷々紅玉髓微香馥々紫瓊漿韭花酷辣
同葱薤芥屑差辛類桂薑何似檀根蘸濃液邀將詩客

大家嘗一作流匙滑

過金山用人韻

雪壓山峰八月寒
羊腸樵路曲盤盤
千崑競秀清人思
萬壑爭流壯我觀
山腹雲開嵐色潤
松巔風起雨聲乾
光風滿貯詩囊去
一度思山一度看

過雲中贈別李尚書

誰識雲中李
謫仙詩如文錦酒如川
十畝良園君有趣
一塵薄土我無緣
舊恨常來春夢裡
新吟不到客愁邊
明朝分手天涯去
他日相逢又幾年

和裴子法韻

頃觀子法跋白蓮社圖
斥淵明攻乎異端

吾子不所惑
學主張名教真韓孟之儔亞也
昔巢由避天下而遠遁堯舜受天下而不
辭以致澤施於萬世名垂於無窮是知潔
已治天下各有所安耳夫清虛玄默樂天
真而自適者也焦勞憂勤濟蒼生為已任
者也二道相反甚於冰炭使堯舜巢由易
地則皆然後之出亂臣賊子窺伺神器孤
媚孤兒寡婦扼其喉以取天下者聞巢由
之風亦少知媿矣然則巢由之功豈可少
哉弃享天下之大樂而且希物外之虛名

者豈人情也耶文中子有言虛玄起而晉
室亾斯豈莊老之罪歟蓋用之不得其宜
也以虛玄之道治天下其猶祁寒御單葛
大夏服重裘自底斃亾豈裘葛之罪哉昔
晉武一統之始不為後世之遠謀何曾已識
之既而禍難繼作骨肉相殘屠戮忠良進
用諛佞雖元凱復生亦不能善其後矣大
厦將頽非一木所能支獨淵明何能救其
弊哉適丁天地不交萬物不通君子道消
小人道長之時淵明見机而作掛印綬而

歸結社同志安林泉之樂較之躁進苟容於
小人之側者何啻九牛一毛耶以淵明之才德假
使生于堯舜湯武之世又安知不與臯夔伊周
並驅爭先哉宣尼有云用之則行舍之則藏又
云進退存亾不失其正者其惟聖人乎斯亦名
教之內昭々可考者也何責淵明之深也予嘗謂
否則卷而懷之以簡易之道治一心達則擴
而克之以仁義之道澤四海寔古今之通誼
也因用子法遊姑射元韻以見意云

達摩一派未西來無限勞生眼未開六朝繁盛已矣耳

兩晉風流安在哉自笑中書老僕射引韻借用此字事佛竊做
王安石公案翻騰舊葛藤林泉准備閑踪跡用之勲業
垂千秋發揚孔孟誰為儔舍之獨善樂真覺賦詩舒嘯
臨清流豈止淵明慕松菊晉室高賢十八九君子道消
小人用貞夫遠弃利名酒蘇黃冠世能文詞裴張二相
名當時祖道禪林恣遊戲堯風舜德甘嘔吹達人不為
造物役打破東西與南北毛吞巨海也尋常出沒縱橫
透空色真如頗與犧易同不動確乎無吉凶湛然信筆
書癡語臨風遠寄綠野翁贈君一句直截處祇要教君
能養素但能死生榮辱哀樂不能羈存亡進退盡是無

生路

和許昌張彥升見寄

真人休運應千載生知神武威中邦杜絕奇技賤異物
連城玉斗曾親撞兵出潼關渡天塹

翠華雜映騶虞幢生民鼓舞嘆奚後壺漿葷食轅門

降偏師一鼓汴梁下邏騎飲馬揚子江良臣自有魏鄭

輩死諫安用干與逢少微昨夜照平水清河國士真無

雙壯歲遊學力稽古孜孜繼晷焚蘭釭新詩寄我有深

意再三舒卷臨幽憲安得先生贊王室委倚奚憂庶

政厖堪笑紛々匹夫勇徒誇巨鼎千鈞扛何日安車蒲

輪 詔公入

北闕蒲萄佳醞爛飲玻璃缸西人蒲萄釀皆貯以玻璃瓶

和南質張學士敏之見贈七首

桃源劉鳳棲蕭鐫冰斲玉哦通宵珠璣錯落照蘭室
龍蛇偃蹇蟠霜綃和我新詩使予起却得瓊瑰酬木李邊
城十載絕知音琴斷七絃鶴亦死而今得識君姿容胸
中鬱結然空詩壇君可據上位筆力我甘居下夙筆
陣文場寬且綽馳騁看君能矍鑠學海波瀾千頃波厭
飫經書爛該博幾時把手瀟湘邊生涯自有壺中天鳴
榔一笑舟浮蓮滄波萬里凝蒼煙

其二

漏沉、竹蕭、蒲團禪定坐終宵古廟香爐無氣息一
條白練如瓊綃性海澄、波不起死似冰壺沉玉李庸
人泥教不知歸七竅鑿開混沌死雖云至道絕音容不
離幻有成真空百尺竿頭更移步普天匝地生清風大
用全提自寬綽禪將交鋒何矍鑠醒時呼起夢中人徧
濟含生其利博本無內外與中邊踏破威音劫外天汗
泥深處種青蓮昇平世界沉烽煙

其三

雨蕭、風蕭、對床談道徹清宵欲画太虛無面目慎

無落筆汚冰絹人間平地風波起反笑於陵噉糟李富
貴榮華都幾時迷者孰能死前死湏彌芥子云相容神
通妙用不空々劫火洞然渠不壞紙鳶能禦毗藍風龍
象騰驥何綽々迴視駑駘空矍鑠悟時一語透塵沙安
用才學恃宏博維摩方丈傍無邊箇中無礙散花天迴
途穩々步雙蓮得玄鳥道橫晴煙

其四

院深々籟蕭々伽陀舒卷度蘭宵若解荷心繫珠露便
能天外裁雲絹大覺空生一漚起悟斯獨有屏山李屏
居士李之純嘗作楞
嚴別解為禪客所重穿透楞嚴第一機方信庵中人不

死箇裡家風針不容夢回六趣大千空道人受用本無
盡明月薄削細切風香象因從威綽々獨跳狂獐空矍
鑠悲心起處了無私濟度塵沙思廣博不涉中流離兩
邊下無大地上無天無人無佛臺無蓮萋々碧草生芳
煙

其五

雲飄々水蕭々一燈香火過閑宵神清半夜不成夢書
帷風細揚微絹運應昌期

王者起自愧文章翰杜李竊同居易了無生誰羨葛洪
學不死一榻蒲團膝足容條然文室塞虛空翻騰密藏

明佛日淘汰機緣振祖風丹鳳冲霄何綽々失曉歎即
徒矍鑠人間取捨本千差世路窮通如六博幽人嘯咏
水雲邊劫外光風自一天閑來石上栽紅蓮水無波浪
火無煙

其六

風蕭々雨蕭々蕭蕭風雨悲涼宵籬菊殘英清黃玉林
風脫葉飄紅綃幽人輾轉凌晨起邂逅門前逢短李殷
衰聞道有三仁欲說九疇君不死穹廬相語為從容懸
河雄辨能談空風神蕭散野鶴立照人玉樹臨秋風落
筆新詩一揮綽不似武人誇矍鑠銀鈎筆力掩二王照

夜連城肯輕博他年相約秋山邊秋江一派連秋天閑
聽菱女歌採蓮輕舟一醉眠秋煙

其七

衣龍鍾鬢飄蕭穹廬停燭坐寒宵翰林遣介贈佳句蠶
芒鳥跡書生綃既倒狂瀾再扶起昔有謫仙元姓李今
日

龍庭忽見君誰道當年太白死文章氣象難形容騰龍
翥鳳遊秋空筆力萬鈞神鬼泣雷轟電掣驅疾風餘裕
喜君能綽々鼓舞為君予矍鑠解讀竒字笑揚雄識厭
張華能物博與君握手天山邊舉觴相囑望青天他年

雅社結白蓮林泉杖屨衝雲煙

和張敏之鳴鳳曲韻

寫蛟螭咳珠璣英姿元棟一作碧梧棲彬一作文彩自光
輝有材希晉用失志欲劉依薦君誰肯惜噓吹洪才大
筆識君稀鯤遊翻海震鵬舉翥天飛問渠蟾窟攀仙桂
何似冥山破鐵圍人間強認假生死世上本無真是非
濃歆帶春夢晚景嘆殘暉夢斷日沉真可笑輸却禪人
向上機遮眼開經卷蒙頭壞衲衣息念融凡聖無心應
順違震風威橫擔柳標萬山歸

和孟駕之韻

平陽聞有鄒人孫封書上我僅萬言討論墳典造極致
商確古今窮深源文章高出蘇黃輩英雄不效秦儀志
志圖仁義濟元一作冀北無雙瑚璉器淪落塵埃德不孤
梅軒結友天一隅我惜鹽車困騏驥騰驤未得踏亨塗
甕牖繩樞甘儉薄詩腸雷轉充糟粕他日佳聲聞
九天富貴之來不得却丁年黃卷樂平生鄉閭一諾千
金輕滄浪清處閑濯纓才名高價如連城筆下有神詩
有眼五車書史窮編簡一舉高登甲乙科曾對閭闔持
手版

天兵一鼓下睢陽旌旗整一作陣堂一作玉石俱焚君子隱

北度來依

日月光徒步黃塵千里遠猶抱遺經究微婉天產昂藏
一丈夫三十未遇非為晚聞望卓冠儒林叢燦然星宿
羅心胸馳驟大方孰並駕絕塵奔逸其猶龍君似銀鑄
玉可切銀鑄不是尋常鐵利穎神鋒人未知寶匣空閑
三尺雪何時搜出螫龍鞭一聲霹靂轟青天歲旱頑君
作霖兩拔茅進用其茹連
天子明堂求國棟鵬飛全藉天風送鳳池波暖百花新
詠游不作江湖夢

和陳秀玉繇梨詩韻

石門九月西風高

梨出于石門之北遵化縣

繇梨萬樹金垂梢清溪

秀王道號也

千里携贈我藤筐初發香盈色謫仙風度清溪

亞春風曾飲梨花下不用紅粧唱採蓮醉望青天歌二
雅我有斗酒清且醇同君薦此鵝黃新初見分香剖金
郊更看削玉飛霜鱗縹葉紫條何足語夜光安可同魚
目文園塵渴政難禁咀嚼冰雪削香玉

和冀先生韻

東垣士大夫以

興王聖德詩見寄用酬雅意

運出三爻兌

以太一推之而得

龍飛九五乾要荒歸化育豪哲入陶甄有幸恩涵海無私德應

天偏師收百越一鼓下三川

天子能身正元戎不自賢

重光道同軌

累聖德相聯策決九重內功歸萬乘推群雄哀稽顙多
士喜磨肩輔弼規左右丞疑贊後前開夷逾漢武平叛
跨周宣冠帶通窮域車書過古堦覽機雲母障受諫翠
華駟款塞諸蠻洞來朝百濟舡降王趨陛闕強虜列氓
編淨掃妖氛變潛消烽火烟詞臣遊館閣幽隱起林泉

堯舜文明盛商姬禮樂全九成合古奏二雅詠新篇世
卜千年世年斯億萬年

宗親成蒂固

國祚等瓜綿

聖政輿人頌

天威萬古傳勉旃封禪事不用策安邊

湛然居士文集卷之一終

湛然居士文集卷之二

和百拙禪師韻

題平陽李君寔吟醉軒

從聖安澄老借書

題西庵所藏佛牙二首

和移刺繼先韻二首

過陰山和人韻

再用前韻

復用前韻唱玄

用前韻送王君玉西征一首

用前韻感事二首

過濟源和香山居士韻

和裴子法見寄

用李德恒韻寄景賢

過天德和王輔之四首

槐安席上和張梅韻

思親有感二首

思友人

贈李郡王筆

寄雲中卧佛寺照老

寄平陽淨名院澗老

贈雲川張道人

贊李俊英所藏觀音像

題西菴煇一堂

和景賢還書韻二首

外道李浩求煇再用韻示景賢

外道李浩和景賢罪字韻予再和呈景賢

和楊居敬韻二首

過天寧寺用彥老韻二首

過天山周敬之席上和久韻二首

和人韻

丁亥過沙井和移刺子春韻二首

再過晉陽獨五臺開化二老不遠迎

過清源謝汾水禪師見訪

王屋道中

和百拙禪師

十方世界是全身氣宇如王絕比倫與奪機中明主客
正偏位裡辨君臣眠雲卧月辭三島鼓腹謳歌預四民
了了時誰可曉閑人原不是閑人

題平陽李君寔吟醉軒

古晉君寔世所知幽軒佳號兩相宜長鯨海量嫌甜酒
彩筆天才厭小詩七步賦成文燦爛千鍾不惜錦淋漓

一作千
鍾飲徹

何當杖屨遊平水得預君家吟醉時

從聖安澄老借書

湛然寤語寄西堂此箇因緣果異常陽老十門剗結案
欽公五派強分贓劔逢劔客湏拈出詩遇詩人何必藏
居士病多諸藥性聖安得效不傳方

題西菴所藏佛牙二首

殷勤敬禮辟支牙綠在西庵居士家午夜飛光驚曉月
六時騰焰燦朝霞一番頂帶因初結七轉生天果不差

庸士執方猶未信防風安得骨專車

又

旃檀奩裡貯靈牙來自中天尊者家瑩色冷奪秋夜月
真光明射晚晴霞本同舍利原無別疑是金到事有差
猶憶廣長舌左右咀嚼風雨震雷車

和移刺繼先韻二首

舊山盟約已愆期一夢十年盡覺非瀚海路難人去少
天山雪重雁飛稀漸驚白髮寧辭老未濟蒼生曷敢歸
去國遲々情幾許倚樓空望白雲飛

又

不事王侯懶屬文時危何處覓元勳他年收拾琴書去
笑傲林泉我與君

過陰山和人韻

陰山千里橫東西秋聲浩々鳴秋溪猿獠鴻鵠不能過
天兵百萬馳霜蹄萬頃松風落松子鬱々蒼々映流水
天丁何事誇神威天台羅浮移到此雲霞掩翳山重々
峰峦突兀何雄々古來天險阻西域人煙不與中原通
細路索紆斜復直山角摩天不盈尺溪風蕭々溪水寒
花落空山人影寂四十八橋橫雁行膝遊竒觀真非常
臨高俯視千萬仞令人凜凜生恐惶百里鏡湖山頂上

旦暮雲煙浮氣象山南山北多幽絕幾派飛泉練千丈
大河西注波無窮千溪萬壑皆會同君成綺語壯奇誕
造物束手神無功山高四更緣吐月八月山峰半埋雪
遙思山外屯邊兵西風冷徹征衣鐵

其二

羸馬陰山道悠然遠思寥青巒雲靄々黃葉雨蕭々未
可行周禮誰能和舜韶我嗟浮海粟何礙八風飄

其三

八月陰山雪滿沙清光凝目眩生花挿天絕壁噴晴月
擎海層崖吸翠霞松檜叢中疏畎畝藤蘿溪處有人家

橫空千里雄西域江左名山不足誇

其四

陰山奇勝詎能名新送新詩得々成萬疊峰巒擎海立
千層松檜接雲平三年沙塞吟魂遯一夜擅穹客夢清
遙想長安舊知友能無知我此時情

再用前韻

河源之邊鳥鼠西陰山千里號千溪倚雲天險不易遇
驕驍踞蹙追風蹄簽記長安五陵子馬似遊龍車如水
天王赫怒山無神一夜雄師飛過此盤雲細路松成行
出天入井寔異常王尊疾驅九折坂此來一顧應哀惶

崢嶸突出峰峭直山頂連天緣咫尺楓林霜葉聲蕭騷
一雁橫空秋色寂西望月窟九譯重嗟呼自古無英雄
出關未盈十萬里荒陬不得車書通

天兵飲馬西河上欲使西戎獻馴象旌旗蔽空塵漲天
壯士如虹氣千丈秦皇漢武稱兵窮拍手一笑見戲同
壘山陵海匪難事剪斯群醜何無功騷人羞對陰山月
壯歲星々鬢如雪穹廬展轉清不眠霜匣閉殺鍤鋳鐵
復用前韻唱玄

天涯流落後征西寒盟辜負梅花溪昔年學道頗得趣
魚兔入手忘筌蹄殘編斷簡披莊子曰々須當誦秋水
誰知海若無津涯河伯源流止於此人間醬缶紙數重
太玄強草唾楊雄高卧蒿萊傲唐室清風千古獨王通
曲者自曲直者直何必區々較繩尺一筆劃斷閑是非
萬事都忘樂空寂功名半紙字幾行競羨成績書太常
只知牢笑饗葛藜不思臨又心悲惶何如打坐蒲團上
叅透昇平本無象一瓶一鉢更無餘容膝禪庵僅方丈
漫教人笑徹骨窮生涯元與千聖同鳥道雖玄功尚在
不如行取無功功歸來踏破澄潭月大冶洪爐飛片雪
且聽石女鳴巴歌萬里一團無孔鐵

用前韻送王君玉西征二首

湛然送客河中西西域城名也乘興何妨過虎溪清茶佳果

餞行路遠勝濁酒烹馳蹄結交須結真君子君子之交

淡如水一從西域識君侯傾蓋交歡忘彼此當年君卧

東山重守堆黠：元知雄五車書史豈勞力六韜三略

無不通詩咏珠璣無價直青囊更有琴三尺奉

命西來典重兵不得茅齋樂真寂魚麗大陣兵成行

師布置非尋常先生應

詔入西域一軍駭異皆驚惶武皇習戰昆明上欲討昆

明致犀象

吾皇兵過海西邊氣壓炎劉千萬丈先生一展才略窮

百蛮冠帶文軌同威德洋洋震天下大功不宰方為功

隱居自有東山月夙拂松花落香雪退身叅到未生前

方信秤鎚元是鐵

其二

先生應

詔將征西湛然送客涉深溪徘徊一舍未忍去兵車暫

駐天駒蹄猶憶今春送君子桃李無言映流水寒暑推

遷奈老何秋風草律重来此関山險僻重復重西門雪

耻須豪雄定遠奇功正今日車書一混華夷通先生純

德如矢直詎為直尋而枉尺功成莫恋聲利場便好回

頭樂玄寂故山舊隱松千行奇峰恠石元異常前日盟
言猶在耳猿鶴思怨空悲惶我擲直鈎魚不上須信遊
鱗畏龍象冥鴻一舉騰秋空誰羨文章光萬文道兮人
作非天窮區々何必較異同語默行藏在手我退身奚
論無成功安東幸有閭山月萬頃松風萬山雪收拾琴
書歸去來修心須要金 鐵

用前韻感事二首

稱斤甘齋賣京西誰信無人採五溪鵬異衆禽全六翮
麟殊凡獸具五蹄昔年學道宗夫子盈科後進如流水
蟄龍猶未試風雷洋泛蓬飄而至此褊袍甘分百結

重不學亂世姦人雄忘憂樂道志不二守窮待變々則
通歲寒松柏蒼々直摩雲直待高千尺桃李無言蹊自
成此君冷淡人何寂生平耻與噲五行杜門養拙安天
常澤民致

主本予志素願未酬予恐惶否塞未能交下上何日亨
通變々象不圖廊廟為三公安得林泉叅百丈居士身
窮道不窮庸人非異是所同筆頭解作萬言策人皆咲
我勞無功流落遐荒淹歲月羸得飄蕭雙鬢雪謀生太
拙君勿嗤不如嗣宗學鍛鐵

其二

金烏日之東飛西滔滔綠水流長溪流波一去不復返
逐日恨無八駿蹄窮理達生獨孔子嘆夫逝者如斯水
歲不我與其奈何兩鬢星々尚如此曩時鑿破藩垣重
澤民濟世學英雄風雲未會我向往天地大否途難通
霜匣神劍蒼龍直切玉如泥長數尺利器深藏人未知
豐城埋沒神光寂讀書一目下數行金石其心學王常
學術忠義兩無用道之將喪予憂惶有意攀龍不得上
徒勞牙角按犀象唯思仁義濟蒼生豈為珍羞列方丈
簞瓢陋巷甘孤窮鴻鵠安與燕雀同天與之才不與他
反令豎子成其功安得光明依

日月功名未立頭如雪問君此錯若為多使盡二十四
州鐵

過濟源和香山居士韻

覃懷勝遊地濟瀆垂名久忽見樂天吟笑我輸先手麗
詞金玉振老筆風雷走乘興試續貂啟我談天口平湖
湧泉注清涼瑩無垢憑檻瞰漣漪風髯塵抖擻龍孫十
萬竿翳翳濃陰厚沁水濟源東天壇王屋右秀色已可
食何須杜康酒步々總堪詩佳篇如素有賡酬談相對
獨有龍岡叟亭上幾徘徊斜陽西入酉晚年歸意切對
此空沉首何日遂初心營居碧林後翠一作林

和裴子法見寄

人生都幾何半被功名役一旦燕山破西行過千驛顛
沛不違仁先難而後獲鷓鴣捐腐鼠烏鳶其勿嚇

扈從出天山從容遊天石琴書澹相對尚未忘丘索前
歲入閔中戈甲充商號

明詔典蘭省自愧承

深責秦隴成劫灰京索空陳迹長河尚濁流南山自濃
碧把酒酌青天興亡弔今昔長安非衣君壯年學問積
天上玉麒麟英才可珍惜詩魂素月高飲量滄海窄清
談咳珠玉便腹筭經籍服君百韻詩謝子萬言策易道

已變屯屯爻當應草淮陰正虛襟左車宜籌畫須要蓮
峰手乾坤再開關昂藏綠野翁真我龍門客

用李德恒韻寄景賢

牢落十年扈

御營瑤琴忘盡水仙聲酷思詩酒閑中樂見說干戈夢
裡驚林下日緣千古重人間富貴一錢輕此身未退心
先退獨有龍岡識我情

過天德和王輔之四首

天縱

吾君大聖人天兵所指弭煙塵三齊電掃何須鄙六國

雷驅不用秦誅佞未聞曾請劔
劫姦誰肯試埋輪伴食
黃閣空無輔自笑龍鍾一老臣

又

六師嚴

駕渡長河師不啻行誰敢何千里
旌旗翻錦浪一聲金
鼓震寒波殷亾誰道三仁在
康城空傳五子歌唾手要
荒歸一統漢唐鴻業未能過

又

積年叨祿領台司位重才微甚不宜
地上流錢慚晏笑
樽前決勝愧良
過寔聲聞傳人口似直愚忠結

主知三迳荒涼松菊在他時舍此復何之

又

慙老先生本素臣洪才大筆力千鈞
治名不築傳巖板
賈世誰垂渭水綸舟泛五湖希范蠡
腰懸六印笑蘇秦
帝編三絕耽犧易蕭散風神真隱人

槐安席上和張梅韻

甘齋五溪人不採西京高價賣秤斤
君方淪落羞看我
我亦飄零懶問君人遠恐殘眉上黛
愁深不整鬢邊雲
誰憐古戍寒窓下新樣梭成織錦文

思親有感二首

遊子棲遲久不歸積年溫清闕慈闈囊中昆仲親書帖
篋內萱堂手製衣黃天不來愁耿耿白雲空望思依依
欲憑鱗羽傳安信綠水西流鴈北飛

又

伶仃萬里度西陲壯歲星々兩鬢絲白雁來時思北闕
黃花開日憶東籬可憐遊子投營晚正是嬾親倚戶時
異域風光恰如故一銷魂處一篇詩

思友人

落日蕭々萬馬聲東南回首暮雲橫金用蘭友音書絕
玉軫朱絃塵土生十里春風別野店五年秋色到邊城

雲山不礙歸飛夢夜々隨風到玉京

贈李郡王筆

管城送我自燕都流落遐荒萬里餘半扎秋毫裁翡翠
一枝霜竹剪瓊瑤鋒端但可題塵景筆下安能畫太虛
聊復贈君為土物中書休笑不中書

李郡王嘗為西遼執政

寄雲中卧佛寺照老

像教中微祖意沉盧能嫡子起予深看經不怕牛皮透
公見闍藏教故云着眼常聽露柱吟行道樵居卧佛寺活機特
異死禪心憑君摘取空華寔好種人間無影林

寄平陽淨名院潤老

昔年平水便相尋握手臨風話素心刻燭賦成無字句
按徽彈徹沒絃琴風來遠渡晚潮急雨過寒塘秋水深
此樂莫教兒輩覺又成公案滿叢林

贈雲川張道人

雲川道士有詩聲刻篆雕蟲醉未醒素扇自甘贖碧筩
因西人奪筩渠以扇贖之故云玄鶴不肯換黃庭春秋榮悴悲椿木晦
朔生凋笑瑞莫何似擴開真日月區々燭火任焚々

贊李俊英所藏觀音像

白衣大士足威神蓮智興悲詎可陳金色界中垂萬臂
碧蓮花上露全身鎮州鑄就金難似天竺鐫來玉未真

不識觀音真面目燕吟鶯語過殘春

題西菴歸一堂

搏霄元帥築西菴于廳事之隅以舍沙門
建歸一堂置三聖廟貌屏山居士有云卷
波瀾于聖學之域徹藩籬于大方之家其
搏霄之謂乎偶得乱道韻詩錄呈諸士大
夫幸希光和仍請西菴上人書之楹棟間
為他時林下清話張本云

三聖真元本自同隨時應物立宗風道儒表裡明墳典
佛祖權寔透色空曲士寡聞能異議達人觀解相融

長沙賴有蓮峰掌一撥江河盡入東

和景賢還書韻二首

居士今年又出閨琴書真味伴予閑簡成草略初無意
語闕治擇誤犯顏漆水自慚貽口寔龍岡却得破詩慳
衰翁幸乞贖前過一炷清香論八還

其二

淵明幽隱掩柴閨琴已亡絃人亦閑靜倚書窓獨寄傲
笑觀庭樹自怡顏五音格外聲何限百草頭邊法不慳
蠹譜斷絃無用處因風得寄詩還景賢索絃譜故有是句

外道李浩求歸再用韻示景賢

自從一箭透重閨觸處忘緣觸處閑莫問羔裘橫毳衲
從教華髮映蒼顏水聲說法起予甚山色呈譏不我慳
寄客天涯樂如許問渠何必更南還

外道李浩和景賢霏字韻予再和呈景賢

塵緣劃斷已忘机布鼓徒敲和者稀中隱強陪人事過
禪心不與世情違昔年勲業真堪笑舊日家山懶欲歸
我愛此天真境界乾坤一色雪花飛

和楊居敬韻二首

自愧才術草芥微偶然千載遇

明時唯希一統王家義何暇重思晁氏危仁義且圖扶

孔孟縱橫安肯效秦儀行看

堯舜澤天下萬國咸寧庶績熙

詔下龍庭萬國歡野花啼鳥總欣然

熙朝龜卜符千億

聖主龍飛第一年至道變通皆有數浮生富貴本由天
誰人得似楊公子傲世高吟數百篇

過天寧寺用彥老韻二首

十年不得舞衣斑行盡天涯萬里山黃閣伴食空皓首
蒼生未濟漫胡顏

新朝兵革征方急舊隱煙霞尚未還衮々簿書塵滿眼
衰翁奚暇謁松關

其二

今日從征亦偶然天寧遐想思懸々貪榮不得還山去
須信衰翁未若賢

過天山周敬之席上和入韻二首

淪落天涯數十秋區々班筆早年投採薇山下慵拈草
洗耳溪邊懶飲牛振武揚威難射虎忘機絕慮不驚鷗
當年射策承明殿未必輕々輸呂籌

其二

想馬居延酒半醺寂寥寒館變春溫未能鵬翼騰溟海
不得鴻音過雁門千里雲烟青塚暗一天風雪黑山昏
天涯幸遇知音士仔細論文共一樽

和人韻

四海皇天無所歸夢魂常遠故園飛海山不羨學居易
華表苗言笑令威毛落難尋蘇子節囊空猶有老萊衣
靜思二十年間事擾攘紛々盡覺非

丁亥過沙井和移刺子春韻二首

科登甲乙戰文園吾子才名予獨知巢許身心君易樂
蕭曹勲業我難為有恒得見寔無憾知己相逢未忍離

攜手河梁重話舊胡然羞和子卿詩

其二

行藏俯仰且隨時褊袍懷珠人未知燕雀既群難立志
鳳凰不至擬胡為可嘆世態頻更變何奈人生多別離

莫忘天山風雪裡湛然駝背和君詩予昨至沙井乘牛

達行在偶得隔句一聯云牛車馳傳頗異相如
駟馬車駝背吟詩不似竹林七賢画成有是句

再過晉陽獨五臺開化二老不遠迎

高岡登陟馬玄黃落日西風過晉陽道士歡迎捧林巢
儒冠遠逐挈壺漿五臺強健頭如雪開化輕安鬢未霜
誰會二師深密意趙州元不下禪林

湛然集卷之二
過清源謝汾水禪師見訪

汾水禪師箇裡人杖藜尋我過清源半盃紅菓情何厚
一盞清燈話細論山水景中君得意兵戈堆裡我銷魂
他年相約雲深處松竹蕭蕭靜掩門

王屋道中

勝克河中號令齊

神兵入自太行西昏煙鎖天壇暗漠漠雲埋王屋低

風軟却教水泛水

一作永解凍

寒輕還使雪成泥行吟想像

潭懷景多少梅花坼玉溪

湛然居士文集卷之二終

湛然居士文集卷之三

和解天秀韻

用萬松老人韻作詩十首寄鄭景賢

萬松老人真贊

贈萬松老人琴譜詩一首

寄曲陽戒壇會首大師

和王巨川韻

釋奠

和移刺子春見寄

寄移刺國寶

寄鄭景賢一十首

和景賢韻三首

和李世榮韻

和景賢一十首

和王君玉韻

過東勝用先君文獻公韻二首

過夏國新安縣

過青塚用先君文獻公韻

過青塚次賈搏霄韻

再用韻以美搏霄之德

再用韻自嘆行藏

再用韻感古

再用韻唱玄

過雲川和劉正叔韻

過雲中和張伯堅韻

過雲中和張仲先韻

過雲中和王正夫韻

過白登和李振之韻

過天城和靳澤民韻

過武川贈僕散令人

過燕京和陳秀玉韻

還燕京題披雲樓和諸士大夫韻

和威寧珍上人韻

和李德修韻

和解天秀韻

猛士弯弓挽六鈞長驅入汴政施仁前朝運謝山河古
聖世時亨兩露新未遇自甘焚綠綺知音不必惜陽春
朝廷將下搜賢詔莫恋煙霞老此身

用萬松老人韻作十詩寄鄭景賢

羶廬同抵足談道月西沉議論馨香發文章蘊藉深正

便邊民腹不上謫仙襟自得逍遙意何須泊鄧林

其二

豐城三尺劍神氣尚埋沉確論穿楊的生機劈筈深天
真貯便腹浩氣塞征襟佇看澤天下清風冠士林

其三

破舡無滲漏流水不能沉霧銷青山秀花藏古徑深白
雲陪野興晴月洗煩襟絕後重甦息飛花枯木林

隱々三星出依々片月沉鶴飛遼海闊猿嘯楚山深柳
色雲沾袖蘆花雪滿襟普天秋意露一葉墜梧林

其五

玄珠羅帳密寒晶篆烟沉翡翠疎簾隔琉璃古殿深本
來無垢體何必拂塵襟斫却蟾中桂方成般若林

其六

鰲餌不須針聊將玉線沉須彌猶未大渤海豈為誤悟
後牛穿鼻迷時馬有襟弋人何所慕幽鳥在蒿林

其七

箇事不容針迷途自陸沉西天三步遠東海一盃深涼
月盛玄鉢輕雲剪素襟曹溪無一滴波浪沸禪林

其八

流波無放蕩死水暮平沉機盡方鈞隱綸空正釣深赤
心休惜口青眼好開襟悞捉溪中月人々似翰林

其九

夢覺方知錯生平自屈沉滌塵千澗外遺照亂松深柳
帶縫穿屣荷衣綴破襟寂寥選佛味何似宴瓊林

其十

漁家何足好乘興一釣沉路僻蒼苔滑舟橫古渡深小
晴掀弱笠微雨整蓑襟夢斷知何處寒潮沒晚林

萬松老人真贊

昔無盡居士題恒岳廟云聰明厭血食悔

不值元珪茲因恒州四衆敦請萬松老師
師不行且以頂相付之門弟湛然居士再
拜而贊之曰

每恨恒山不逢珪老四衆同緣萬松親到

贈萬松老人琴譜詩一首

萬松索琴并譜予以承華殿春雷及種玉
翁悲風譜贈之

良夜沉々人未眠桐君橫膝叩朱絃千山皓月和煙靜
一曲悲風對譜傳故紙且教遮具眼聲塵何礙汚幽禪
元來底許真消息不在絃邊與指邊

寄曲陽戒壇會首大師

四衆飛書請萬松不消彈指已成功燈籠證據真談辨
露柱承當不耳聾梵音細推無處所戒壇須信塞虛空
無為濟物誰能悉惟有東垣月拂風

和王巨川韻

聖駕徂征率百工貔貅億萬入關中周秦氣焰如雲變
唐漢繁華掃地空灞水尚存官柳綠驪山唯有驛塵紅
天兵一鼓長安克千里威聲震陝東

釋奠

王巨川能於灰燼之餘草創宣聖廟以

已丑二月八日丁酉率諸士大夫釋而奠
之禮也諸儒相賀曰可謂吾道有光矣是
日四衆奉迎釋迦遺像行城歡聲沸々僕
皆預其禮作是詩以見意云

多士雲奔奠上下釋迦遺像亦行城旌幢錯落休迷色
鐘磬鏗鏘豈在聲宣父素心施有政能仁深意契無生
儒流釋子無相諷禮樂因緣盡假名

和移刺子春見寄

四海皇々足俊賢浪陪扶

日上青天且圖約法三章定寧羨浮榮六印懸潤色吾

術惟恐後扶持天下敢為先過情聲聞予深恥可笑虛
名到處傳

其二

生遇干戈我不辰十年甘分作俘臣施仁發政非無據
論道經邦自有人

聖世規模能法古汚俗習染得惟新英雄已入
吾皇彀從此無人更問津

其三

且喜

朝廷先正名林泉隱逸摠公卿羣雄一遇風雲會萬國

咸觀日月明丹鳳固應潛亂世白麟自合出昇平

一作快
遇顯觀

北闕垂溫詔夜半前席進賈生

其四

舉世寥寥識我誰未學弓矢愧由基
衰年有幸彈三樂
盛去無才出六奇
弃物且存

光海量散才獲用

荷天私微臣自忖將何報信筆裁成頌

德詩

其五

邂逅沙城識子初天山風雪醉吟餘
文章光焰君堪羨
節操儀刑我不如
麴蘖鄉中前進士
渠詩云老去惟耽
麴蘖春故有是句
風波堆裡老中書
他年歸去無相弃
同到閭山舊隱居

寄移刺國寶

昔年萍迹旅京華曾到風流國寶家
居士為予常喫素
先生愛客必烹茶
明憲揮塵談禪髓
淨几焚香頂佛牙
回首五年如一夢
中不覺過流沙
公所藏佛
牙甚靈異

寄景賢一十首

敲罔能覓淡中歡
心與孤雲自在閑
琴阮生涯事松菊
詩書活計老丘山
叩絃聲自無中出
得句思從天外還

踏破化工無盡藏，閑人受用亦非悭。

其二

龍岡漆水兩交歡，縱意琴書做老閑。未得一言安海內，已輸三箭定天山。肯容詩思妨心慧，豈使聲塵礙耳還。信手拈來無不是，清風明月有何悭。

其三

人間聚散妄悲歡，何似林泉遯壑閑。十載殘軀遊瀚海，積年歸夢遶閭山。先人舊居也空岩猿鶴招予往，滿駕琴書伴我還。多謝龍岡憐老隱，新詩酬酢路無悭。

其四

絃索詞章且助歡，羨渠臨老得安閑。琴歌愛子彈秋水，詩句服君仰泰山。聲古調淒真可聽，辭雄韻險寔難還。先難後易今方省，居士襟懷本不悭。

其五

宦情觸處不成歡，未得浮生半日閑。薦鷄有書慚北海，澤民無術愧東山。琴書習氣終難忘，品麓荒園怎得還。卜隱龍岡成老伴，肯教詩思筆頭悭。

其六

廣文憐我失清歡，每著琴書伴我閑。痛憶金聲并玉振，酷思流水與高山。詩壇各啻猶深閉，琴債遷延未肯還。

一狀如今都領過龍岡湏破兩重慳

其七

琴書吾子盡幽歡隨分消磨日月閑佳句典刑傳四海
水仙聲韻徹三山每慚木李投君去却得瓊瑤報我還
從此龍岡開廩藏微邊筆下更無慳

其八

五間何事最為歡爭似能偷忙裡閑得遇夜晴湏對月
每逢春盛強登山無錢沽酒和衣典一作和圖利吟詩
倍本還綺語千章琴百曲莫教夙月笑人慳

其九

我與先生久已歡而今皆願老來閑同舟載棹醉觀月
並轡騎驢飽看山綺句綴成連譜換純音彈了着詩還
琴詩此際慵拈出可怨龍岡為紙慳

其十

閑人閑裡竟閑歡未得迴光未是閑叩道一螺斟巨海
叅玄千里望恒山但能透鏃穿三句何必拖泥辨八還
箇事人人皆富有含生休怨釋迦慳

和景賢韻三首

龍岡硬腹盡詩書落筆雲煙我不如一紙安書思塞雁
十年歸興憶鱸魚託身醫隱君謀妙委跡儒冠我計疎

何日相將歸故里翠微深處卜幽居

其二

龍岡走筆和清篇出示珠璣寄湛然字古意新看不足
挑燈寒兩夜無眠

其三

摩換瘡痍正似醫微君孰肯拯時危萬金良策悟
明主厚德深仁四海施

和李堽榮韻

異同誰足據俯仰且隨緣居士難聯句梅軒却解禪無
雲皆皓月何處不青天話到忘言處迨乙夜不眠

和景賢十首

龍岡居士得賢君聞道賢君增所聞節操鷓鴣雖捐鼠餌
夙神野鶴立鷄群只知輔嗣能談易誰識相如善屬文
擬欲贊君言不盡區々微意見詩云

其二

天下奇才鄭使君清名不使堽人聞五車書笥獨窮理
三峽詞源迥出群未得開懷重話舊常思抵足共論文
自從一識龍岡老餘子紛紛不足云

其三

一聖龍飛敢擇君嗟予潦倒尚無聞蒼生未識鴻鵠志

皓首甘遊麋鹿群黃雀已歸奚望報彩禽飛去不能文
龍岡特慰孤窮悶時有新詩報我云

其四

試和新詩寄鄭君無談道不聞治心更索捐中道
養性渾如鞭後群玄語諄非是說真書歷歷不關文
儒生束教嫌虛誕得意忘言孔子云

其五

文章自愧不如君敢以玄言讀所聞有道居塵何異俗
無心入獸不驚群重玄消息無多子半紙功名直幾文
回首死生猶是幻自餘何足更云云

其六 換韻

十年不遇一相知恰識龍岡恨見遲常愛箕山能洗耳
何堪隣舍傲顰眉榮枯貴賤難逃數用舍行藏自有時
心事紛紛無處說援毫閑和景賢詩

其七 感事

萬里西來過月氏初離故國思遲人情慚愧三鬚面
人丑梳粧半額眉田上野夫空嘆鳳澤邊漁父不傷時
龍岡本具英雄眼幾倩東風寄我詩

其八 讀唐史有感

林甫滔天聖不知三郎深恨識卿遲塵中妃子春羅襪

錢上開元指甲眉七夕殿中祈巧夜三秋原上摘瓜時
長天忽見飛來雁垂淚空吟李嶠詩

其九

李楊相繼領台司兵起漁陽禍已遲向昔正憐花解語
而今空憶柳如眉心傷桃李初開夜腸斷梧桐半落時
試問宮中誰第一三郎猶記謫仙詩

其十

往來寒暑暗推移下手修行猶太遲迷後徒勞常捏目
悟來何必更揚眉宗門淘汰宜窮理道眼因緣貴識時
祇為龍岡心猛利湛然剗寫不言詩

又一首

龍岡醫隱本知机薰蕕同盤辨者稀廊廟虛名無意恋
林泉夙願與心違羨君綽々有餘裕笑我皇々無所歸
尚憶當年垂釣處一江煙雨靜霏霏

和王君玉韻

王孫蒙饋飯靈輒未扶輪自笑孤窮客誰憐衰病身黃
沙萬餘里白髮一孀親腸斷山城月徘徊照遠人

過東勝用先君文獻公韻二首

荒城蕭洒枕長河古寺碑文半滅磨青塚路遙人去少
黑山寒重鴈來多正愁曉雪冰生硯不忿西風葉墜柯

偶憶先君舊遊處潛然不奈此情何

其二

依然千里舊山河事改時移隨變磨巢許家風鳥可少
蕭曹勲業未為多可傷陵變須耕海不待暮終已爛柯
翻手榮枯成底事不如歸去入無何

過夏國新安縣

時丁亥九月望也

昔年今日渡松關

西域陰山有松關

車馬崎嶇行路難瀚海潮

噴千浪白

一作千里雪

天山風吼萬林丹氣當霜降十分爽

月比中秋一倍寒回首三秋如一夢中不覺到新安

過青塚用

先君文獻公韻

漢室空成一土丘至今仍未雪前羞

一丘佳入猶自夢

中羞不禁出塞陟沙磧最恨臨軒辭冕旒
幽怨半和青塚

月閑雲常鎖黑河秋滔天墜東流水不盡明妃萬古

愁

過青塚次賈搏霄韻

當年遺恨嘆昭君王貌水膚染塞塵邊塞未安嬪侮虜
朝廷何事拜功臣朝雲雁唳天山外殘日猿悲黑水濱
十里東風青塚道落花猶似漢宮春

其二

延壽丹青本誑君和親猶未斂胡塵穹廬自恨殞戎王

泉壤相逢愧漢臣玉骨已消青塚底香魂猶逸黑河濱
愁雲暗鎖天山路野草閑花也怨春

再用韻以美搏霄之德

去歲雲川始見君澄、胸次淨無塵斗南第一珪璋士
冀北無雙柱石臣公領師職故云萬頃雲松斜谷外千竿水竹
渭河濱他年歸隱重相訪無影林間別有春

再用韻自嘆行藏

箕裘家世忝先君慚愧飄蕭兩鬢塵自古山河歸
聖主從今廊廟弃愚臣常思卧隱雲鄉外肯傲行吟澤
國濱驛使不來人已老江南誰寄一枝春

再用前韻感古

宣尼名教本尊君賊子干常犯蹕塵鹿失羸秦無令主
鼎分炎漢有能臣宋朝南渡尤天水遼室東傾罪海濱
回首興亡都莫問不如沉醉髮頭春

再用韻唱玄

重玄不惜說知君又恐重添眼裡塵臨濟喝中分主客
洞山言下辨君臣持鈴普化搖空裏垂釣華亭沒水濱
勘破這般閑伎倆鐵林花發劫前春

過雲川和劉正叔韻

西域風塵汗漫遊十年辜負舊漁舟曾觀八陣雲奔速

親見三川席捲收煙鎖居延蘇子恨雲埋青塚漢家羞
深思籬下西風醉誰羨班超萬里侯

過雲中和張伯堅韻

一掃氐羌破吐渾群雄悉入

北朝吞自憐西域十年客誰識東丹八葉孫射席將軍
皆建節龍飛

天子未更元我慚才略非良器封禪書成不敢言

過雲中和張仲先韻

致主澤民本不難言輕無用愧偷安十年潦倒功何在
三徑荒涼盟已寒嵩下藏名師傅說林間談道謁豐干

挂冠神武當歸去自有夔龍輔

可汗

過雲中和王正夫韻

白雪陽春寡和音誰人解聽沒絃琴詩書事業真堪笑
刀筆功名未可欽不信西天三步遠烏知東海一杯深
元來佛法無多子何必嵩山謁少陵

過白登和李正之韻

十年淪落困邊城今日龍鍾返帝京運拙不須求富貴
時危何處取功名騰驤誰識孫陽驥俊逸深思支遁鷹
客裡逢君贈佳句知音相見眼偏明

過天城和新澤民韻

西征

扈從過龍庭悞得東州浪播名琴阮因緣真有味詩書
事業拙謀生咄嗟興廢悲三嘆倏忽榮枯夢一驚何日
解官歸舊隱滿園松菊小菴清

過武川贈僕散令人

班姬流落到而今聞道翻身入道林歌扇舞裙忘舊業
藥爐經卷半新吟閑眠白晝三杯醉靜對青松一曲琴
更他年棲隱處逢山樓閣五雲深

過燕京和陳秀玉韻

回首親朋半土丘嗟予十稔浪西遊半生兵革慵開眼
一紙功名暗點頭下士笑予謀計拙至人知我謂心憂
再行不憚風沙惡鶴跡雲蹤任去留

其二

君恩猶未報山丘自笑遐方汗漫遊客過玉關驚白髮
要遊金谷覓蒼頭冷官待罪予為歎陋巷居貧君不憂
猶望道行澤四海敢辭沙漠久淹留

其三

狐死曾聞尚首丘悲予去國十年遊崑崙碧簪日落處
渤海西顧天盡頭君子云正真我恨斯文將喪是吾憂

尚期晚節回

天意隱忍

龍庭且強苗

其四

餘生不得樂林丘猶憶丁年選勝遊
幾帙殘編聊映眼
一張衲被且蒙頭
貌貅已報西門役
柱石猶懷東顧憂
自料荒疎成弃物
菟裘歸計乞封苗

其五

空驚滄海變陵丘
白晝分明夢裡遊
除妄楔邊重出楔
求真頭上更安頭
亨通富貴劉生喜
苦惱悲愁強作憂
研斷葛藤閑伎倆
繫驢橛子不須苗

還燕京題披雲樓和諸士大夫韻

閑上披雲第一重
離々禾黍漢家宮
窓開青瑣招晴色
簾捲銀鈎揖曉風
好夢安排詩句裡
閑愁分付酒杯中
靜思二十年間事
聚散悲歡一夢同

和威寧琮上人韻

十載西遊志已灰
南征又自大梁迴
扶持佛日慚無力
贊翔

皇風愧不才
舊約未能林下去
新詩常寄
日邊來
何時杖屨煙霞裡
一笑伸眉得共陪

和李德修韻

明之聖主萬邦君

神武彫弓挽六鈞時有逸人遊

闕下更無騷客弔江濱衣冠師古乘殷輅曆日隨時建
夏寅厚德深仁施萬古巍然一代典謨新

湛然居士文集卷之三

湛然居士文集卷之四

和呂飛卿韻

再用韻贈連國華

謝飛卿飯

再用韻紀西遊事

再用韻贈搏霄

再用韻謝非熊召飯

再用韻唱玄

再用韻

和搏霄韻代水陸疏文因其韻為十詩

寄賈搏霄乞馬乳

謝馬乳復用韻二首

贈搏霄筆

再用韻寄搏霄二首

再用韻別非熊

愛子金柱索詩

贈賈非熊搏霄一首

和李振之二首

非熊兄弟餞予之燕再用振之韻

和連國華三首

連國華餞予出天山因用韻

還燕和德明韻二首

和橙梅韻

和竹林一禪師韻

西菴上人住夏禁足以詩戲之

送韓浩然用馬朝卿韻

戊子喜雨用馬朝卿韻二首

戊子餞非熊仍以呂望磻溪圖為贈

和宋子玉韻

和李邦瑞韻二首

和邦瑞韻送奉使之江表

和王正之韻

祝忘憂居士壽

蠟梅二首

謝禪師 公寄閭山紫玉

和鄭壽之韻

寄沙井劉子春

和琴士苗蘭韻

和人韻二首

和武川嚴亞之見寄

己丑過鷄鳴山

寄天山周敬之

邦瑞乞訪親因用其韻

和李邦瑞韻

和呂飛卿韻

舊說飛卿詞翰全夙神渾似晉名賢吟詩校子三千里
押韻輸君一着先筆迹查牙森似戟詞源浩汗注如川
好詩好字獨予得准備携將帝里傳

再用韻贈國華

學道宗儒雞兩全湛然深許國華賢儒門已悟如心恕

道藏能窮象帝先似海詞源涵萬水如鯨飲量吸長川
而今一識君侯面始信清名不浪傳

謝飛卿飯

一鞭羸馬渡天山偶到雲川暫解鞍獨守空房方丈穩
更無薄酒一杯殘詩書半蠹絕來客金甌生塵笑冷官
賴有覺非飛卿憐野拙長鬚為我饋盤餐

再用韻紀西遊事

河中西域尋思子城西花木蔽春山爛賞東風縱寶鞍
苗泮晚瓜過臘半藏來秋菓到春殘親嘗芭攬寧論價
自釀蒲萄不納官常嘆不才還有幸滯苗遐域得佳餐

再用韻贈搏霄

以搏霄戒肉罷鷹犬故以是詩美之

凜々風神白玉山罷遊鷹犬逞金鞍瑶琴高掛么絃絕
擗易頻翻斷簡殘息念如僧還有髮忘形見客似無官
伽陀誦罷爐薰冷一鉢疏羹當晚餐

再用韻謝非熊召飭

行盡遐陬萬里山十年飄泊困征鞍春風燕語歸心切
夜月猿啼客夢殘

聖主因時行夏正愚臣嗜數媿春官誰知賢帥開青眼
掃洒西庵名我飡

再用韻唱玄

藤條擊破鐵圍山倒跨白牛不講鞍講疏僧歸經卷亂
坐禪人起佛燈殘為學未必如為道選佛從教勝選官
百事湛然都不念祇知渴飲與飢食

再用韻

雲山疊々復雲山瘦馬蘆鞭矮面鞍瀚海去程千驛遠
揚州歸夢五更殘塵緣淡處應忘去逸興濃時好解官
二頃良田何必覓春山笋蕨亦供食

和搏霄韻代水陸疏文因其韻為十詩

資生無畏濟人深便見能仁六度心塵去捐財矜苦厄
寒林洒飯拔幽沉既臨巨海鈎神物試叩洪鐘伺好音

今日湛然攀舊例珠纓休惜掛祇林

新朝威德感人深渴望雲霓四海心東夏再降烽火喊
西門一戰塞煙塵顯觀頒朔施仁政佇待更元布德音
好放湛然雲水去廟堂英俊政如林

論道西庵愛慕深推誠片片露丹心瑤琴莫換相如引
寶鼎休焚韓壽沉花氣渾如三角串松風全似五絃音
清談終日忘歸思不覺昏鴉噪晚林

五派分流道愈深塵中誰識本來心穿心土椀元無漏
沒底膠舡却不沉山色水光呈妙相鳥啼猿嘯露圓音
雲霞活計無求飽何事狂童作肉林

狂童一作獨夫

前生未了妄緣深薄宦相索負夙心只見淵明能印弄
誰知居士解舟沉窮通榮辱皆真夢毀譽稱訛盡假音
中隱冷官閑况味歸心無日不山林

居士才微學未深靜思寧不媿中心難忘北海千鍾酒
虛負西菴一炷沉綺語做顰蹙險韻瑤琴學步鼓純音
此番公案休拈出祇恐相傳入笑林

新詩效玉起予深獨有搏霄我許心真迹居塵聊俯仰
高名與世任浮沉同成雅會清茶話共賞枯桐白雪音
他日歸休約何處燕山叅謁萬松林

賢帥文章蘊藉深雲川傾蓋便同心掀髯談道藥燈地
抵足論文塞月沉有眼句中君得意無絃琴上我知音
乘舟誤捉波中月莫學當年李翰林

浪迹西遊歲月深臨風誰識湛然心斯文將喪儒風歇
真智難明佛日沉佳茗暫嘗轟雪浪正聲聊作鼓雷音
年來逸興十分切唯備求真入道林

漁磯舊隱荻花深塵世寧忘昔日心兩岸清風單舸穩
滿江明月一鉤沉飢來煮稻無兼味醉後鳴榔笑五音
閑卧煙蓑春夢斷不知潮起沒青林

寄賈搏霄乞馬乳

天馬西來釀玉漿草囊傾處酒微香長沙莫吝西江水

文舉休空北海觴淺白痛思瓊液冷微甘酷愛羨漿涼
茂林要洒塵心渴願得朝朝賜我嘗

謝馬乳復用韻二首

生涯簞食與壺漿空憶朝回衣惹香筆去餘才猶可賦
酒來多病不能觴松窓兩細琴書潤槐館風微枕簟涼
正與文君謀此渴長沙美漣送予嘗

肉食淺容飲酪漿差酸滑膩更甘香草囊旋造逡巡酒
樺器頻傾激灑觴頓解老飢飽滿偏消煩渴變清涼
長沙嚴令君知否只許詩人合得嘗

贈搏霄筆

一札霜毫綴上枝管城家出東涯遼東鋒端有口能
談景紙上無聲解寫詩免向江淹求彩筆莫學班氏弃
毛錐贈君聊助文房用賦就離騷寄我知

再用韻寄搏霄二首

玉立堂中紫桂枝雲川中隱寓天涯風神蕭散能談道
格調清新解作詩鄙論我甘蒙醬予在辨邪論雄才搏霄嘗讀之
君已露囊錐澄胸次人誰識祇有清風明月知

斫倒霜筠節外枝誰言法界有邊涯筌蹄意盡閑周易
脂粉情忘束詁詩去歲生涯猶說劍今年活計更捐錐
威音那畔真消息試問瞿曇也不知

再用韻別非熊

靈木垂芳桂兩枝非熊佳譽動西涯
倦聽琴阮嫌狂客飽看經書厭小詩
成德羨君垂竹帛虛名嗟我類刀錐
會難別易堪惆悵何日重來誰得知

愛子金柱索詩

文獻陰功絕比倫昆蟲草木盡承恩
我為北闕十年客汝是東丹九世孫
致

主澤民宜務本讀書學道好窮源
他時輔翼

英雄主珥筆

承明策萬言

贈賈非熊搏霄

二陸尊賢擅美聲月評難弟亦難兄
西庵揮麈談三界北觀携琴論五行
休道酒仙無太白須知詩伯有飛卿
奇人輻輳君門下占斷西州好士名

和李振之二首

半紙功名未可呈無心何處不安生
十年滄海塵空起百歲黃 夢乍驚
舊筵既荒松菊在丹誠不變鬢髯更
年來漸有昇平望每恨栖雞半夜鳴

酷憶遙山寸碧呈
歸耕何日樂餘生
蠅營得失都無念
狗苟榮枯總若驚
客夢覺來家萬里
聲詩吟罷月三更

溟鵬本有冲天志直待三年再一鳴

非熊兄弟餞予之燕再用振之韻

藝逢知己敢相呈幾夜論文喜氣生
筆陣我甘三舍退詩壇君使四筵驚
公初傾蓋冬將半予擬乘輅歲欲更
特與幽人助行色一聲寒角隔煙鳴

和連國華三首

歲月如流走兔烏求真可惜費功夫
深源到底忘根抵至道元來貴拙愚
真理不空宜具眼太虛無面莫添鬚
直須穩坐長安好切忌途中認画图

安得長繩繫日烏天涯老却舊耕夫
林泉放曠輸君樂沙漠淹留笑我愚
虎戰每驚涉虎尾龍飛不得採龍鬚
文章畢竟成何事富貴元知不可圖

月上南枝啼夜烏悲歌彈鋏嘆征夫
愁邊逐日看周易夢裡隨風謁大愚
縱有征塵遮兩眼却無慚色上三鬚
真人已應千年運佇待河清再出圖

連國華餞予出天山因用韻

十年不得舞衣班一憶江南胆欲寒
黃犬侯來秋自老白雲望斷信何難
軍中得句常橫槊客裡傷心每據鞍
游子未歸情幾許天山風雪正漫漫

還燕和吳德明

紛々去態眩榮華靜裡乾坤本不諱琴阮生涯聊自適
詩書事業更何如但期

聖德澤天下敢惜餘生寄海涯可笑燕然舊遊客倚樓
悲我客程賒

又和橙予梅韻

可笑人心自短長誰知箇事不囊藏化成橙子舌耽味
幻作梅英鼻覺香金卯似真隨變滅冰魂元假却芬芳
唯心識破同根旨何必臨風再舉觴

和竹林一禪師韻

富貴無心羨五侯隨時俯仰浪西遊斷無事業流千古

靜看英雄混九州白鴈縱傳遐域信黃華却負故園秋
蒼生未濟歸何益一見吾山一度羞

西菴上人住夏禁足以詩戲之

觸處無非選佛堂一作都盧只是一禪牀東風何處避春光郡人

無足充千界大地絕塵塞四方舉步踢翻滄海月轉身
踏破白雲鄉快須擊碎閑家具說與西菴笑一場

送韓浩然用馬朝卿韻

開懷樽俎笑談頌未暇論文君已行富貴塗亨渠易致
詩篇韻險我難賡已成頌蓋金蘭友安用沾襟兒女情
淮擬秋深迓歸騎一尊濁酒遠相迎

戊子喜雨用馬朝卿韻二首

酷暑炎正不禁一聲雷震醲輕陰救回南畝十分旱
變作西郊三日霖遍野桑疇青幄密連天麥穞綠雲深
王孫喜雨登樓宴貰酒黃壚解帶金

生死輪迴苦莫禁不如學道惜分陰舡乘沒底聊相渡
雲出無心強作霖不死鄉中靈草異長生劫外紫雲深
茅山道士真堪笑虛費工夫煉五金

戊子餞非熊仍以呂望磻溪圖為贈

昨夜白麻降日邊文章領袖遠朝

天遙思

御座分香賜更想

龍庭命席前白面書生酬夙志黑頭邊帥領新權非熊
應笑非熊老八十猶然釣渭川

和宋子玉韻

勇將謀臣滿玉京吾儕袖手待昇平荆榛至道常嗟我
柱石中原豈捨卿日下有人叨肉食雲中高士振詩鳴
思君興味如梅渴海印子玉道號也那能識此情

和李邦瑞韻二首

隴右奇才冠士林萬言良策起予深澤民致
主傾丹懇邀利治名匪素心我伴簿書無好思君陪風

月有閑吟他年共約林泉下茅屋松窓品正音

謝君千里遠相尋傾蓋交歡氣義深筆硯生涯一作書

又在鉄石肝腸無異志金蘭氣味本同心揮毫解賦登高句緩

軫能彈對竹琴此去鱗鴻知有便臨風無吝寄芳音

和邦瑞韻送奉使之江表

駟騎翩翩出玉京金符一揆照人明莫忘

北闕龍飛志要識南陬鳩舌情布袖來

朝無騎乘錦衣歸去不徒行昇仙橋畔增春色郡守傳

呼接長卿

和王正之韻

洪才碩德兩相宜雅操真堪據鳳池富貴未終隨夢變
功名何在值時危奇辭解吐萬言策敏思能吟七步詩
但倩東風輕着力摩天鵬翼若雲垂

其二

自慚不解告嘉謀十載韜藏僻一隅巨海洪深容弃物
新朝寬厚用愚夫亨時嘉會千年少
聖主雄才萬代無文物規模皆法古佇看
明詔起真儒

其三

皇天輔德本無親樂道奚憂甌滿塵道泰小入當屏斥

時屯君子自經綸浮雲富貴原千變昨夢繁華得幾春
遇不遇兮皆是命吾儕休羨錦衣新

楞嚴經云生死
涅槃都如昨夢

祝忘憂居士壽

酷似燕山竇十郎靈椿初老桂枝芳兩朝厚遇垂十稔
一日清名滿四方玉珮丁東照蘭省斑衣搖曳悅萱堂
他年叅到平常處便是長生不老鄉

蠟梅二首

越嶺仙姿迥異常洞庭春染六銖裳枝橫碧玉天然瘦
蕾破黃金分外香反笑素英渾淡抹却嫌紅艷太濃粧
臨風灑此薔薇露醉墨淋漓寄渺茫

其二

冰姿夢裡慕姚黃滴蠟凝酥別樣粧生妬白紅太濃淡
懶施朱粉自芬芳寒英深染薔薇露冷艷微薰篤耨香
受用清絕恣吟逸惜花一念未全忘

謝禪師 公寄閣山紫玉

方外閑人天一隅目夙寄我紫雲腴起予妙理欺歡伯
滌我枯腸壓酪奴琥珀精神渾彷彿葡萄滋味較錙銖
禪師遠弄桃源路日夕尋山摘此無

和鄭壽之韻

聖主龍飛日月新微才添預股肱臣民財已阜錢如水

驛騎長閑塞不塵威鎮西陲輸定遠宴開東閣慕平津
何時收拾琴書去林下衣冠作舜民

寄沙井劉子春

寄語沙城老故人別來贏得鬢邊塵馬蹄踏破關中月
新句吟空河表春名利相縈予有歎琴書自樂子非貧
何時策杖君家去再試淵明漉酒巾

和琴士苗蘭韻

徒步南來愛陸機公餘邂逅似相期高山韻吼千竒木
流水聲號半夜陂

聖德宛如歌治化南風猶似撫瘡痍曲終聲散無人會

撩我高吟一首詩

和人韻二首

西域諸番古未知來生遠邁禹封畿名山准擬金泥檢
古塞無勞羽檄飛堽樂詎能敵靜樂蓑衣到底勝朝衣
年來痛憶閭山景月照茅亭水一圍

其二

干戈未斂我傷神自恨虛名誤此身否德詎能師百辟
微材安可步三辰箕裘謾嘆青氈舊勲業空驚白髮新
安得變龍立廊廟扶持
堯舜濟斯民

和武川嚴亞之見寄

當年西域未知名四海無人識晉卿
扈從鑿輿三萬里謀謨鳳閣九重城
衣冠異域真予志禮樂中原乃我榮
何日功成歸舊隱五湖煙浪樂餘生

其二

亞之平水久馳名

亞之本絳陽人今寓居武川訓童為生

壯歲題橋慕長

卿厭世德風如偃草驚人詩價比連城
功名未立不為憚仁義能行亦足榮
此理幽微人不識莫言儒道拙謀生

其三

今年又得亞之詩每嘆風雲會遇遲
拙運且淹童子後雄才宜作帝王師
羨君筆下揮千字知子胸中蘊六奇
靜對西風和新句淒然南望動深思

其四

誤忝綸恩斗印懸
乏才羞到

玉墀前劾姦封事
夢猶諍許國忠誠
老益堅

仁政發謔

天北畔捷音來自海西邊
從今率土霑王化禮樂車書共一天

其五

寥落龍沙寄此生情鍾我輩豈無情
參商管鮑賢朋友
南北機雲好弟兄
蓮葉孰香思晚浦
梅花飛雪夢春城
故園日夜歸心切
未濟斯民不敢行

己丑過鷄鳴山

三年四度過鷄鳴
我僕徘徊馬倦登
寂寞柴門空有舍
蕭條山寺靜無僧
殘花濺淚千程別
啼鳥傷心百感生
今古興亡都莫問
穹廬高卧醉騰騰

寄天山周敬之

當年傾蓋識君初
爛飲天山駐使車
秋去安仁空有賦
雁來公瑾又無書
林岫紅葉如人老
籬落黃花亦我疎

為向天涯道岑寂
強吟新句附雙魚

邦瑞乞訪親目用其韻

干戈擾攘戰交侵
一紙安書直萬金
兄子生還愁未解
萱堂仙去恨尤深
涕零倚木西風怨
腸斷聞鈴夜雨淋
養老送終真有憾
號天如割望雲心

和李邦瑞韻

趙老名言本兩忘
庭前空有柏蒼蒼
西江吸盡慵開口
北載添來亦括囊
明月清風何所礙
落花流水不相妨
須知居士元無病
底用千年舊藥方

湛然居士文集卷之四

湛然居士文集卷之五

贈蒲察元帥七首

庚辰西域清明

用益政姚德寬韻

用照禪師韻二首

和薛正之見寄

乞扇

壬午西域河中遊春十首

遊河中西園和王君玉韻四首

河中西園四首

河中春遊有感五首

過閭居河四首

感事四首

壬午元日二首

過沁園有感

用劉正叔韻

西域家人輩釀酒戲書屋壁

西域從王君玉乞茶因其韻七首

和冲霄韻五首

和冲霄十月桃花韻二首

和薛正之韻二首

贈蒲察元帥七首

閒騎白馬思無窮來訪西城綠髮翁
元老規模妙天下錦城風景歷河中
花開把攬美蕖淡酒泛蒲萄琥珀濃
痛飲且圖容易醉欲憑春夢到盧龍

其二

積年飄泊困邊塵閒過西隅謁故人
忙喚賢姬尋器皿更呼遼客奏箏箏
葡萄架底葡萄酒把攬花前把攬仁
酒釀花繁正如許莫教辜負錦城春

其三

主人知我怯金觴特為先生一改堂細切黃橙調蜜煎
重羅白餅糝糖霜幾盤綠橘分金縷一碗青茶點玉香
明日辭君向東去這些風味幾時忘

其四

使君排飭宴南溪不枉從君鳥鼠西春鴈 澆濃鹿尾
臘糟微浸軟駝蹄絲絲魚膾明如玉屑屑鷄生爛似泥
白面書生知此味從今更不嗜黃齏

其五

筵前且盡主人心明燭厭厭飲夜深素袖佳人學漢舞
碧髯官妓撥胡琴輕分茶浪飛香雪旋擘橙盃破軟金

五夜歡心猶未已從教斜月下疎林

其六

主人開宴醉華胥一派絲篁沸九衢黯紫葡萄垂馬乳
輕黃杞攬燦牛酥金波泛蟻斟歡伯雪浪浮花點酪奴
忙裡偷閑誰若此西行萬里亦良圖

其七

閑乘羸馬過蒲華又到西陽太守家瑪瑙瓶中簪亂錦
琉璃鍾裡泛流霞品嘗春色披金橘受用秋香剖木瓜
此日幽歡非易得何妨終老任流沙

庚辰西域清明

清明時節過邊城遠客臨風幾許情野鳥間關能解語
山花爛熳不知名葡萄酒熟愁腸亂瑪瑙盃寒醉眼明
遙想故園今好在梨花深院鷓鴣聲

用益政姚德寬韻

乃祖開元柱石臣雲孫彷彿玉麒麟從來德多輿人口
此日恩霑

聖主春欲草薦書學北海未開東閣媿平津而今且試
調羹手矜看沙堤繼舊塵

用昭禪師韻

銀鈎全似趙周臣詩比黃華格調新道眼點開言外句

禪心說破劫前春山中跛挈無為客林下逍遙自在人
不犯清波垂釣處卧龍隨手出龍津

其二

聖德洋洋雨露零蟲魚草木總歡榮妖氛斂禍
克夙扇外道消聲佛日明

和薛正之見寄

賢臣

聖主正時遭建策

龍庭莫憚勞大壑波深翻巨鯉高空風順遇鴻毛一番
制度新才術百代文章舊雅騷勉力自強宜不息功名

何啻泰山高

乞扇

屈眴圓裁白玉盤幽人自剪素琅玕全勝織女絞綃帕
高出湘妃玳瑁斑座上清風香細細懷中明月淨圓圓
顛祈數柄分居士顛倒陰陽九夏寒

壬午西域河中遊春十首

幽人呼我出東城信馬尋芳莫問程春色未如華藏富
湖光不似道心明土林設饌談玄旨石鼎烹茶唱道情
世路崎嶇太尖險隨高逐下坦然平

其二

三年春色過邊城萍跡東歸未有程細細和風紅杏落
涓涓流水碧湖明花林啜茗添幽興綠野觀耕稱野情
何日要荒同入貢普天鐘鼓樂清平

其三

春鴈樓邊三兩聲東天回首望歸程山青水碧傷心切
李白桃紅照眼明幾樹綠楊搖客恨一川芳草惹羈情
天兵幾日歸東闕萬國歡聲賀太平

其四

河中二月好踏青且莫臨風嘆客程溪畔數枝繁杏淺
牆頭千點小桃明誰知西域逢佳景始信東君不世情

圓沼方池三百所澄々春水一時平

其五

二月河中草木青芳菲次第有期程
花藏徑畔春泉碧雲散林梢晚照明
含笑山桃還似識相親水鳥自忘情
遐方且喜豐年兆萬頃青々麥浪平

其六

異域春郊草又青故園東望遠千程
臨池嫩柳千絲碧倚檻妖桃幾點明
丹杏笑風真有意白雲送雨太無情
歸來不識河中道春水潺々滿路平

其七

四海從來皆弟兄西行誰復嘆行程
既蒙顧蓋心相許得遇知音眼便明
金玉滿堂遠素志雲霞千頃適高情
廟堂自有夔龍在安用微生措治平

其八

寓跡塵埃且樂生垂天六翮歛鵬程
無緣未得風雲會有幸能瞻

日月明出處隨時全道用窮通逐勢嘆
人情憑誰為發豐城劍一掃妖氛四海平

其九

不如歸去樂餘齡百歲光陰有幾程
文史三冬輸曼倩

田園二頃憶淵明賓用冷落絕交分親戚團團說話情
植杖耘耔聊自適笑觀南畝綠雲平

其十

衰翁老矣倦功名繁簡行軍笑李程牛糞 熟石炕煖
蛾連紙破瓦窻明水中漉月消三毒火裡生蓮屏六情
野老不知天子力謳歌鼓腹慶昇平

遊河中西園和王君玉韻四首

萬里東皇不失期園林春老我來遲漫天柳絮將飛日
遍地梨花半謝時異域風光特秀麗幽人佳句自清奇
臨風暢飲題玄語方信無為無不為

其二

清明出郭赴幽期千里江山麗日遲花葉不飛風定後
香塵微斂兩餘時雕鐫冰玉詩尤健揮掃龍蛇字愈奇
好字好詩獨我得不來賡和擬胡為

其三

異域逢君本不期湛然深恨識君遲清詩厭世光千古
逸筆驚人自一時字老本來遵雅淡吟成元不尚新奇
出倫詩筆服君妙笑我區區亦強為

其四

風雲佳遇未能期自是魚龍上釣遲岩穴潛藏難避世

塵囂俯仰且隨時百年富貴真堪嘆半紙功名未足奇
伴我琴書聊自適生涯此外更何為

河中遊西園四首

河中春晚我邀賓詩滿雲牋酒滿巡對景怕看紅日暮
臨池羞照白頭新柳添翠色侵凌草花落餘香着暮人
且着新詩與芳酒西園佳處送殘春

其二

河中風物出乎倫閑命金蘭玉笋巡半笑梨花瓊臉嫩
輕顰楊柳翠眉新啣泥紫燕先迎客偷蕊黃蜂遠趁人
日々西園尋勝槩莫教辜負客城春

其三

幾年萍梗困邊城閑步西園試一巡圓沼印空明鏡瑩
芳莎藉地翠茵新幽禽有意如留客野卉多情解笑人
屈指知音今有幾與誰同享爰頭春

其四

金鼓

鑿輿出隴秦驅馳八駿又西巡千年際會風雲異一代
規模宇宙新西域兵來擒偽主東山
詔下起幽人股肱

元首明良世高拱垂衣壽萬春

河中春遊有感五首

西河

尋斯千有西戎梭
里檀故宮在為

構室未全終又見顏垣遠故壙

綠苑連延花萬樹碧堤回曲水千重不圖舌鼓談非馬

甘分躬耕學卧龍糲食麤衣聊自足登高舒嘯樂吾慵

其二

異域河中春欲終園林深密鎖顏壙東山雨過空青疊
西苑花殘亂翠重把攬碧枝初着子葡萄綠架已纏龍
等閑春晚芳菲歇葉底翩跹困蝶慵

其三

坎止流行以待終幽人射隼上高壙窮通世路元多事

險機關有幾重百尺蒼枝藏病鶴三冬蟄窟閉潛龍
琴書便結忘言友治圃耘蔬自養慵

其四

西域渠魁運已終

天兵所指破金墉崇朝駟騎馳千里一夜捷書奏

九重鞭策不須施犬馬廟堂良策足變龍北窻高卧薰
風裡儘任他人笑我慵

其五

重玄叩擊數年終大道難窺萬仞壙舊信不來青鳥遠
故山猶憶白雲重自知勲業輸維鳳且學心神似老龍

忙裏偷閑誰似我兵戈橫蕩得疎慵

過 吾河四首

河冰春盡水無聲靠岸釣魚羨擊冰乍遠南州如夢蝶
暫遊北海若飛鵬隋堤柳絮風何處越嶺梅花信莫憑
試暫停鞭望西北迎風羸馬不堪乘

其二

北方寒凜古來祗親見陰山凍鼠冰戰鬪簷楹翻鐵馬
窮通甚勢變金鵬五車經史都無用一鷄書章誰可憑
安得衝天暢予志雲輿六馭信風乘

其三

一聖龍飛德足稱其亡凜凜涉春冰千山風烈來從虎
萬里雲垂看舉鵬

堯舜徽猷無闕失良平妙筭足依憑華夷一混非多日
浮海長桴未可乘

其四

自愧聲名無可稱賢愚混世炭和冰竊盜倉鼠初成蝠
噴浪溟鯤未化鵬賣劍學耕食粗遣買山歸老價難憑
秋江月滿西風軟何日扁舟獨自乘

感事四首

富貴榮華若聚漚浮生渾似水東流仁人短命嗟顏氏

君子懷疾嘆伯牛未得鳴珂遊

帝闕何能騎鶴上揚州
幾時擺脫閑疆鎖
笑傲烟霞永自由

其二

當年元擬得封侯
一誤儒冠入士流
赫赫鳳鸞捐腐鼠
區區蠻觸戰蝸牛
未能離欲超三界
必用麾旄混九州
致

主澤民元素志陳書自薦我無由

其三

得不欣々失不憂
依然不改舊風流
深藏鳳壁毋投鼠

好蓄龍泉候買牛
山寺幽居思少室
梅花歸夢遶揚州
萱堂溫清十年闕
負米供親愧仲由

其四

人不知予我不尤
濯纓何必揀清流
良材未試聊耽酒
利器深藏俟割牛
舊政欲傳新令尹
新朝不識舊荊州
眉山云邁歸商路
痛怙新詩寄子由

壬午元日二首

西域風光換東方
音問疎屠蘇聊復飲
鬱壘不須書
舊歲昨宵盡新年
此日初客中
今十載孀母信何如

其二

萬里西征出玉關詩無佳思酒瓶乾蕭條異域年初換
坎軻窮途臘已殘身過碧雲遊極樂手遮東日望長安
年光迅速如流水不管詩人兩鬢斑

過沁園有感

昔年曾賞沁園春今日重來迹已陳水外無心修竹古
雪中含恨瘦梅新垣頽月榭經兵火草沒詩碑覆劫塵
羞對覃懷昔時月多情依舊照

用劉正叔韻

叅叩松軒積有年光塵融洩一愚賢視民每羨如芻狗
治國常思烹小鮮只道牛邊休執杖誰知琴上亦忘絃

湛然稍異香山老不學空門不學仙

西域家人輩釀酒戲書屋壁

西來萬里尚騎驢旋借葡萄釀綠醕司馬捲衣親滌器
文君挽袖自當壚元知沽酒業緣重何奈調羹手段無
古昔英雄初未遇生涯或亦隱屠沽

西域從王君玉乞茶因其韻七首

積年不啜建溪茶心竅黃塵塞五車碧玉甌中思雪浪
黃金碾畔憶雷芽盧仝七碗詩難得諗老三甌夢亦賒
敢乞君侯分数餅暫教清興透煙霞

其二

厚意江洪絕品茶先生分出蒲輪車雪花艷々浮金藥
玉屑紛紛碎白芽破夢一杯非易得搜腸三碗不能賒
瓊甌啜罷酬平昔飽看西山揜翠霞

其三

高人惠我嶺南茶爛賞飛花雪沒車

是日作茶會值雪

玉屑三

甌烹嫩蘂青旗一葉碾新芽頓令衰叟詩魂爽便覺紅
塵客夢賒兩腋清風生坐榻幽歡遠勝泛流霞

其四

酒仙飄逸不知茶可笑流涎見麩車玉杵和雲春素月
金刀帶雨剪黃芽試將綺語求茶飲特勝衫把酒賒

啜罷神清淡無寐塵囂身世便雲霞

其五

長笑劉伶不識茶胡為買鍾謾隨車蕭々暮雨雲千頃
隱々春雷玉一芽建郡深甌吳地遠金山佳水楚江賒
紅爐石鼎烹團月一椀和香吸碧霞

其六

枯腸搜盡數杯茶千卷胸中到幾車湯響松風三昧手
雪香雷震一槍芽滿囊垂賜情何厚萬里携來路更賒
清興無涯騰八表騎鯨踏破赤城霞

其七

啜罷江南一椀茶，枯腸歷歷走雷車。黃金小碾飛瓊屑，
碧玉深甌點雪芽。筆陣陳兵詩思勇，睡魔卷甲夢魂賒。
精神爽逸無餘事，卧看殘陽補斷霞。

和冲霄韻五首

垂亡

聖道賴君鳴坎軻，休嗟道不行。須信詩魔降筆陣，好將
酒戰破愁城。滔々秋水如人志，薄々閑雲似世情。一舉
冲霄知有日，垂天萬里看鵬程。

其二

古今興廢不堪聽，寵辱都如夢。一驚韜略欣然推後進，
琴書足以了餘生。既知物々頭頭是誰問，朝朝暮暮情
散盡，迷雲何所有一輪秋月普天明。

其三

天涯索寞正窮秋，衰草寒煙無盡頭。葉底哀蛩空促織，
雲間征鴈祇供愁。酪漿滿引洗羊胛，糲食隨緣薦鹿修。
試暫迴々樂真覺，人間萬法一時收。

祇供愁一作謾書愁

其四

星々華髮鏡中驚，好賦歸興接浙行。重位寧貪高一品，
故園無憚遠千程。晴天花絡春山色，落日松和秋水聲。
無恙閭峰三百寺，遨遊吟嘯老餘生。

其五

古木殘陽映矮崗，鴈行天際寫秋光。
霜蓑帶雨添愁色，晚菊和風送冷香。
濁酒三年渾未試，黃梁九月得初嘗。
龍沙且喜身强健，南望幽人天一方。

又一首

不見高陽舊酒徒，臨風惆悵幾踟躕。
無窮真味思焦尾，有限浮生嘆白駒。
德望服人輸二陸，文章重世媿三蘇。
散材潦倒渾無用，空作昂藏一丈夫。

和冲霄十月桃花韻二首

桃源仙子憶劉郎，不憚嚴冬雨雪涼。
紅雨已先初夏落，

妖魂重對小春芳。冷侵絡萼剗舒臉，寒徹朱衣強噴香。
誰向荒園慰蕭索，數枝無語映斜陽。

其二

春生秋殺乃天常，來往推遷炎與涼。
晚節正當陰氣塞，窮冬忽見小桃芳。
豈知木末能成寔，僭與江梅敢並香。
自媿備員調鼎鼐，不知何事謬陰陽。

用薛正之韻

無德慙為天下先，湖山歸計好加鞭。
霜深尚有籬邊菊，風勁全無葉底蟬。
三弄瑤琴歌素月，一尊濁酒醉蒼煙。
鳳池分付變龍去，萬頃瀟湘屬湛然。

湛然居士文集卷之五

湛然居士文集卷之六

和景賢見寄

用劉潤之乞冠韻

西域河中十詠

西域和王君玉詩二十首以唱玄

和楊彥廣韻

題平陽李君寔此君軒

西域有感

早行

自叙

西域元日

西域寄中州禪老

蒲華城夢萬松老人

寄巨川宣撫

寄南塘老人張子真

觀瑞應鶴詩卷獨子進治書無詩

寄德明

才鄉外五年止惠一書

寄清谿居士秀玉

戲秀玉

寄張子聞

寄用之侍郎

和正卿待制韻

寄仲文尚書

雪軒老人邦傑久不惠書作詩怨之

謝王清甫惠書

思親二首

思親用舊韻二首

思親有感

再過西域山城驛

辛巳閏月西域山城值雨

十七日早行始憶昨日立春

是日驛中作窮春盤

西域蒲華城贈蒲察元帥

乞車

戲作二首

過太原南陽鎮題紫微觀壁三首

和松月野衲海上人見寄二首

夢中偶得

賈非熊餞予用其韻

用李德恒韻

松月老人寄詩因用元韻

和薛正之韻

和景賢見寄

敲罔叅透後三三彷彿前人何所慚
妙筆照人驚老字新詩入手想清談
塵中名利予難出夢裡榮華君不耽
准擬歸時便歸去閭山珍重舊禪菴

珍重一
任好在

用劉潤之乞剋韻

隱逸養幽慵飄蕭兩鬢蓬
角巾折暮雨醉帽落秋風
避暑掛石上啣杯漉酒中
忘機任真率露頂向王公

西域河中十詠

寂寞河中府連堯及萬家蒲萄親釀酒杞攬看開花飽
啖雞舌肉分食馬首瓜土產瓜大如馬首人生唯口腹何礙過
流沙

其二

寂寞河中府臨流結草廬開尊傾美酒擲經得新魚有
客同聯句無人獨看書天涯獲此樂終老又何如

其三

寂寞河中府遐荒僻一隅蒲萄垂馬乳杞攬燦牛酥釀
酒無輸課耕田不納租西行萬餘里誰謂乃良圖

其四

寂寞河中府生民屢有災避兵開遠穴防水築高臺六
月常無雨三冬却有雷偶思禪伯語不覺笑顏開

其五

寂寞河中府頽垣遠故城園林無盡處花木不知名南
岸獨垂釣西疇自省耕為人但知足何處不安生

其六

寂寞河中府西流綠水傾衝風磨舊麥西人作磨風動
机軸以磨麥
懸碓杵新粳西人皆懸
杵以舂春月花渾謝冬天草再生優游
聊卒歲更不望歸程

其七

寂寞河中府清歡且自尋麻牋聊寫字
葦筆亦供吟傘柄學鑽笛宮門自斲琴
臨風時適意不負昔年心得故宮門
堅木三尺許斲為琴有清聲

其八

寂寞河中府西來亦偶然每春忘舊閨
隨月出新年強策渾心竹難穿無眼錢
異同何定據俯仰且隨緣西人不計
閨以十二月為歲有渾心竹其金銅芽錢無孔

其九

寂寞河中府聲名昔日聞城隍連猷敵
市井半丘墳食

飭秤斤賣金銀用麥分生民怨來後
簞食謁吾君

其十

寂寞河中府遺民自足糧黃橙調蜜煎
白餅糝糖霜漱旱河為雨無衣墾種羊
一從西到此更不憶吾鄉

西域和王君玉詩二十首

年來深欲買湖山貧病難酬絹五千
歸去不從陶令請知音未遇孟嘗賢
排愁器具思歡伯送老生涯乏債泉
惟有詩魂常伴我閑吟陶寫箇中玄

其二

一髮燕然曉日邊寒雲疊々亂山千萬重沙漠猶逢友
十室荒村亦有賢面客芳樽思北海驚人奇語憶南泉
思量萬事都渾錯勉力輪鎚好叩玄

其二

君侯乘興寫佳篇找得瓊琚價倍千妙筆一揮能草聖
新詩獨惠過稱賢半瓶濁酒斟瓊竿七碗清茶泛玉泉
萬里西行真我幸逢君時復一談玄

其四

健羨金鞍美少年盈門劍客列三千須知執德元非德
况是無賢敢自賢不解弯弓射石虎誰能擊劍躍泉

黑頭勲業今何在壯歲功成愧謝玄

其五

雲龍相感本乎天會合君臣歲一千西伯已亡誰老々
卜商何在肯賢々鵠雛未必輕食鼠蚯蚓猶知下飲泉
巧拙是非無定據到頭誰解辨黃玄

其六

奔走紅塵積有年深思雪澗竹竿千誰能世上全三樂
好向林間伴七賢筆下風生詩似錦爰頭春漲酒如泉
詩成酒罷寂無事靜几明窓誦太玄

其七

竹徑風來自破禪修篁青劍葉垂千爛吟風月元無礙
高卧煙霞未是賢迷處無由逃絆鎖悟來何處不林泉
縱橫觸目皆真理坐卧經行鳥路玄

其八

無減無生不論年誰誇挑熟歲三千休將真宰陪司命
星名莫使明星動進賢星名有道不妨居鬧市無心奚礙酌
貪泉何能遠遯塵囂去且向人間養素玄

其九

從他豪俊領時權指顧貔貅數百千碌々餘生甘養拙
明明

聖代豈遺賢且圖混世啜漓酒勿謂濯纓棄濁泉莫道
無為云便了有為何處不逢玄

其十

浮生瞬息度流年唐漢興亡不半千清潔採薇輸二子
英雄濟世有三賢未能海上尋芝草且向塵中泛醴泉
醉興陶々略相似無何鄉裡亦通玄

十一

成敗興亡事可憐勞生攘々幾千々調心莫若先離欲
治世無如不尚賢小 豈能懷大器短繩那得汲深泉
直須箭透威音外不用無為不用玄

十二

得、清歡樂自然不辭去國客程千
翻騰舊案回君玉
唱和新詩有景賢每遇開尊邀素月
常因盥手掬寒泉
衰翁自揣何多幸未死中間樂此玄

十三

幾回午枕不成眠幽鳥閑、近數千
安世不知安世計
隱居常慕隱居賢幾行石榻圍松徑
一簇茅齋繞澗泉
掛起西軒風似水閒將義易索幽玄

十四

農隱生涯樂自天藥畦香穰僅盈千
蠅營累世真堪笑

狗苟勞生未若賢帶月扶犁耕暮野
衝雲荷鋤撥春泉
耘耔餘暇遶寔底獨抱遺經考至玄

十五

閑、箇事本明圓一念緣興路八千
生死既知皆是幻
功名猶恋豈能賢興來暢飲斟晴月
醉後高歌枕碧泉
觸處逢渠何所礙不玄、處亦玄、

十六

物、頭、總是禪觀音應現化身千
杜門宴坐無傷道
遯世幽居也是賢祇為看山開翠竹
偶因煎茗汲清泉
靈雲點檢真堪笑不見桃花不悟玄

十七

蓑衣狂脫暮江邊一醉寧論價十千老矣馮唐何所往
歸與陶令最為賢靈苗細々初盈圃春水洎々漸滿泉
酒醒夢回無箇事澄心忘慮體三玄

十八

九重閭闔列群官曳珮鳴珂及萬千雲水偷將屬野叟
功名廻施與時賢好憑定慧超三界不戀輪廻沒九泉
迅速光陰莫虛度迴光返照靜參玄

十九

不學經書不說禪誰論芥子納三千忘形詩句追先覺

適意琴書慕昔賢白雪陽春吟雅調高山流水奏鳴泉
平生受用元無盡叅透真空未是玄

二十

鯁生詩僻慕詩仙謂君玉也乱綴狂吟數百千淺陋妄言唾
俊哲清新綺語媿先賢摧殘吟鬢星々髮傾倒詞源渾
渾泉韻險言窮無可說祇憑此句露深玄

和楊彥廣韻

三臺頂要趁琵琶知己相逢兩會家雕斲勿傷石內玉
縱橫頂放火中花探玄渾似三盃酒清興何消七椀茶
誰識湛然端的處差徭隨分納些々

題平陽李君寔此君軒

環榻森々蔭好涼此君風味詎能忘
虛心悄悄生來勁直節亭々老更剛
雖與蓬蒿均雨露本同松菊傲風霜
主人雅志元堪尚物以群分類以方

西域有感

落日城頭鴉亂啼秋風原上馬頻嘶
雁行南去滿湘北萍跡東來鳥鼠西
百尺棟梁誰着價三春桃李自成蹊
功名到底成何事爛飲玻璃醉似泥

早行

馬駝殘夢過寒塘低轉銀河夜已央
雁跡印開沙岸月

馬蹄踏破板橋霜湯寒卯酒兩三盞
引睡新詩四五章
古道遲々四十里千山清曉日蒼涼

自叙

信流乘坎過西天鉢裡吞針亦偶然
只道一花剎點額不知三子暗登肩
既來此世難逃數且應前生未了緣
俗眼見時難放過并賦陳首萬松軒

西域元日

凌晨隨分備樽罍辟疫屠蘇飲一盃
迂叟不令書鬱壘癡兒剎要画鍾馗
新愁又逐東風至舊信難隨春日来
又向邊城添一歲天涯飄泊幾時回

西域寄中州禪老士大夫一十五首

恨離 師太早淘汰未精起乳慕之念作
是詩以寄之

吾師道化震清都奔逸絕塵我不如近日虛傳三島信
幾年不得萬松書宗門淘汰猶嫌少習氣薰蒸尚未除
惆悵天涯淪落客臨風不是憶鱸魚

蒲華城夢萬松老人

辛巳閏月蒲華城夢萬松老人法語諄々
覺而猶見其彷彿作詩以寄

華亭彷彿舊時舟又見吾師釣直鈎只道夢中重作夢

不知愁底更添愁曾叅活句垂青眼未得生侯已白頭
撇下塵囂歸去好誰能騎鶴上揚州

寄巨川宣撫

巨川宣撫文武兼資詞翰俱妙陰陽歷數
無所不通嘗舉法界觀序云此宗門之捷
徑也今觀瑞應鶴詩巨川首唱烏嘆其多
能作是詩以美之

歷數興亡掌上看提兵一戰領清官馬前草

詔珠璣潤紙上揮毫風雨寒昔日談禪明法界而今崇
道倡香壇諸行百務君都占潦倒鯁生何處安

寄南塘老人張子真

張侯風味詎能忘黃米曾令我一嘗

昔予馳驛至漁陽道過南塘子真名

予一設黃餘

抵死解官違

北闕達生遯世釣南塘知來何假靈龜兆

昔論運氣頗知未來事

作賦能陳瑞鶴祥豈是西邊無土物不如詩句寄東陽

觀瑞鶴詩卷獨子進治書無詩

丁年蘭省識君初緩步鳴珂遊帝都象簡嘗陪天仗立

玉驄曾使禁臣趨只貪滯酒長安市不肯題詩瑞應圖

我念李侯端的意大都好事不如無

寄德明

德明 萬燕作詩欲自絕且云但得為一

飽死鬼足矣士大夫憐之其詩末句有云

功名拍手笑殺人四十八年如一夢予每

愛此兩句近觀彌勃下生賦德明所作也

因作詩以寄之

英侯志節本凌雲尚自飄零故國塵有道且同麋鹿友

談玄能說虎狼仁幸然不作飽死鬼可惜空吟笑殺人

彌勃下生何太早莫隨邪見說無因

楞嚴經第十卷云未來世有人噉糠

愚痴種無因而非見破壞世間人故有是句

才卿外郎五年止惠一書

五年只得一書題路遠山長夢亦迷睡老黑甜酣順北
公詩中自云耽睡老冷官清淡泊遠西遠西故都羨人

得志能如虎笑我乏材粗效鷄佇看

天兵旋北闕後今不用玉閔泥

寄清谿居士秀玉

鷓鴣猶欠一枝栖不得燕山半土犁時復有琴歌碧玉
年來無夢遠清谿數行文字聊遮眼半紙功名苦噬臍
回首故人今健否餘生甘老碧雲西

戲秀玉

辱書聞秀玉油房蕭索馬溺衛死田畝水

災不勝感嘆清谿達士豈芥蒂胸中邪因
作詩以戲之

清谿掀倒打油房五衛凋零三徑荒未信塞翁嗟失馬
須知禦寇覓亡羊東湖菡萏從君賞西域蒲萄輸我嘗
各在天涯會何日臨風休忘老髯郎清谿嘗戲呼予為髯郎

寄張子聞

憶昔携琴論太玄渠通太玄經湛然初識子聞賢回頭葱嶺

仍千里分手松軒已五年嘗會萬松老人文室東望盧龍傾玉表

西來青鳥闕金牋幾時重會燕山道一曲臨風奏水仙

子彈水公嘗學之

寄用之侍郎

用之侍郎遺書誠以無忘孔子之教予謂窮理盡性莫尚佛乘濟世安民無如孔教用我則行宣尼之常道舍我則樂釋氏之真如何為不可也因作詩以見意云

蓬萊怜我寄芳牋勸我無忘仁義先幾句良言甜似蜜
數行溫語暖于綿從來誰識龜毛 到底難調膠柱絃
用我必行周孔教舍予不負萬松軒

和正卿待制韻

布袖龍鍾兩眼塵丹誠如舊白頭新暮雲西畔猶懷漢

曉日東邊纔是秦酒賤不妨連夜醉花繁長發四時春
花繁酒賤無佳思誰念天涯萬里人

寄仲文尚書

知仲文尚書投老而歸嘆其清高作詩以寄

仲文曾作黑頭公輔弼明時播美風治粟貸流冀北
提刑姦跡屏膠東笑觀桃李新恩徧拜掃松楸老計終
西域故人增喜色萬全良策不謀同

雪軒老人邦傑久不惠書作詩怨之

當時碩益便忘年別後春風五度遷萬里西行愁似海

千山東望遠如天不聞舊信傳梅嶺試道新詩怨雪軒
更上危樓一回首朝雲深處是燕然

謝王清甫惠書

西征萬里扈

鑿輿高閣文章束石渠只道昔年周夢蝶却疑今日我
為魚一簪華髮垂々老兩眼黃塵事々疎多謝貴人怜
遠客東風時有寄來書

思親二首

媿母琴書老自娛吾山側近結蘧廬髻邊尚結辟兵髮

昔予從征太夫人以髮少許賜予云俗傳父母之髮戴之可辟五兵今尚存烏篋內猶存教子

書幼稚已能學土梗老兄猶未憶鱸魚誰知萬里思
歸夢夜々隨風到故居

其二

昔年不肯卧茅廬贏得飄蕭兩鬢疎醉裡莫知身似蝶
夢中不覺我為魚故園屈指八千里老母行年六十餘
何日掛冠辭富貴少陵佳處卜新居

思親用舊韻二首

前年驛騎過西陲聞道萱堂髻已絲琴斷五絃忘舊譜
菊荒三徑負疎籬筵前戲笑知何日膝下嬉遊看幾時
欲附一書無處寄愁邊空詠滿囊詩

其二

天涯唯仗夢魂歸，破夢春風透客幃。
燈下幾時哦麗句，大夫人昔有詩云挑燈教子筵前何日舞斑衣。
垂塞北行人老得，江南遠信稀。
回首故園千萬里，倚樓空望白雲飛。

思親有感

骨肉星分天一涯，萱堂何處憶孤兒。
排愁正賴無聲樂，遣興學吟有眼詩。
麗句日逐三上爾，香醪時復一中之。
年前漠使來西域，笑我星星兩鬢絲。

再過西域山城驛

庚辰之冬馳驛西域過山城驛中辛巳暮
冬再過題其驛壁

去年馳傳暮城東，夜宿蕭條古驛中。
別後尚存柴戶棘，重來猶有瓦窻蓬。
主人歡喜鋪毛毯，驛吏蒼忙洗瓦鍾。
但得微軀且强健，天涯何處不相逢。

辛巳閏月西域山城值雨

冷雲携雨到山城，未敢衝泥傍險行。
夜聽窸聲初變雪，窺簷滴已垂冰。
淚凝孤枕三停濕，花結殘燈一半明。
又向茅亭畝一宿，行雲行雨本無情。

十七日早行始憶昨日立春

客中為客已決旬歲杪西邊訪故人把攬花前風弄麥
葡萄架底雨沾塵山城腸斷得窮臘村館魂銷偶忘春
今日喚回十載夢一盤涼餅翠蒿新

是日驛中作窮春盤

昨朝春日偶然忘試作春盤我一嘗木按切開銀線乱
砂瓶煮熟藕絲長勻和豉豆揉葱白西人投以豉餅必細剪
姜蒿點韭黃也與何曾同是飽區區何必待膏梁

西域蒲華城贈蒲察元帥

騷人歲杪到君家土物蕭疎一餅茶相國傳呼扶下馬
將軍忙拍買來車琉璃鍾裡葡萄酒琥珀瓶中把攬花

萬里遐荒獲此樂不妨終老在天涯將軍乃元帥子也

乞車

君家輪扁本多能碧軾朱轅照眼明居士此回無馬坐
即官不可輒徒行陳遵投轄情何厚將行又白連數日靈輒扶
輪報敢輕別更不須尋土物載將春色去東城

戲作二首

蒼顏太守領西陽招引詩人入醉鄉屈胸輕衫裁鴨綠
葡萄新酒泛鵝黃歌姝窈窕髯遮口舞妓輕盈眼放光
野客乍來同見慣春風不足斷人腸一種白葡萄酒色如金波

其二

太守多才民富强，风光特不讓蘇杭。葡萄酒熟紅珠滴，
杷攬花開紫雪香。異域絲簧無律呂，吳姬聲調自宮商。
人生行樂無如此，何必咨嗟憶故鄉。

過太原南陽鎮題紫微觀壁三首

廷臣侍從幾前驅，道侶忻奔迂使車。縣吏喜聞新號令，
村民爭認舊中書。纍纍山菓盈磁鉢，薄薄濁醪半瓦壺。
隱逸競詢新事跡，幾時遷洛卜新都。

其二

吾皇巡狩用三驅，萬騎千官奉

帝車。北闕春頒勸農詔，南陬夜奏報捷書。士民安堵耕

盈野，老幼迎郊漿滿壺。佇看要荒歸一統，天兵不日破
東都。

其三

三教根源本自同，愚人迷執強西東。南陽笑倒知音士，
反改蓮宮作道宮。紫微觀舊佛寺也，村人改
佛像為道像，故有是句。

和松月野衲海上人見寄二詩

遊子癡愚莫識家，牛車遠棄愛羊車。汪洋渤海龍宮藏，
涓滴波瀾坎井蛙。迷後萬言猶是少，悟來千里不為賒。
叢林衲子空行脚，遠徧天涯與海涯。

其二

小隱居山何太錯居鄜大隱絕憂樂山林朝市笑呵々
為報禪人莫動着

夢中偶得

庚辰正月夢旃檀剎澄公託萬松老人乞
筭籌于予々以九十一莖贈之仍作頌一
絕覺而猶憶遂錄之為他日一笑云

昔年鉤隱索幽竒只向縱橫枝上覓而今拍手笑呵々

九々原來九十一

仍囑附從者云若澄公道何不云八十一汝但應云果然果然拂袖便出

覺而自著語云幾日昏沉夢中挫五

賈非熊餞予用其韻

鑿轡和鳴車指南廷臣自愧侍龍駮平生慷慨貞夫一
萬里別離益友三老子此行無酒債故人歸計有禪菴
白雲野衲皆宗匠道一因緣好細叅

用李德恒韻

吾子棲遲尚布衣挑燈彈鋏壯歌悲阮生固已開青眼
馬氏元來有白眉運拙巢由真可慕時亨房杜不難為
男兒用舍奚憂喜三徑耕耘足自資

松月老人寄詩因用元韻

談禪講教不知家芳草漫々去路差杓卜虛聲 老鼓
盤星錯認洞山麻全無去就論空色誰有心情說照遮

松月野僧瀕薦取釣魚人是老玄沙

和薛正之韻

天涯倚遍塞城樓凝望冥鴻空自羞禮義不張真我恨
干戈未戢是吾憂每憐丹鳳能擇食常笑黃能悞上鉤
何日解榮償舊約扁舟蓑笠五湖遊

湛然居士文集卷之六

湛然居士文集卷之七

用李邦瑞韻

寄平陽淨名潤老

和鄭景賢韻

和李茂才寄景賢韻

除我堂

寄武川摩訶院圓明老人

和李漢臣韻四首

和北京張天佐見寄

戊子繼武川劉搏霄韻

憇解州邵薛村洪福院

邵薛村道士陳公求詩

過金山和人韻三絕

謝王巨川惠臘梅因用其韻

和王巨川題武成王廟

又用韻

又一首

和景賢七絕

又和四絕

和景賢二絕

和高冲霄二首

過天山和上人韻二絕

過覃懷二絕

王屋道中

過天德用遷上人韻

贈遼西李郡王

題張道人扇二首

題古并覃公秀野園

題昭上人松菊堂

題平陽劉子寧玄珠堂

題誌公圖

題黃公墨竹便面

請住東堂

請倪公

請照老住華塔

華塔昭上人請為功德主

請崑公禪師詣大德作水陸大會

和賈搏霄韻二絕

和高麗使三首

夢中偶得

和武善夫韻

題寒江接舫圖

題黃梅出山圖

夢中贈聖安澄老

跋定僧崑

詠探春花用高冲霄韻

寄休林老人

過濟源登裴公亭用閑々老人韻四絕

再用前韻

復用前韻

再和西菴上人韻

請真老住華塔

請玉公住太原開化

和薛伯通韻四絕

和松菊堂主人照老見寄三詩

洞山位頌

大陽十六題

西域嘗新瓜

天德海上人寄詩用元韻

寄白雲上人用舊韻

武川摩訶院請為功德主

和長老二絕

過平陽高庭英索詩強為一絕

用李邦瑞韻

沉々北海雪波深老眼增明寸碧岑未得一江活物水
何酬四海望雲心我生有遇千年會自愧難為三日霖
吾子佞然虛讚德臨風羞繼謫仙吟

寄平陽淨名潤老

駟騎新從平水迴知公無恙笑顏開出門不剪閑庭草
退步從生古殿苔玉鎖何須絳彩鳳金鈎毋得釣黃能

夜深織就無紋錦但有人來寄箇來

和鄭景賢韻

我愛龍崗老鳴琴自老成未彈白雪曲先愛水仙聲但
欲合純古誰能媚世情林泉聊自適何必獻承明

和李茂才寄景賢韻

醒時還醉、還醒尚憶輪臺飲興清瀚海波濤君忍聽
天山風雪我難行好學慷慨英雄操毋做辛酸兒女情
但得胸中空灑、天涯何處不安生

除戎堂

王師西征賢帥賈公由後于雲內築除戎

堂于城之西阿以練戎事禦侮折衝高出
前古予道過青塚公召予宴于是堂鴻筆
大手題詩洒墨錯落于楹棟間皆讚揚公
之盛德予因作二詩以陳其梗槩云

除戎堂主震威名一掃妖氛消未萌不出戶庭成廟筭
折衝樽俎有奇兵何須公瑾長江險安用蒙恬萬里城
坐鎮大河兵偃息居延不復塞塵驚

其二

除戎廳事築城阿烽火平安師旅和遠勝長城欺李勣
徒標銅柱笑伏波服心不用七擒策禦侮何勞三箭歌

高枕幽窓無一事西人不敢收長河

寄武川摩訶院圓明老人

臨行不暇別圓明禪客機閑百變生明月清風都不會
落花流水兩無情尺知 謁摩訶院誰道曾離歸化城
賓主相忘非聚散笑談松竹自清聲

其二

新詩入手眼增明老作機鋒太峻生略序寒溫閑禮數
過承褒賞假人情羨君奮迅超真地笑我徘徊戀化城
且喜武川歸海若狂流萬派盡消聲

其三

我愛圓明道眼明簡書時復寄鯁生談真辨妄輸達士
背正歸邪笑世情且隱驪珠光萬丈奚貪尺璧價連城
穹廬高枕無餘事靜聽潮轟北海聲

其四

歸與不得效淵明細碎功名誤此生客裡政如閑氣味
病來猶有好心情永絃巖品昭君曲醉墨閑題蘇武城
受用觀音法無盡悲茹風送兩三聲

其五

一扇儒風佛日明舍生從此樂餘生高人編簡尋長策
衲子林泉稱野情見道穀帛充廩藏喜聞流散集京城

自慚無德毗

明主千里虛名浪播聲

和李漢臣韻四首

夢中身世髻垂班方士從誇藥駐顏性海一波涵萬象
威音雙箭透重關圓融月水非生滅浩渺虛舟任往還
便好灰心養愚拙須知大智本閑之

其二

飛龍登九五歷數與天膺休運綿瓜瓞功臣列土封但
期酬子志奚慮枕吾肱千載
聖人出休嗟見有恒

其三

雲中棲隱養雄豪我愛先生一着高鼓腹詩鳴光
聖世雄文端可繼離騷

其四

龍庭十載不知疲自恨無才出六奇欲著涓埃裨
海嶽虛名閑譽畏人知

和北京張天佑見寄

寓跡

龍庭積有年功名已後祖生鞭銷金衆口嫉居士好事
獨君慕湛然許遠雲山分袂別幾時風雨對床眠瓊華

贈我將何報聊寄江南古樣絃

戊子繼武川劉搏霄韻

不得吾山卧翠霞西行、遍海之涯火風地水雖非我
南北東西總是家驛騎親馳涉弱水星軺躬駕過流沙
惟期

聖德漸遐邇不憚

龍庭萬里賒

憇解州卸薛村洪福院

天兵南出武陽東暫解征鞍憇梵宮玉像魏、紅葉捧
金容奕々碧紗籠三秦繁盛如席卷西晉風流掃地空

唯有真如元不壞青山依舊白雲中

卸薛村道士陳公求詩

玄言聖祖五千言不說飛昇不說仙燒藥煉丹全是妄
吞霞服氣苟延年湏知三教皆同道可信重玄也是禪
趨破異端何足慕紛紛皆是野狐涎

過金山和人韻三絕

金山突兀翠霞高
清賞渾如享太牢
半夜穹廬伏枕卧
亂雲深處野猿號

金山前畔水西流
一片晴天萬里秋
蘿月團々上東嶂
翠屏高挂水晶毬

金山萬壑闐聲清山色空濛弄晚晴我愛長天漢家月
照人依舊一輪明

謝王巨川惠臘梅因用其韻

雪裡冰枝破冷金前村籬落暗香侵令人多謝王公子
分惠幽芳寄好音

和王巨川題武成王廟

商辛自底滅亡期堡障全空聚日絲誰識華山歸馬日
易於渭水釣魚時

又用韻

不遇知音鍾子期逢人未敢理冰絲年來忘盡悲風操

空憶傷麟嘆鳳時

又一首

今年扈從入西秦山色猶如昔日新詩思遠隨秦嶺鴈
征衣全染灞橋塵含元殿壞荆榛古花萼樓空草木春
千古興亡同一夢中多少未歸人

和景賢七絕

一曲悲風子彈穹廬聊復助清歡自慚未盡桐君趣
老境方知道愈難

龍庭十載南訛再品朱絃韻未和美漣千鍾聊當酒
純音三弄且充歌

今日邊城又見君
試彈流水藝梅魂
聲和塞色金徽潤
香散穹廬玉鼎溫
雅操真堪坐廟堂
積年仁義佐賢王
鳴琴談笑澤天下
始信斯文天不亡
桐孫原採嶧陽林
萬里携來表素心
聊爾贈君為土物
也教人道有知音
年來衰老四旬餘
願與人間萬事疎
惟有琴魔降不得
鳴球曼玉徹清虛
一作笑來心
地未清虛
知音重遇已忘憂
况復邊山七月秋
聯句絃歌清夜樂
人生適意亦何羞

又四絕

年來世事已參商
但有聲塵尚未忘
若向琴中定優劣
敲岡錯認老髯郎
撫弄桐君樂自然
寥々古意詎容傳
伯牙檢點真堪笑
不遇知音便絕絃
幽人寥落思無窮
付與軒昂一曲中
欲罷不能行且止
泣麟嗟鳳鼓悲風
接得新詩想
談奇才獨步斗之南
縱橫風月輸君子
惟有枯禪不許叅

和景賢二絕

嘗許景賢黃華墨跡景賢寄
詩督予因和其韻以戲之

醉時還許醒時無諺有斯言正謂予未得素鵝白似雪
等閑難與右軍書

龍岡才德古來無敏捷新詩正起予詞翰雙全妙天下
銀鈎深似魯公書

和高冲霄二首

十里東風渭水春臨風酌月弔英魂直湏立事書麟閣
何必題詩寄雁門

翠華南渡濟蒼生垂老將觀德化成昨夜行宮傳好語
秦川草木也忻榮

過天山和上人韻二絕

從征萬里走風沙南北東西總是家落得胸中空索々
凝然心似白蓮花

一入空門我暢哉浮雲名利已忘懷無心對鏡誰能識
優鉢羅花火裏開

過覃懷二絕

十年寥落隱穹廬驛使空來好信無再過覃懷覓陳迹
冰魂無恙影扶疎
信斷江南望驛塵十年負嶺頭春而今重到覃懷地
却與梅花作主人

王屋道中

雪嶺風林度古關
畫圖曾見晉名賢
而今好倩丹青手
添我龍鍾一湛然

過天德用遷上人韻

行盡中原二百州
黃龍徃々不吞鉤
而今再出天山道
杖拾綸竿北海遊

贈遼西李郡王

我本東丹八葉花
先生賢祖相林牙
而今四海歸皇化
明月青天却一家

題張道人扇二首

誰裁雲扇綴春棧
招引微涼枉費工
何似踏開真境界

普天匝地起清風

真空境界本如々
病眼生花認畫圖
至道絕形剗著面
太虛無面更添鬚

題古并覃公秀野園

流水潛穿屋下籬
青山屋上數峰奇
佳園已有溫公句
何必公更寫詩

題昭上人松菊堂

晴烟蒼節出牆青
斜日黃花隔檻明
松菊尚存歸未得
湛然真箇太憨生

題平陽劉子寧玄珠堂

玄珠失却已多時縱使離妾枉用眉誰識這些閑捩子
再三撈捩始應知

題誌公圖

昔傳雞貌誌公真我道斯言尚未親刹々塵々無處避
丹青也是本來人

題黃山墨竹便面

黃山落筆露全机底箇團團太崛竒點破本來真面目
何好節外更生枝

請住東堂

雲中豪俊構東堂便請禪師早發裝自有東山鐵餒餚

不妨拈出大家嘗

請倪公

倪公本是我同叅道價崢嶸冠斗南千里雲山舊遊地
何妨杖錫往西菴

請照老住華塔

華塔當年隱蟄龍轟雷掣電滿雲中而今却請還山去
折脚鐺邊煖曉風

華塔照上人請為功德主

晉陽名刹僅千區華塔叢林冠一隅今日請予來領略
他年乞我一禪廬

請高公禪師詣天德作水陸大會

禪師久住賀蘭山心與白雲自在閑便好目風到人世
化為甘露滿人間

和賈搏霄韻二絕

舉世昏々似醉眠悲哉不肯救頭然祖師點破新閑振
直指人心教外傳

西庵談道頓忘眠今日相逢亦偶然故問瞿曇端的處
燈籠露柱却能傳

和高麗使三首

神武有威元不殺寬仁常媿數興戎仁綏武震誠無敵

重譯來王四海同

揚兵青海西涼滅渡馬黃河南汴空百濟稱藩新內附
馳輅來自海門東
壯年吟嘯巢由月晚節吹噓堯舜風西鬢蒼々塵滿眼
東人猶未識髯公

夢中偶得

我愛湖山好郊齋遠澗泉道人閑受用不使半文錢

和武善夫韻

佐主焦勞力已殫微才安可濟時難開樽北海希文舉
携妓東山笑謝安

雨露新恩

君責重桑榆老境我年殘何時致政
山去三迳依然
松菊寒

秋霖初霽覺新涼午夜東山月吐光
翠竹無心甘晚節
黃花有意助年芳忠誠自許一心赤
老境誰憐兩鬢霜
遙憶我山歸未得故人書簡怨東陽

題寒江接舫圖

一派瀟湘萬里山閑騎凍驢點江天
風帆雪棹知多少
認取華亭沒底船

題黃梅出山圖

佛祖不識山中主良才可惜遭斤斧
肩擔明月過前峰
一時忘却曹溪語

夢中贈聖安澄老

一束三人作一團了無前後亦無偏
幾乎笑殺龐居士
擬問如何便着拳

跋定僧嵩

玉崑三尺碧玲瓏入定僧迷一色功
打入無明山鬼窟
不知何日透真空

詠探春花用高冲霄韻

風拂新芳映短牆典刑依約類丁香
梅花欲謝渠先坼

消得東君為汝忙

寄休林老人

一禪客論洞山公案渠謂洞山果有喫棒分目作頌以寄之

世上元無真是非叢林禪客自多疑此詩寄向并州去
笑倒休林老古錐

過濟源登裴公亭用閑、老人韻四絕

一挹青山插碧空平湖春水碧溶溶裴公亭畔千竿竹
撩我詩情得、濃

珍玉參差照座寒閑、佳句繼香山

有樂天詩碑在焉

湛然不

揆真堪笑也取題詩列壁間

繞垣喬木碧天叅松竹蕭、翳鏡潭他日携琴來隱此

林間乞我一禪庵

碧湖風定水痕平雪竹幽禽自好聲我羨清源高隱士
干戈人世不知兵

再用前韻

山接晴霄水浸空山光灑、水溶溶風迴一鏡揉藍淺
雨過千峰潑黛濃

掀髯坐語閑臨水仰面徐行飽看山竹裡忽聞春雪落
天教着我画圖間

侍中庵底春山色裴老亭邊秋水聲修竹茂林真隱地
但期天下早休兵

叔外玄機好細忝他年卜築遠澄潭琴書活計無多子
祇與龍岡共一庵

復用前韻

水影連天渺渺山光和水水溶溶一林修竹搖雲碧
百畝涼陰蔽日濃

門外回環皆碧水亭中坐卧得青山凭欄盡日搜新句
思入煙霞縹緲間

幾時投老謁同叅擬向

君王乞鏡潭飮了遨遊容膝處裴公亭與侍中庵一作爛賞

裴公亭畔竹掃
來容膝侍中庵

四海干戈尚未平不如歸隱聽歌聲情知文武都無用
罷讀詩書不學兵

再和西菴上人韻

不在尋求不在叅誰分西北與東南雲川試入西庵去
三聖元來共一庵

請真老住華塔

華塔叢林久席虛真公子請肯來無湛然拙偈呈君去
便好携瓶倒上驢一作笑倒當
年十萬夫

請玉公住太原開化

大愚不了疾兒孫開化重興政賴君便請踏開閤換子

何妨地炙與天薰

和薛伯通韻四絕

黃花紅葉滿秋山
月浸銀河夜未闌
寂寞梧桐深院落
有人何處倚欄干
碧山粧點塞天秋
老盡黃花蝶也愁
拚醉東籬顛倒舞
人間富貴一何樓
衰年且喜志微伸
鏡裡驚看白髮新
何日得遊雲水去
秋江鷗鷺淡相親
虛名羈我未能歸
羞見冥冥一鴈飛
拜掃松楸定何日
不堪雙淚對君揮

和松菊堂主人胎老見寄三詩

松菊堂中老故人
芝眉重謁我無因
林松老節應依舊
籬菊寒英又一新

晉陽相遇亦前因
分手歸來迹已陳
松菊幽堂應冷淡
與君同話更何人

後老茶毗四十年前
身是我誤相傳
香山聲價喧天下
爭似衰翁不會禪

來詩謂予香山後老之後身故以此解嘲云

洞山五位頌

正中偏

十月澄江徹底冰
梅花江路破瑤英
寒齋冷坐人無寐

雪映書窓一夜明

偏中正

區々遊子困風塵就路還家觸處真
芳草滿川桃李亂
風光全是故園春

正中来

石女翩翩鳥道飛
淵明琴上換冰絲
緩歌劫外陽春曲
慢盤中白雪詞

兼中至

涇渭同流無間斷
華夷一統太平秋
而今水陸車舟混
何礙冰人跨火牛

兼中到

水窮山盡懸崖外
海角天涯雲更遮
撒手轉身人不識
迴途隨分納些些

大陽十六題

識自宗

拈花老子徒饒舌
面壁胡僧太賺人
更著洞山行過水
吾宗從此永沉淪

死中活

百尺竿頭須進步
無明鬼窟好抽身
寒灰定爆真奇味
枯木花開別是春

活中死

韶老須弥論過失盧陵米價認商量可憐一粒靈丹藥
嚙下喉嚨命已亡

不落死活

白雲深處有滄波半醉微醒笑更歌孤艇往來無繫絆
陰晴天氣曝漁蓑

背捨

人亡家破更何依退步懸崖撒手時去歲生涯無寸土
今年活計更忘錐

不背捨

通方大隱好居鄞手段能如火裡蓮九陌香塵烏帽底
一椀春水白鷗前

活分

垂衣端拱媿佳兵文化優游致太平昨夜濛濛春雨足
松筠花草一時榮

殺人劍

雪刃森々倚碧雲佛魔凡聖總亡魂水乾滄海魚龍死
火烈崑岡玉石焚

平常

寒來向火被添綿夏月臨風使扇渴飲飢食隨分過

閑中打坐困時眠

利道拔生

箇箇既知迦葉富人休怨釋迦慳破鑄煮得空華寔
餓裡盛將鐵漢食

言無過失

元知舌上無橫骨須信喉中有轉關喚鼈為龜人不肯
真教迦葉也眉攢

透脫

瀟湘一片蘆花秋雪浪銀濤無盡頭何處漁歌發清响
鷺鷥飛出白汀洲

透脫不透脫

重陽九日菊花新妙契忘言不犯春收得安南夏代北
不知何日得通津

稱揚

從來箇事不囊藏刹刹塵塵為舉揚近日令嚴誰敢犯
不教奪市與攙行

降句

鷲嶺默然全是影毗耶杜口本非真燈籠露柱呵々笑
誤殺浮生多少人

踈山住々莫忽々齧牙且無祖師意須信撲牛另有方

不犯鋒鏑震天地

方又圓

破艇折棹殘蓑笠
召女直鉤波上月
方士徒誇鐵作金
道人祇要金成鐵

西城嘗新瓜

西征軍旅未還家
六月攻城汙滴沙
自愧不才還有幸
午風涼處剖新瓜

天德海上人寄詩用元韻

知子無心謁五侯
浮雲富貴豈能留
華亭夜靜西風軟
萬頃滄波浸月鉤

寄白雲上人用舊韻

上人別後未能參
一首新詩自北南
蕭寺深沉香火冷
白雲閑鎖舊禪庵

武川摩訶院請為功德主

昔日南遊又五春
馬蹄踏遍武川塵
而今却到經行處
且與摩訶作主人

和長老二絕

只識瓶盤不識金
瓶盤釵釧本真金
一從打破疑團後
物物頭頭總是心

又

生死與涅槃都如昨夢耳覺後笑呵々無彼亦無此

過平陽高庭英索詩強為一絕

一川秋色滿東籬雁字行々自寫悲試問省庵何所省
黃花紅葉總堪詩

湛然居士文集卷之七



湛然居士文集卷之八



醉義歌

題恒岳飛來石

為慶壽寺作萬僧疏

太原開化寺草律為禪仍命予為功德主因作疏

為石壁寺請信公庵主開堂疏

王山圓明禪院請予為功德主因作疏

萬卦山天寧萬壽禪寺命予為功德主因作疏

請某公庵主任竹林疏

請湛公禪師住紅螺山寺疏



請容公和尚住竹林疏

請智公尼禪開堂疏

代劉帥請智公尼禪住報先寺

請某庵主開堂疏

為慶壽寺化萬僧疏

請亨公庵主開堂疏

三學寺改名圓明請予為功德主因作疏

平陽淨名院草律為禪請潤公住持疏

太原五臺寺請予為功德主因作疏

請定公庵主出世疏

大龍山永寧石壁禪寺請忘憂居士為功德主代

為之疏

代忘憂居士請琳公住持壽寧禪寺疏

為大覺開堂疏三道

司天判官張居中六壬祛惑鈴序

苗彥寔琴譜序

荅楊行省書

進西征庚午元曆表

西游錄序

辨邪論序

寄趙元帥書

萬松老人評唱天童覺和尚頌古從容菴錄序
評唱天童拈古請益後錄序

燕京崇壽禪院故圓通大師朗公碑銘

貧樂庵記

自贊

燕京大覺禪寺新建經藏記

醉義歌

遼朝寺公大師者一時豪俊也賢而能文
尤長于歌詩其旨趣高遠不類世間語可

與蘇黃並驅爭先耳有醉義歌乃寺公之
絕唱也昔先人文獻公嘗譯之先人早逝
予恨不得一見及

大朝之西征也遇西遼前郡王李世昌
於西域予學遼字於李公期歲頗習不揆
狂斐乃譯是歌庶幾形容其萬一云

曉來雨霽日蒼涼枕幃搖曳西風香困眠未足正展轉
兒童來報今重陽吟兒蒼々渾塞色客懷哀々皆吾鄉
斂衾默坐思往事天涯三載空悲傷正是幽人嘆幽獨
東隣携酒來郊屋憐予病竄伶仃愁自言新釀秋泉麴

凌晨未盥三兩卮旋酌連斟折欄菊我本清癯酒戶低
羈懷開拓何其速愁腸解結千萬重高談幾笑吟秋風
遙望無何山色好飄飄漸遠塵寰中淵明笑問斥逐事
謫仙遙指華胥宮華胥咫尺尚未及人間萬事紛紛空
一器緣空開一器宿醒未解人先醉携樽挈榼近花前
折花顧影聊相戲生平豈無同道徒海角天涯我遐棄
我愛南村農丈人山溪幽隱潛修真老病猶耽黑甜味
古風清遠途猶迤喧囂避遯巖麓僻幽閑放曠雲泉濱
旋春新黍爨香飴一尊濁酒呼予頻欣然命駕忽去
漠漠霜天行古路穿村迤邐入中門老幼倉忙不寧處

丈人迎立及盃寒老母自供山菓醋扶携齊唱雅聲清
酬酢溫語如甘澍謂予綠髮猶可需謝渠黃髮勤相諭
隨分窮秋搖酒卮席邊籬畔花無數巨觥深斝新詞催
閑詩古語玄閑開懷囑酒謝予意村家不棄來相陪
適遇今年東鄙阜黍稷馨香棲畎畝相邀斗酒不決旬
愛君蕭散真良友我酬一語白丈人解釋羈愁感黃耆
請君舉盞無言他與君却唱醉義歌風雲不與世榮別
石火又異人生何榮利儻來豈苟得窮通夙定徒奔波
梁冀跋扈德何在仲尼削跡名終多古來此事元如是
畢竟思量何恠此爭如終日且開樽駕酒乘杯醉鄉裡

醉中佳趣欲告君至樂無形難說似泰山載斲為深杯
長河釀酒斟酌之迷人愁容世無數呼來拍耳充罰卮
一盃愁思初銷鑠兩盃迷魂成勿藥爾後連澆三五卮
千愁萬恨風蓬落胸中漸得春氣和腮邊不覺衰頰却
四時為馭馳太虛二曜為輪輾空廊湏臾從轡入無何
自然汝我融真樂陶々一任玉山頽藉地為茵天作幕
丈人我語真非真真兮此外何足云丈人我語君聽否
聽則利名何足有問君何事徒劬勞此何為卑彼豈高
蜃樓日出尋變滅雲峰風起難堅牢芥納湏彌亦閒事
誰知大海吞鴻毛夢裡蝴蝶勿云假莊周覺亦非真者

以指喻指々成虛馬喻馬兮馬非馬天地猶一馬萬物
一指同胡為一指分彼此胡為一馬奔西東人之富貴
我富貴我之貧困非予窮三界唯心更無物世中物我
成融通君不見千年之松化仙客節婦登山身變石木
魂石質既我同有情于我何瑕隙自料吾身非我身電
光興廢重相隔農丈人千頭萬緒幾時休舉觴酌卮忘
形跡

題恒岳飛來石

無盡居士題恒岳之飛來石有偈云石落黃河北山銜
白日西聰明厭血食悔不值元珪天下稱頌之為人磨

毀字文漫駁不復識矣有仁上人自恒山來請予復書
是倡欲刊諸舊文之側予應之曰無盡之妙言昭如日
月與天地而齊終豈風霾之能掩哉然不能拒上人之
請勉為之書己丑清明日湛然居士漆水移刺楚材晉
卿題

為慶壽寺作萬僧疏

竊以棲心物外已知四大之空寓跡塵中且賴十方之
供矧五常尤尊於博施而六度首重於檀那不求郡國
之英豪誰養林泉之跛挈芒鞋藜杖弗辭千里之勤糲
食蔬羹好助萬僧之化謹疏

太原開化寺草律為禪仍命予為功德主因作
疏

竊惟昔年開化今日為禪已蒙智老拈香又請湛然作
主尋行數墨一蠲教院家門運水般柴便有叢林氣息
謹疏

為石壁寺請信公庵主開堂疏

竊以達磨昔年斧鹵截鶴續鳧天寧今日顛頊證龜作
鰲可憐弄巧成拙不免出醜放乖我信公庵主受洞下
之宗風佩却波天寧老人道號也之心印叅窮行說不到處踏
開偏正未分前既已降尊就卑何愧壓良為賤逢場作

戲請來關裡刺頭借水獻花便好穩處下脚謹疏

玉山圓明禪院請予為功德主因作疏

玉山乃雪崑之故刹湛然實萬松之門人既是當家本
非生客春風秋月長聯萬葉之芳晨香夕燈永祝
一人之壽

萬卦山天寧萬壽禪寺命予為功德主因作疏

唯萬卦之古刹寔萬松之舊遊有虛已彦公道號飛書請湛

然作主勉為提領良慰殷勤山色水聲永作道人活計
漁歌樵唱偷傳衲子家風謹疏

請某公庵主任竹林疏

狐死首丘是難忘於熟處心空及第何猶迷于故園我
某公庵主三頓打不回頭一喝全無入耳喫竹林餘廂
竹林矢嗣竹林法傳竹林禪打齏哄盆莫忘竹林之重
德披毛帶角好種竹林之道場

請湛公禪師住紅螺山寺疏

袒襴不了慚惶碧眼之老胡兒孫受殃架構紅螺之大
刹既是將錯就錯不免拈空空我湛公禪師韶陽遠
孫摩訶嫡子穿透三句語擊碎十法門便好住持更休
推讓滔天嶺上只圖同看有毛龜絕頂山頭且要共栽
無影樹謹疏

請容公和尚住竹林疏

慶壽慈悲拽擺犁而耕種竹林蕭洒嘆槽廠之空閑已
讓位而逃宜見機而作我容公禪師一條生鐵脊兩片
點銅唇叅透濟下沒巴鼻禪說得格外無滋味語呵佛
罵祖且存半面人情揭海掀山別有一般閑挨試問孤
峰頂上何如十字街頭若是本色瞎驢好趁大隊既號
通方水何必芒繩謹疏

請智公尼禪開堂疏

用管仲則安用豎刁則危賢愚政事叅萬松則謗叅延
洪則讚冷暖人情行窮萬里山川只是一天風月惟智

公禪師本有丈夫志不學老婆禪拈却花冠弗裝珍御
可駭持牛生掙便好出頭勿謂牝鷄司晨不敢下嘴謹
疏

代劉帥請智公尼禪住報先寺

劉公隣
居報先

洗垢無緣之遠井之救渴卜隣有德故近寺而敬僧我
智公禪師先禮報恩後叅奉福遠如舊 近似新深澁
鎖打開便請升堂啟戶明燈剔起願希鑿壁偷光謹疏
請某庵主開堂疏

和尚拽砵子不離寺內老鼠拖胡盧只在倉中某公庵
主先謁報恩再叅奉福并回斗轉圓倒教傾十分利不

圖半文一石禪獨攬八斗莫學淘沙去米打破羅盆且
來量土唱籌熟謾敵將謹疏

為慶壽寺化萬僧疏

隱迹林泉置死生於度外隨身瓶鉢寄口腹於人間欲
隆三寶之風強遣萬僧之化何須異味唯求野菜淡黃
齏不用多般只要山田脫粟飴謹疏

請亨公庵主開堂疏

亨公庵主久叅萬松老人因緣不契再謁
王山大愚和尚不期月罷叅予過太原王
山寺僧請予作疏

萬松三頓不回頭王山一釣便吞鉤大愚不似大愚老
脇下三拳即便休

三學寺改名圓明仍請予為功德主因作疏
本無男女等相着甚名模強分禪教者流且圖施設粵
三學之巨剎冠四海之名藍今改僧而舍尼遂從禪而
草律邀印公為粥飴頭請湛然作功德主根深蒂固常
聯萬葉之芳地久天長永祝
一人之壽謹疏

平陽淨名院草律為禪請潤公禪師住持疏

竊以不居這那院好箇主人本無南北心悉為佛子謹

請懷仁潤老來住平陽淨名翡翠簾前請看木人之舞
琉璃殿上願聞布鼓之音謹疏

太原五臺寺請予為功德主因作疏

鎮三晉之雄藩有五臺之古刹獻花酌水改律為禪具
疏懇懃請予領畧謹命休林常祝壽結箇好因緣為報
文殊莫放光不打遮鼓笛謹疏

請定公菴主出世疏

少林九年打坐祇得半提曹溪五派分開全沒一滴雖
是將無作有也要弄假像真我定公庵主洞下玄孫五
臺嫡子解造無米粥能撫沒絃琴既已炙地薰天須要

掀天翻海正逢開化枉閑有力叢林便好出頭莫戀無
明鬼窟謹疏

大龍山永寧石壁禪寺請忘憂居士為功德主

代為之疏

唯明月清風取之無禁者况龍巖石壁命予為主人煩
我一心護持謝他兩手分付千品好景半文不費買山
錢數紙閑言一狀便充商稅契謹疏

代忘憂居士請琳公禪師住持壽寧禪師疏

臨汶水之故邑有壽寧之巨藍歷代歸依百年煥顯乞
忘憂為功德主請琳公為粥飯人獨掌不浪鳴單手豈

成拍千年罕遇最難時節因緣一疏速來便是衲僧已
鼻謹疏

為大覺開堂疏三道

竊以門裡安身已早荆棘漫地品中宴坐更知過犯彌
天請來借座陞堂便好倩人問話引得轆轤轉也問甚
千遭萬遭快迭爐鑿熱時盛搭一箇兩箇
竊以雲門胡餅切忌咬嚼盧陵米價怎敢商量不甘公
案有訛正要作家批判伏惟奧公和尚佩聖安之正印
透韶陽之上関莫守命鬼窟中三彈不動快橫身虎口
裡一勘便招

竊以逢人不出、則便為人傍觀者晒逢人便出、則
不為人當局者迷直湏一箭透重関不得三心或二意
自甘入室渾如豹胆熊心不肯陞堂却是蟲頭鼠尾

司天判官張居中六壬祛惑鈴序

予故人張正之世掌義和之職通經史百家之學尤長
於三式與予參商且二十年矣癸巳之春既克汴梁渠
入

觀於

朝形容變盡唯語音存耳乘閑因出書一編曰六壬祛
惑鈴予再四緹之引式明倒皆有所據或有隱奧人所

未通者釋以新說蓋採諸經之所長無所予盾者取其
折衷為一家之書近代未之有也求傳寫者既衆其同
列請刊行以廣其傳予忻然為引以題其端癸巳中秋
日湛然居士漆水移刺楚才晉卿序

苗彥寔琴譜序

古唐棲巖老人苗公彥寔其名彥寔其字博通古今尤
長于易應進士舉兩入御闈而不捷乃拂袖去之公善
于琴事為當世第一嘗游于京師士大夫間皆服其高
妙泰和中詔天下工於琴者侍郎喬君舉之於朝公待
詔于秘書監予幼年刻意于琴初受拍於待詔弭天用

每得新譜必與棲嵒商確妙意然後彈之朝廷王公大
人邀請棲嵒者無虛日予不得與渠對指傳聲每以為
恨壬辰之冬

王師濟長河破潼關涉京索圍汴梁予奏之

朝廷索棲嵒于南京得之達范陽而棄世其子蘭挈遺
譜而來凡四十餘曲予按之果為絕聲大率署令衛宗
儒之所傳也予令錄之以授後世有知音博雅君子必
不以予為徒說云壬辰仲秋后二日湛然居士漆水移
刺楚才晉卿序

荅揚行省書

某再拜復書于行省閣下辱書諭及辭位事請

聞奏施行者惟

聖代之深仁賞延於世偉閨門之內助貴繫于夫故

行省李公雖稽

北覲之期頗著南伐之績時不適願天弗假年伏惟閣下族出名家世傳將種無見女子之態有大丈夫所為吏民服心

朝廷注意遂授東臺之任冀舒南顧之憂今也抑意陳書引年求退懼折鼎覆餗之患避牝鷄司晨之譏雖曰謙尊而光曷若隨時之義分茅列土無忘

北闕之恩秣馬厲兵可報西門之役今因人回謹復書以聞山川遼濶書簡浮沉比獲瞻依更希調護不宣

進西征庚午元曆表

臣楚才言堯分仲叔春秋謹候於四方舜在璣衡旦暮肅齊于七政所以欽承天象敬授民時典謨寔六籍之大經首書其事堯舜為五帝之盛主先務厥猷皎如日星紀之方冊由此言之有國家者律曆之書莫不先也是以三代而下若昔大猷遵而奉之星曆之官代有其人漢唐以來其書大備經元創法無慮百家其氣候之早晏朔望之疾徐二曜之盈衰五星之伏見疎密無定

先後不同蓋建立都國而各殊或涉歷歲年之遠遠不
得不差也既差則必當遷就使合天耳唐曆八徙宋曆
九更者良以此夫金用大明百年纔經一改此去中原
萬里不啻千程昔密今疎東徼西著以地遙而歲久故
勢異而時殊庚辰

聖駕西征駐蹕尋斯千城是歲五月之望以大明太陰
當虧二分食甚子正時在宵中是夜候之未盡初更月
已食矣而又二月五月朔微月見于西南校之於曆悉
為先天恭惟

皇帝陛下

德符乾坤

明並日月

神武天錫

聖智夙資

邁唐虞之至仁 追羲軒之淳化異咸仁而底義故
奉天而謹時重勅行臺旁求儒者 臣魚蟲細物草芥微
人粗習周孔之遺書竊慕義和之陳迹俎豆之事靡遑
諸已箕裘之業敢忘于心恨無命世之大才誤忝
聖朝之明詔欽承

皇旨待罪清臺五載有奇徒曠著龜之任萬分之一聊
陳犬馬之勞既校曆而覺差竊效顰而改作今演紀窮
元得積年二千二十七萬五千二百七十歲命庚辰 臣
愚以為中元歲在庚午天啓

宸衷決志南伐辛未之春

天兵南渡不五年而天下略定此天授也非人力所能及也故上元庚午歲天正十一月壬戌朔夜半冬至時加子正日月合璧五星聯珠同會虛宿五度以應我皇帝陛下受命之符也臣又損節氣之分減周天之杪去交終之率治月轉之餘課兩曜之後先調五行之出沒大明一失於是是一新驗之于天若合符契又以西域中原地里殊遠創立里差以增損之雖東西數萬里不復差矣故題其名曰西征庚午元曆以紀我聖朝受命之符及西域中原之異也所有曆書隨表上

進以 聞伏乞

頒降玄臺以備

行宮之用臣誠惶誠懼頓首頓首謹言

西游錄序

古君子南逾大嶺西出陽關壯夫志士不無銷黯予奉詔西行數萬里確乎不動心者無他術焉蓋汪洋法海涵養之效也故述辨邪論以斥糠粃少荅佛恩戊子馳傳來京里人問異域事慮煩應對遂著西游錄以見予志其間頗涉三聖人教正邪之辨有識予之好辨者予應之曰魯語有云必也正名乎又云思無邪是正邪之

辨不可廢也夫楊朱墨翟田駢許行之術孔氏之邪也
西域九十六種此方毗盧糠瓢白經香會之徒釋氏之
邪也全真大道混元太一二張左道之術老氏之邪也
至於黃白金丹導引服餌之屬是皆方技之異端亦非
伯陽之正道疇昔禁斷明著典常第以

國家創業崇尚寬仁是致偽妄滋彰未及辨正耳古者
嬴秦燔經坑儒唐之韓氏排斥釋老辨之邪也孟子闢
楊墨予之黜糠丘辨之正也予將刊行雖三聖人復生
必不易此說矣己丑元日湛然居士漆水移刺楚才晉
卿叙

辨邪論序

夫聖人設教立化雖權實不同會歸其極莫不得中凡
流下士唯務求奇好異以眩耳目噫中庸之為德也民
鮮久矣者良以此夫吾夫子云中人以下不可以語上
也老氏亦謂下士聞道大笑之釋典云無為小乘人而
說大乘法三聖之說不謀而同者何哉蓋道者易知易
行非掀天拆地翻海移山之詭誕也所以難信難行耳
舉世好乎異固執厥中舉世求乎難弗行厥易致使異
端邪說亂雅奪朱而人莫能辨悲夫吾儒獨知楊墨為
儒者患辨之不已而不知糠蟹為佛教之患甚矣不辨

猶可而况從而和之或為碑以紀其事或為賦以護其
惡噫天下之惡一也何為患於我而獨能辨之為患於
彼而不辨反且羽翼之使得遂其奸惡豈吾夫子忠恕
之道哉黨惡佑奸壞風傷教千載之下罪有所歸彼數
君子曾不捫心而靜思及此也邪予旅食西域且十年
矣中原勤靜寂然無聞迺有永安二三友以此京講主
所著糠蠶教民十無益論見寄且囑予為序予再四繹
之辨而不怒論而不縵皆以聖教為據善則善矣然予
辭而不序焉予以謂昔訪萬松老師以問糠蠶邪正之
道萬松以予酷好屬文因作糠禪賦見示予請廣其傳

萬松不可予強為序引以行之至今庸民俗士誇歸於
萬松予甚悔之今更為此序則又将貽謗于講主者也
謹以萬松講主之餘意借儒術以為比述辨邪論以行
世有謗者予自當之安可使流言餘謗汙玷山林之士
哉後世博雅君子有知我者必不以予為囁嚅云乙酉
日南至湛然居士漆水移刺楚才晉卿叙于西域瀚海
軍之高昌城

寄趙元帥書

楚才頓首白君瑞元帥足下未審迺來起居何如昔承
京城士大夫數書發揚清德言足下有安天下之志仍

海集卷之六
託僕為先容僕備員翰墨軍國之事非所預議然行道
澤民亦僕之素志也敢不鞭策駕鈍以羽翼先生之萬
一乎僕未達

行在而足下車從東旋僕甚快、夫端人取友必端矣
京城楚鄉子進秀玉輩此數君子皆端人也推揚足下
談不容口故知足下亦端人已然此僕於足下少有疑
焉若夫吾夫子之道治天下老氏之道養性釋氏之道
修心此古今之通議也舍此以往皆異端耳君之尊儒
重道僕尚未見于行事獨觀君所著頭陀賦序知君輕
釋教多矣夫糠蠶乃釋教之外道也此曹毀像謗法斥

僧滅教弃布施之方杜懺悔之路不救疾苦敗壞孝風
寔傷教化之甚者也昔劉紙衣扇偽說以惑衆迨今百
年未嘗聞奇人異士羽翼其說者夫君子之擇術也不
可不慎今君首倡序引黨護左道使後出陷邪岐墮惡
趣皆君啟之也千古遺恥僕為君羞之糠蠶異端也輒
與佛教為比萬松辨賦甘泉勸書反以孟浪巨蠹之言
處之以此行已化人僕不知其可也僕謂足下輕釋教
者良以此也夫於所厚者薄無所不薄君既輕釋教則
儒道斯可知矣君之於釋教重糠蠶於儒道則必歸楊
墨矣行路之人皆云足下吝嗇故奉此曹圖其省費故

也昔諸士大夫書來咸謂足下以濟生靈為心且吾夫子之道以博施濟衆為治道之急誠如路人所說則吾夫子之道亦不可行矣文將安濟生靈乎又君序頭陀賦云冀請宗師祈冥福以利斯民足下民之儀表也崇重糠蠶毀斥宗師將使一郡從風漸化斯知斯民罪惡日增矣又將安以利斯民乎僕謹撰辨邪論以寄幸披覽之更請涉獵藏教稽考儒書反復參求其邪正之岐不足分矣僕素知君為邪教所惑亦未敢勸論君不以僕不才轉託諸士大夫萬里相結為友故敢以區區忠告易曰方以類聚物以群分經云士有爭友故身不離

于令名若知而不爭安用友為若所尚不同安可為友或萬一容納鄙論便請杜絕此輩毀頭陀賦板以雪前非如謂僕言未當則請於茲絕交夏暑比平安好更宜以遠業自重區區不宣

萬松老人評唱天童覺和尚頌古從容菴錄序

昔予在京師時禪伯甚多唯聖安澄公和尚神氣嚴明言辭磊落予獨重之故嘗訪以祖道屢以古昔尊宿語錄中所得者叩之澄公間有許可者予亦自以為得及遭憂患以來功名之心束之高閣求祖道愈亟遂再以前事訪諸聖安聖安翻案不然所見予甚惑焉聖安從

容謂予曰昔公位居要地又儒者多不諱信佛書惟搜
摘語錄以資談柄故予不敢苦加 鑿耳今揣君之心
果為本分事以問予豈得猶襲前愆不為苦口乎予
老矣素不通儒不能教子有萬松老人者儒釋兼備宗
說精通辨才無礙君可見之予既謁萬松杜絕人迹屏
斥家務雖初寒大暑無日不叅焚膏繼晷廢寢忘餐者
幾三年誤被法恩謬膺子印以湛然居士從源目之其
叅學之際机鋒固測變化無窮魏然若萬仞峰莫可
攀仰滔然若萬頃波莫能涯際瞻之在前忽焉在後
回視平昔所學皆塊礫耳噫登東山而小魯登泰山而

小天下者豈虛語哉其未入閩域者聞是語必謂予志
本好異也唯屏山閑然其相照乎爾後奉命赴
行在扈從西征與師相隔不知其幾千里也師平昔法
語偈頌皆法 隆公所收今不復得其藁吾宗有天童
者頌古百篇辨為絕唱予堅請萬松評唱是頌開發後
學前後九書間閱七年方蒙見寄予西域伶仃數載忽
受是書如醉而醒如死而甦踴躍歡呼東望稽顙再四
披繹撫卷而嘆曰萬松來西域矣其片言隻字咸有指
歸結疑出眼高冠今古是為萬世之模楷非師範人天
權衡造化者孰能與於此哉予與

行宮數友旦夕游泳於是書如登大寶山入華藏海巨
珍奇物廣大悉備左逢而右遇目富而心飫豈可以
間語言形容其萬一邪予不敢獨擅其美思與天下共
之京城唯法弟從祥者與僕為忘年交謹致書請刊行
於世以貽來者乃序之曰佛祖諸師埋根千丈機緣百
則見世生苗天童不合抽枝萬松那堪引蔓湛然向枝
蔓上更添芒索穿過尋香逐氣者鼻孔絆倒行玄體妙
底脚根向去若要脚根點地鼻孔撩天却須向這葛藤
裏穿過始得甲申中元日漆水移刺楚才晉卿叙于西
域阿里馬城

評唱天童拈古請益後錄序

雪竇拈頌佛果評唱之擊節碧巖錄在焉佛果頌古圓
通善國師評唱之覺海軒錄在焉是臨濟雲門互相發
揚矣獨洞下宗風未聞舉唱豈曲高和寡耶抑亦待其
人耶必有通方明眼判斷尚未晚也昔佛鑑拈八方珠
玉集止及其半每至曹洞夾嶺石霜三宗機緣留付佛
果今佛鑑佛果拈八方珠玉集具在愈可疑焉三大老
後果有天童覺和尚拈頌洞下宗風為古今絕唱迨今
百年尚無評唱者予承承餘暇固請萬松老師評唱之
欲成三宗鼎峙之勢忍拈覆餗貞吝之譏今評唱頌古

從容菴錄已大播諸方評唱拈古請益後錄時老師年已六十有五矣循常首帶佛事人情晷隙之間侍僧請益旋舉旋錄皆不思而對應筆成文凡二十七日百則詳備神鋒穎利於斯見矣若夫據令于臨濟捧喝以前發機於雲門三句之外豈更與佛果圓通殘餒爭長哉俊快衲子舉一明三瞥見全鼎則為仰法眼雙鉉亦宛然矣但恐信不及徒勞話歲寒也吁壬辰重陽日湛然居士漆水移刺楚才晉卿序于天山

燕京崇壽禪院故圓通大師朗公碑銘

師諱祖朗姓李氏薊州漁陽人九歲出家禮燕京大聖

安寺圓通國師為師大定十三年京西弘業寺受具至二十一年改弘業為大萬安禪寺有司承制師充知事厥後拂衣駐錫聖安復為舉充監寺崇壽禪院者寔圓通國師退老之舊居也以師為宿舊之最永安開堅請師為宗主任持一歷十稔又奉勅選香林禪寺開山提點凡三載勅賜總持大德答其勤也既而崇壽復請住持載閱五春貞祐間奉勅改賜今號度門徒凡十有一人咸有肖父之風焉師前後輔翼叢林不憚艱苦讓功責己潛德密行不可槩舉師以壬午之仲冬十有四日示寂於崇壽僧臘五十三俗壽七十四師將順世預名

其屬徒笑謂曰生緣我將盡矣屬徒退而相謂曰師神色自若無他疾安得遽有是事邪后七日師命侍僧執筆代書頌云吐遮皮袋常為患害繼祖無能念佛有賴來亦無來去亦無礙曰大各離一時敗壞且道還有不敗壞者麼良久云浮雲散盡月昇空極樂光中常自在語竟乃閉目跏趺而寂於是遐迹緇素弔祭如雲嘉聲遠震愈光於生前矣其弟子輩瘞靈骨於師翁靈塔之左去京城之南可三里許丁亥之冬予奉

詔搜索經籍馳傳來京有庵主志奧者師之受戒弟子也晚得法於聖安澄公圓照大禪師以僕素與朗師善

囑予求碑銘僕素愛師之純古洒落與之遊者久矣師嘗云予晚節愈堅於持誦日念彌陀聖號數萬聲方止譬如抱河梁而浴又何害焉今聞師之寂也七日預知時至雅符龍猛祖師之證無乃持誦之驗與噫聖人豈欺我哉豈欺我哉萬松老人為宗門之大匠四海之所式範素慎許可嘗贊師之真曰德譽燭沉靈骨鏗金訥于言而敏于行璞其貌而玉其心勅選提封於國寺天資飽練於禪林子徒知寒蟬將蛻尚嫻餘吟吾以謂陞圓通之堂者稽古依然接武于方今云萬松見許如是人可知已僕聞師侍從圓通國師最久而又臨終之際

湛然集卷之六
超然自在疑必得法于國師或因緣未合或受國師密
訓不令出世亦石霜素侍者之儔侶欣崇壽禪院方丈
法堂叢林制度一如聖安師久據而不請禪伯住持者
亦猶素侍者平欺老黃龍下視兜率悅之意歟予恐後
世明眼人責備于賢者累師之重德故雪之於此後之
子孫當幹父之蠱毋蹈前轍以玷師之高名焉湛然居
士再拜而作銘曰

偉哉朗公 誕跡漁陽 師侍圓通 達奧穿堂
肅然宸命 屢提國寺 退已謙人 舉廢修墜
見孫衆多 酷奉弥陀 心期極樂 迹厭娑婆

手便行 預知時至 臘五十三 壽七十四

奔喪赴祭 緇素駢闐 嘉聲遐播 愈盛生前

京南之原 荼毗靈骨 素荅陵空 朗師不歿

佯癡放憨 素公同參 蔑視兜率 平欺匾南

不邀宗匠 冷閑方丈 垂手無人 老殘龍象

予聞君子 責備乃賢 毋以微瑕 累乎大全

云子云孫 幹父之蠱 載震師名 永揚萬古

庚寅年六月望日

貧樂庵記

三休道人稅居於燕城之市榜其菴曰貧樂有湛然居

士訪而問之曰先生之樂可得聞與曰布衣糲食任天
之真或鼓琴以自娛或觀書以自適詠聖人之道歸夫
子之門於是息交游絕賓客萬慮泯絕無毫髮點翳於
胸中其得失之倚伏興亡之反覆初不知也吾之樂良
以此耳曰先生亦有憂乎曰樂天知命吾復何憂居士
進曰予聞之君子之處貧賤富貴也憂樂相半未敢獨
憂樂也夫君子之學道也非已為也吾君堯舜之君吾
民堯舜之民此其志也使一夫一婦不被堯舜之澤者
君子耻諸是故君子之得志也位足以行道財足以博
施不亦樂乎持盈守謙慎終如始若朽索之馭六馬不

亦憂乎其貧賤也卷而懷之獨潔一己無多財之禍絕
高位之危此其樂也嗟流俗之未化悲聖道之將頽舉
世寥々無知我者此其憂也先生之樂知所謂矣先生
之憂不其然乎道人瞪目而不荅居士笑曰我知之矣
夫子以謂處富貴也當隱諸樂而形諸憂處貧賤也必
隱 憂而形諸樂何哉第恐不知我者以為洋洋於富
貴戚々於貧賤也道人曰他人有心予忖度之吾子之
謂矣請以吾子之言以為記丙子日南至湛然居士漆
水移刺楚才晉卿題

自贊

別來十年五歲依舊一模一樣髭髯垂到腰間眉毛儼然眼上龜毛錐子畫虛空寫破湛然閑伎倆

其二

有髮禪僧無名居士入道甚似我道便是塵、刹、露全身紙上毫端何處避

燕京大覺禪寺創建經藏記

遼重熙清寧間築義井精舍於開陽門之郭傍有古井清涼滑甘因以名焉金朝天德三年展築京城仍開陽之名為其里大定中寺僧善祖有回緣力道俗歸嚮者衆朝廷嘉之賜額大覺貞祐初

天兵南伐京城既降兵火之餘僧童絕跡官吏不為之恤寺舍悉為居民有之戊子之春

宣美劉公從立與其僚佐高從遇輩疏請與公和尚為國焚修因草律為禪奧公罄常住之所有贖換寮舍悉隸本寺稍成叢席可容千指瑞像殿之前無垢淨光佛舍利塔在焉殘缺幾仆提控李德者素黨於糠蠶不信佛教至是改轍施財完葺其塔繼有提控晉元者施蔬圃一區于寺之南以給衆用糊口粗給庚寅之冬劉公以狀聞

朝廷招提院所貯餘經一藏乞遷於本寺安置許之於

是與公轉化擅越創建壁藏斗帳龕龕一週凡二十架
飾之以金繪之以彩窮工極巧煥然一新計所費之值
白金百笏能事告成累書請湛然居士為記余慨然曰
昔者聖人之藏書也貯之以金櫃寫之于琬琰重道尊
書以示于將來也浮屠氏之建寶藏者亦猶是乎吾夫
子刪詩定書明禮贊易六經之下流為諸子春秋以降
散為史書較其卷軸不為不多矣兵革以來率散落于
塵埃中吾儒得志于時者曾無一人為之裒集置之淨
室安之寶架豈止今日也哉成平之世間有儒冠率集
士民修葺宣聖之廟貌者曾未卒功已為有司糾劾矣

且以擅興之罪々之噫吾道衰而不振者良以此夫昔
雪巖示寂于王山時萬松老人方應詔住持仰嶠訃問
既至不俟駕而行遇完顏子玉諸塗子玉嘆曰士人聞
受業之師物故也雖相去信宿之地未聞躬與其祭者
豈有千里奔喪者耶佛祖之教源遠流長者有自來矣
子玉屢以此事語及士大夫今與公禪師非為子孫計
無取功名心汲々皇々丐乞于道路唯以佛宮秘藏為
務可謂不忘本矣予已致書於諸道士大夫之居官守
者各使營葺宣父之故宮亦由與公激之也云癸巳中

秋日記

次雲卿見贈

和王正夫憶琴

繼宋德懋韻三首

和平陽張彥升見寄

跋白樂天慵屏圖

和請住東堂疏韻

寄倪公首座

和呂飛卿

戲陳秀玉

和張敏之詩七十韻

敏之學士遠寄新詩七十韻捧讀之餘續

貂以尾聊資一笑

壯年多軼軻晚節歎行藏故國顏網穢

新朝明德香雄材能預笑大畧固難量迭出神兵速無
敵我武揚本圖服叛逆何止剪講張西討窮于闐東征
過樂浪彗侵天壘辟光動太白鉉整之車徒盛鱗之旗
鼓望

天皇深責重賢帥廟謨滅江左將禽楚河陽已滅商英
雄皆入彀強禦敢跳梁採訪軒車開司農官吏忙輕徭
常力足薄賦不財傷

勲業超秦漢規模邁帝王流言無管蔡奇計有平良增
葺新文物耕耘古戰場蛟龍方奮迅鷓鴣得翱翔偶遇
風雲會爭依日月光永疇千古恥一怒四夷攘虎帳十
年夢

龍庭幾度霜迎降初請命出郭遠相將久敵真宜死寬

思何一作未敢當

赦書民有幸歌詠

壽無疆扶杖聽

黃詔稱觴進白狼散財竭庫藏拔將出戎行殷絕仁猶
在周傾道不止來招燕郡內入覲大食傍戎服貂裘紫

星輶駿馬蒼中春辭北望初夏西涼瀚海泆而湧陰

山彷彿且惶間雲迷去路踈雨潤行裝出處空興嘆風光

自斷腸典刑陳故事利病上封章天下援深溺中州異

小康風俗承喪亂籌策要優長痼疾如神附遊魂笑鬼

張仁術能靈藥起膏肓避禍宜緘口當言肯括囊

遭讒心欲剖涉若膽先嘗北漠絕窮域西隅抵大洋詩

書猶不廢忠信未能忘羶補連腮帳繩穿朽脚林郊行

長野興人靜若禪房回鶻交游熟崑崙事跡詳風煙多

黯、雲水兩茫茫災變垂乾象妖氛翳太陽

髯龍三島去

玉葉一枝芳

明主初登極，愚臣敢進狂。
九疇從帝錫，五事合天常。
大樂陳金石，朝服具冕裳。
降升分上下，進退有低昂。
拓境時方急，郊天且未遑。
應兵無血刃，降虜自壺漿。
安堵無更肆，因敵不餽糧。

宸心尊德義，聖政濟柔剛。

恩澤涵諸夏，威稜震八荒。
勢連西域重，天助

北方強。舉我陪三省，求賢守四方。
錦衣捐毳褐，肉食弃糟糠。
隱逸求新任，流亡集故鄉。
百官欣戴

舜萬國，願歸

唐耕釣咸生遂，工商樂未央。
會將封泰岳，行看建明堂。
每嘆才雕篆，長慙學面牆。

君恩予久負，賢路我深妨。
覆餗恒憂懼，持盈是恐惶。
故山松徑碧，舊隱菊花黃。
太守方遺舄，初平政牧羊。
厚頴居此位，若已納於隍。
吟嘯須歸去，香山老侍郎。

再用張敏之韻

我愛張公子，丁年密退藏。
施為宜法則，議論自馨香。
元氣却不死，深陂豈可量。
兒時供府薦，壯歲已名揚。
汲汲尊泥父，堂堂類子張。
遷居擇隣里，濯足揀滄浪。
作傳編毛穎，談玄說劔鏘。
奇才千古重，令聞萬民望。
氣壓四明

客調窮三年減典謨師我舜雅頌起于商綿叢曾陳漢
仁術屢說梁本非中酒困長為和詩忙道長茹連接時
衰心獨傷篆文道似李隸字楷如王青眼予能作白眉
君最良萬言陳國利一戰捷文場出海游龍舞騰空翥
鳳翔十全君子行一代士林光句法吾師範詩材我竊
攘忠心常向日直節欲凌霜文沒歲云久道亡天未將
狂瀾時既倒木鐸子宜當德業能純粹學術靡理彊衝
天憎燕雀當路惡豺狼綺語吟千韻宸意掃千行、藏
閔治亂出處卜興亡郡隸清河上家居杜曲傍登科年
甫冠修史鬢初蒼仙觀嘗新文宮園醉晚涼朝天黍馥

踏退食獨行徨得暇多休沐游山小治裝一卮持竹葉
左手把無腸官酒澆三斗宮詞唾百章阮聲師校尉琴
訣受嵇康似玉風神異如蘭氣味長坦懷無戚、明見
笑張、草檄堪醫疾鍼詩可治盲博聞敵武庫高價重
珠囊憂患、多故艱難已備嘗悲歌聲歷、雅調韻洋
洋造次必于是中心何日忘生涯兩書篋香火一禪林
海上尋徐福壺中覓長房流傳雖若此真偽甚難詳水
國波奔激仙鄉路渺茫孤身朝

北闕皓首嘆東陽陰韻嚼佳句殘英嗅冷芳仁人今尚
在箕子本佯狂洪範明皇極彞倫叙有常百王遺禮樂

三代舊軒裳會補南極缺能令北斗昂無媒言囁嚅失
志思迴遑秋老空悲扇天涼 賣漿却來頻渭釣又絕
在陳糧志道衰猶夢依仁老更到故家三徑遠薄土一
厘荒混々常無捨乾々體自強率躬能省己行道不踰
方寧恥身衣褐誰嗟日食糠起歌明月夜舒嘯白雲鄉
綺夏終辭漢策由固避唐名極得三者柴立杙中央榮
遇傳金馬題名刻玉堂未窺君所蘊徒見子之墻遣欲
絕形累無貪不行妨一瓢渠樂逸陋巷我憂惶犧易章
編暗麟經古卷黃著述導輔嗣去取笑公羊再辨麟絕
筆重箋城復隍焦桐人不識獨有蔡中郎

讀唐史有感復繼張敏之韻頗有脂粉氣息遷
就聲韻故也呵呵

唐室 平久遺賢不遁藏羅紈桑幄膩餅餌麥疇香馬
牧初蕃息民編莫校量邊臣閑虎略衛士斂鷹揚禁苑
晨鐘動梨園錦 張披香風細々太液水浪々河漢明
方潤長庚淡不鏗羽旄儀兩列冠蓋道相望諫士陳休
戚廷臣論否減金石歌大雅琴瑟奏清商青鳥迷鴛瓦
烏衣遠西梁供張官府脩殺饌大官忙共享清時樂殊
無謗議傷含元朝百辟花萼宴諸王主上貞觀聖官僚
魏鄭良歲餘開武講春首闢文場異寶浮淮水餘糧朽

鳳翔諸羌來入衛百濟請觀光閔塞沉烽火鄉閭息寇
攘三春常若雨六月不飛霜聖德躋朝夕仁心本就将
俯知人意順仰視帝心當曠騎輕閱內精兵重北疆朝
廷潛巨蠹方鎮養貪狼粉面三千輩金釵十二行持盈
當忌滿居治不知止相罷曲江去權移林甫傍華清高
岷嶽驪嶠碧蒼々金屋眠春曉溫泉浴暮涼掖庭花爛
熳閣道路彷徨宮監金犀飾妖姬珠玉裝危絃驚醉耳
哀調斷柔腸燈燭暉鳩鵲絲簧沸建章奢淫幾桀紂純
儉劣成康擊柝宮城遠傳籌禁漏長謀 長汲々沉醉
若張々未悟薪及蕪誰知病已育人橫碧玉笛腰佩絳

香囊嶺表千山遠荔枝三日嘗仙衣吹渺々蓮舸泛洋
洋力士權誠重楊釧寵不忘承恩趨寶座奏事近牙床
熒惑頻侵斗秋陽弗集房人心咸怨怒天象不披詳易
水聲嗚咽燕山水鬱茫盜賊充上郡鞞鼓起漁陽殺氣
凌金闕繁霜殞玉芳環兒剗賜死天子懼如狂戰士皆
思變奸臣亦易常空閑塵羯鼓誰舞舊霓裳忠義心徒
順英雄志自昂翠華搖曳々鳶馭去遑々禁鬻庖供豕
村民路進漿隘兵蜀道陰餽口益州糧靈武兵聲振汾
陽意氣剗復收京闕克重治寢園荒賊勢時深感官軍
力益強羽檄傳劍閣龍駕返南方御府仍無酒飢民尚

噉糠叩都求道士蓬島覓仙鄉符使將歸漢真妃猶憶
唐金釵分一股鈿合擘中央揮涕春風殿傷心秋月堂
梧桐籊院砌桃李映宮牆佳夢真難得幽歡頗有妨春
宵成怨憶秋夜愈悲惶尚記修眉綠猶思半額黃強舒
鵝被翠閑殺輦車羊陵谷俄驚海滄浪已變隍臨風一
卮酒聊復酌三卮

次韻黃華和同年九日詩十首

黃華和同年九日詩以採菊東籬下悠然
見南山為韻予爰而繼之前叙思歸之心
後述叅玄之志所謂倒食甘蔗者也

秋香真可人不為無人改自慙寒昔盟東籬子空待我
獨搖酒卮不得寒英採臨風望故園參商二十載
西風殘日秋有客嗟幽獨偶尔得香醪淒然憶霜菊
去態屢變人生多返復十年一夢中猶未黃梁熟

無花復無蝶不似今秋窮黃花歲之別九日年之同我
居北海南子在西山東公予會何日一醉閑愁空
當年別吾山曾與黃華期富貴非予志小築臨東籬今
也違初心知我者其誰掛冠猶未遂寄此相思詩
無意恋三公有心辭駟馬洛陽失金谷閭山有別野芳
酒馭盈尊秋香折盈把沉醉卧西風不讓梨花下

汨沒紅塵中辜負黃華秋林泉與朝市試問孰為優胡
然久沉首令我心悠々酷思山水樂夢寐空神遊
歲月不我與彈指及衰年平生詣萬事抵死參重玄因
緣不可滯慎毋法自然兩邊都不立別有壺中天
無知豈真知無見非真見遮照玄縱橫機關千萬變虎
口幾橫身臨敵經百戰三折為良醫一交學一便
五流分洞下一派起湖南春水無心碧秋山着意嵐林
濟真顛漢曹山放酒酣許多閑伎倆子細好生參
水外猶逢水山前更有山原知非內外更不在中間測
海綫盈掬窺天見一斑樞机謾一世一筆請君刪

寄雲中東堂和尚

雲中種出火蓮華到底東堂是作家伏手骨撾腰下劍
笑人家具手中蛇三玄戈甲徒心亂五位君臣莫眼花
只遮些兒難理會草鞋包裹破袈裟

謝萬壽潤公和尚惠書

多謝堂頭遠賜書驚人筆我難如承當禪髓心無愧
供養佛牙力有餘幼子可襲先父業游人却到舊時居
箇中消息誰能悉玉女乘風跨鐵驢

燕京大覺禪寺奧公乞經藏記既成以詩戲之

詞源老去苦無多強著閑文讚釋迦道健兔毫生月窟

光明璽紙出新羅金爐幾辦龍涎燼玉板十分鳳墨磨
此起科差真可笑湛然陪酒更陪歌

新獲紫玉板
硯于友人

寄龍溪老人乞西崑香

寄語龍溪老古錐西崑風韻我長思香錢緩發鳴琴後
及鼎濃薰入定時比擬梅魂祗獨步品量龍腦可同馳
湛然鼻孔天大穿過多時不自知

謝聖安澄公饋藥

一粒靈丹寄我嘗湛然回簡謝西堂殺活一草真難會
藥病相治未易量子細嚼時元不礙渾淪吞下也無妨
聖安骨董知多少賣弄千年舊藥方

和王正夫韻

壯年自笑髮先霜喜色眉間一點黃退食

紫宸居鳳閣朝

天丹闕列鸞行功名必要光前古富貴何須歸故鄉濟
世元知有仁政活人不假返魂香

繼孟雲卿韻

歸與奚待髻雙鰭無問山聳岌我萬壑松風思仰嶠
千崑相兩憶平坡

仰山平坡皆
燕然名剎也

開基氣槩鯨吞海遁世

生涯鼠飲河好買扁舟從此逝醉眠江國一漁蓑

次雲卿見贈

濟々千官侍

玉宸尊賢容衆更親々風雲際會千年少

天地恩私四海均西狩一蘇張振亂南巡重變大梁春

車書南北無多日萬里河山宇宙新一作會同文軌

和王正夫憶琴

道人塵世厭囂塵白雪陽春雅意深萬頃松風皆有趣
一溪流水本無心忘机觸處成佳譜信手拈來搃妙音
陶老無絃猶是剩何如居士更無琴

繼宋德懋韻三首

聖人開運億斯年

睿智文明稟自天旁午衣冠遊北海縱橫耕釣滿居延
月氏入貢稱屬國日本觀光列戶編威震西溟千萬里
漢唐鴻業亦虛傳

其二

笑我區々亦強為故園荒矣欲何之讀書測海持螺測
學道窺天以管窺疲俗不禁新疾苦濫官難換舊瘡痍
才微任重宜求退自有當逢國子醫

其三

廣平流落寓平城親老家貧強苟生炎漢蕭曹賢政事
李唐房杜美聲名進求高譽千金重退隱閑身一葉輕

應繼開元舊勲業華堂鐘鼓對長檠

和平陽張彥升見寄

天兵出雲中一戰平城破居庸守將亡京畿遊騎邏有

客赴澶淵

予嘗倅開州

無人送臨賀奸臣興弒逆時君遠遷

播

聖主得中原

明詔求王佐胡然北海遊不得南陽卧

竊遇命前席客星侵

帝座萬里金山行三經玉門過于闐歲貢修燉煌兵勢
挫國維張禮義民生重食貨黜陟九等分幽明三載課

小人絕覬覦賢才無輒軻功名本忌盈廟堂難久坐
矣盍歸來歸與可重和俯仰不必慚寬弘從回唾清濁
自沙汰精麤任揚簸賦性嗜踈閑高眠樂慵惰蒼鷄粗
庖充黃犢足犁拖幼子事耕鋤老妻供碓磨隨分養餘
齡雖飢而不餓

跋白樂天慵屏圖

三盃兀兀元如道一覺昏昏恰似真不識香山慵睡意
知音自有箇中人

和請住東堂疏韻

東堂不肯卧西堂珍御鮮食別樣裝枉費青帘三百尺

雲中公子不來嘗

寄倪公首座

亨監逃海淹蘆爰隆老成龍過禹門獨有倪公尚癡坐
幾時承繼萬松軒

和呂飛卿

一試戎衣大定初達賢不得退閒居盟津既渡諸侯喜
親見

王舟躍白魚

戲陳秀玉并序

萬壽堂頭自汴梁來遠寄萬松老師偈頌

舊本有和卽度陳公一絕云清谿居士陳

秀玉要結蓮宮香火緣賺得稍翁搖艫棹

却云到岍不須舡嘻三十年前已有此段

公案湛然目清谿為昧心居士者厥有旨

哉僕未叅萬松時秀玉盛稱老師之德業

爾後少得受用皆清谿導引之力也每欲

報之秀玉竟不一染指故作是詩以戲之

不見桃源路渺茫

騎驢覓驢

清谿招引到仙鄉

未當好心湛然幸

得麪飽

吐也却

擘與些兒不肯嘗

恰似真个

用李君寔韻

繼崔子文韻

繼武善夫韻

鼓琴

扈從羽獵

狼山宥獵

對雪鼓琴

寄永室散人

寄平陽潤和尚

紅梅二首

吟醉軒

寄西菴上人用舊韻四首

和漁陽趙光祖二詩

自贊

再過太原題覃公秀野園

和韓浩然韻二首

張漢臣因入覲索詩

和謝昭先韻

德恒將行以詩見贈因用原韻以見意

送文叔南行

和馮揚善九日韻

示石州劉企賢

和劉子中韻

李庭訓和予詩見寄復用元韻以謝之

和黃山張敏之擬黃庭詞韻

寄嵩公堂頭同叅

寄移刺子春

寄妹夫人

送姪九齡行

送姪了真行

和英粹中山堂韻

和武善夫韻

和馮揚善韻

和董彥才東坡金杖詩二十韻

扈從冬狩

癸巳 扈從冬狩獨予誦書于穹廬中因
自譏云

天皇冬狩如行兵白旄一麾長圍成長圍不知幾千里
蟄龍震慄山神驚長圍布置如圓陣萬騎雲屯貫魚進
千群野馬雜山羊赤熊白鹿奔青麋壯士彎弓殞奇獸

更驅虎豹逐貪狼

御開有馴豹縱之以搏野獸

獨有中書倦游客放

下羶簾誦周易

用秀玉韻

甲午之秋秀玉殿學遠以新詩寄東坡杖

因用元韻謝之

七尺烏虬乳節堅清谿寄我、忻然敢輕黑鐵三十兩
遠勝黃金百萬錢好句君堪坡老敵清詩予負定公先
他年携此林泉去靜倚松軒誦大全

送西方子尚

西方子尚氣凌雲一見忘年各任真陰德傳家宜有慶

義方垂訓不違仁雄文固可魁天下確論曾無詭聖人
天產英才須有意好將吾道濟斯民

用樗軒散人韻謝秀玉先生見惠東坡杖

圓方頂足法高卑五九蒼々老節竒一日湛然獲二寶

東坡鐵杖寂通詩

和邦瑞韻送行

幸有和林酒一尊

尚醞出于和林城故有是句

地爐煨火為君溫昔

年相見興三嘆此日臨行贈一言士行莫忘直報怨人
情須信害生息而今躍入驚人浪珍重風濤過禹門

謝西方器之贈阮杖并序

了然居士素蓄東坡鐵杖洎地字號阮真
絕世之寶也

天兵既克汴梁先生携二君來燕欲藏之
恐不能終寶欲贈湛然南北相去不知其
幾千里慮中道浮沉是以獻諸秀玉殿學
田公奉

御欲轉致于予也甲午之秋陳田入覲果
饋之于我因亂道數語用酬厚意

睢陽三絕從來傳坡仙鐵杖為之先宋朝四美豈易得
地君神器稱手賢了然居士隱洛瀍讀書好古有積年

擒龍捉獲二寶之鑿棟屋壁穿

龍庭萬里疊山川欲來饋我嗟無緣將奪固與此理玄
慇懃携贈陳與田陳田今歲來朝

天惠然出賜穹廬前烏虬入手蒼壁懸恍然遺世如登
仙長蛟倚壁光娟娟鱗介欲生如蜿蜒澄澄秋月瑩朝
鏡須臾洗盡予腥羶足方法地頂法乾四十五節松栢
堅七尺烏金三十兩微篁瑟瑟鳴哀蟬雲頂纖纖空腹
圓十三玉柱鴻翻翻耽耽雲坐踞猛虎巖巖山口雙
絃鐵君伴我遊林泉足疾頓減衝雲烟臨風三弄碎瓊
玉清高秋水聲涓涓安仁得此如臨淵子聃求杖不惜

錢湛然坐受匪勞力不勝其服心胡然西方諷我求終

焉故令二友相招延抱桐扶杖問山巔舉觴笑詠秋風

邊了然居士作鐵君傳云長七尺重三十兩頂圓足方中有微篁凡四十五節五傳稽生造又云昔顯

宗東宮時常讀東坡杖詩因召侍臣鄭子聃問杖之存亡子聃以在睢陽為對因以數千緡購于張文定公

之孫其孫藏之于屋棟子聃竟不得一見云地字號阮

止宋之故物天地玄黃此四阮為絕寶也泰和間秘于

禁中待詔孫安仁之姊以琴阮得入侍上以此阮賜之安仁屢求之其姊以阮見寄舊制宮掖中侍人不許與

續希安古詩韻

垂盡絲綸不上釣冥鴻高舉弋無由不圖垂譽流千古

安肯低眉謁五侯

和非熊韻

蠻觸功名未足誇掀髯一笑付南華他年擊破疑團後

始覺從來盡眼花

和非熊韻

藹々英聲鎮北州非熊人物本風流時逢佳客開青眼

久領元戎尚黑頭已發豐城神劍出休嗟暗室夜光投

驅兵經略關中了題遍長安舊酒樓

過深州慈氏院

今年扈從次饒溝暫解征鞍慈氏遊世變劫灰何所有

人隨兵火鮮能留堂々聖像孰曾識燁々真詮詎可求

醉墨淋漓灑塵壁使人知我過深州

用李君實韻

多病逢秋苦未宜天涯屈指故人稀塵飛滄海悲人世
夢斷黃梁笑錦衣靜樂浮榮難兩得宦情歸興本相違
高山流水無窮思撫弄絲桐為發揮

繼崔子文韻

崔子龍鍾亦可憐臨風相送我胡然君來玉塞三千里
余隱龍沙二十年美玉詎容藏韞積精金到底入鈞甄
他時定下搜賢詔先到河東汾水邊

繼武善夫韻

老子年來酷愛閑不堪白髮映蒼顏十年興廢悲
裡半世干戈寤寐間北闕欲辭新鳳閣東州元有舊閭
山熊經鳥引聊終老品下踈松正好攀

鼓琴

宴息亨廬中飽食無用心讀書費目力苦思嫌哦吟樗
蒲近博徒圍碁殺機深洞簫耗予氣箏筑惡鄭音呼童
炷梅魂索我春雷琴何止銷我憂還能禁邪淫正席設
棊几危坐獨整襟尋徽促玉軫調絃思沉々清聲鳴鶴
鸞古意鏘石金秋水洗塵耳秋風振高林清興騰八表
成連何必尋絃指忽爾忘正事如商參泥塗視富貴晝

夜等古今湛然有幽居祇在閭山陰茅亭遠流泉松竹
幽森、携琴當老此歸去投吾簪

扈從羽獵

湛然 扈從狼山東 御閑天馬如遊龍驚狐突出過
飛鳥霜蹄霹靂飛塵中馬上將軍弓挽月修尾蒙茸卧
殘雪玉翎猶帶血糝糊駮駮嘶鳴汗微血長圍四合匝
數重東西馳射奔追風鳴鞘一震翠華去滿川枕藉皆
豺熊自笑中書老居士擁鼻微吟弓矢廢向人忍耻乞
其餘瘦兔癘獐紫駝背吾儒六藝聞吾書男兒可廢射
御乎明年准備秋山底試一如臯學射雉

狼山 宥獵

扈從 車駕出獵狼山圍既合奉 詔悉

宥之因作是詩

君不見武皇校獵長楊裡子雲作賦誇奢靡又不見開
元講武驪山傍廬陵修史譏禽荒二君所為不足法徒
令千載人雌黃 吾皇巡狩行周禮長圍一合三千里
白羽飛空金鑄鳴狡兔雄狐應絃死 翠華駐蹕傳絲
綸四開湯網無掩群 天子恩波沐禽獸狼山草木咸
忻

對雪鼓琴

君不見党侯賞雪斟羊羔蛾眉低唱白雲謠慷慨尊前一絕倒高談濶論誇雄豪又不見陶穀開軒收竹雪旋燒活火烹團月笑撚吟鬚吟雪詩冷淡生活太清絕清歡濁樂爭相高至人視此輕鴻毛嗜音酣酒元麓俗癖茶嚼白空劬勞龍庭飛雪風淒冽天地模糊同一色數卮美潼溫如春三弄悲風絃欲折酪奴歡伯特降旌詩聲歌韻不敢鳴党武陶文都勘破真識此心無一箇

寄冰室散人

佳人元不是摩登幻術因循污此生對雪解吟飛絮句滅燈能審斷絃聲鳳樓蕭洒閑瓊管冰室深沉冷玉笙

好訪龍溪善知識傳燈何啻揔持名

三學尼長老道號龍溪老人

寄平陽潤和尚

張彥升寄平陽潤和尚所著金盞兒十首因作詩寄潤公

十首新詞寄我時淨名手段我獨知解將沒孔鐵鎚子打就無聲金盞兒言外翻騰閑曲調劫前拈弄古鈴鐺清河露布殺公案賺得衰翁一首詩

紅梅

坡謂認桃無綠葉辨杏有青枝太粗俗目潤飾其語成之

瘦損佳人冰雪姿天教粧抹入時宜小桃嫌鋪翠雲葉踈杏驚看碧玉枝李白詩成怒妃子吳宮宴罷醉西施而今辜負黃昏月只少西湖處士詩

又

天仙皎々素羅裳
淡抹濃塗總不妨
酒暈半潮妃子醉
胭脂初試壽陽粧
肯同桃李迷蜂蝶
本與松筠傲雪霜
顧影也應悲漢室
臨風猶似怨三郎

吟醉軒

修竹千竿五畝宮
幽居活計興無窮
清詞麗句梅詩老
白髮蒼顏歐醉翁
洒墨疾書千首敏
浮白痛飲百尊空
醉吟聞有香山老
倒用顛拈意暗同

寄西菴上人用舊韻四首

別後無緣得再參
新詩重寄代和南
他年放我休官去
只向雲川結小庵

功名我已讓曹叅
又見曹叅定五南
布鞵青鞋從此始
濟源聞有侍中庵

多幸松軒得罷叅
玉泉山水勝江南
泉邊便作歸休計
何必香山覓舊庵

憶昔吾師

萬松老也

放晚叅揚兵西北擊
東南一聲霹靂靛

飛去尚有癡人宿草庵

和漁陽趙光祖二詩

崑廊深責叅疑丞
位重材輕負寵榮
捐虜七擒輸葛亮
竒謀六出愧陳平
未行禮樂常如慚
欲掛衣冠似不情
何日對君言我志
夜闌秉燭笑談傾

其二

生民垂欲陟春臺南斗妖氛絕點埃典禮已隨前代廢
遺音猶怨後庭哀十年嘆我垂々老萬里憐君得々來
此語縱無多忌諱緘題未可對人開

自贊

美髯中書白衣居士從他抹粉施朱一任安名立字手
中玉塵震雷音說盡人間無限事

再過太原題覃公秀野園

君寔洛陽園花竹秀而野先生取此意開園臨古社土
堦甃以石茅亭略其及佳木碧雲搖清泉寒玉瀉開軒

叩琴筑撫景飛觴筆我來政秋晚殘英折盈把粲然啟
一笑琅然歌二雅將歸且裴回幽尋未能捨呼酒盡餘
興索筆為模寫緬懷溫國公重名滿天下寥寥二百年
童卒傳司馬君侯築茲圃如有所慕者晞穎々之徒子
亦斯人也

和韓浩然韻

浩然以昇元寶器玉澗鳴泉二琴見贈勉

和來詩用酬厚意

標格雄々蘊藉深烏龍胸臆隱雷音一雙神器波及我
不負分金結義心

浩然得四琴分二
琴于我故有是句

又

一曲南風奏古宮坐 神物愧無功千金厚惠將何報
鶚表慇懃效孔融

張漢臣因入覲索詩

漢臣千里覲 龍庭敬使 天皇致太平十事便宜言
懇切三千貔虎令嚴明好籌廟筭如留相莫憶鱸魚似
李鷹一統要荒君勉力雲臺須占最高名

和謝昭先韻

失矣為劣得矣優遇流而行坎則留笑視紛々兒女輩
成是敗非徒相尤弃人所取々所弃獨識萬松為出類

本欲心空及第歸暮請晨參唯一志浮生迅速奔隙駒
無窮塵劫元斯湏叅透威音劫前事花開枯木誰云枯
河朔干戈猶未息西域十年空旅食賢人退隱予未能
釣衡曠位虛名極 真人應運康世屯數頌寬詔垂絲
綸沛若息波淪骨髓皇々四海咸蒙春漢唐疆宇非為
大戍守西臨玉關界百濟稱藩過海門鄙語粗言其大
槩 天皇自將辦多々天兵百萬涉長河京索為空汴
梁下秦皇漢武疇能過凜々威聲震天宇不殺為功果
神武朔南一混車書同 皇業魏々跨千古先生吾邦
之彥兮琴書而自怡徑庭松柏操磊落英雄姿明正道

無邪思一貫詩書繼先覺兩全才德真吾師王謝來江
左家學易道豈忘貽濟世須君展驥足政要再鑿人耳
目小子區區何所祝但願天象俞鶚奏

德恒將行以詩見贈因用元韻以見意云

國士朝 黃屋無辭路八千徒嗟蘇子困誰識禰生賢
腰下無金叩山中有翠煙英雄須有用勉力待中年

送文叔南行

李子敦純不入時而今矢志又南歸縱無手內毛生檄
自有囊中萊子衣未得忠貞叱 聖主且將甘旨侍慈
闈鵲鷦不忘衡天志直待三年更一飛

和馮揚善九日韻

馮君今歲又離家攜手賡酬海一涯秦漢興亡真夢寐
蘇張軾軻莫吁嗟孔融座上尊盈酒靖節籬邊菊有花
何日公餘同比樂西風一醉泛流霞

示石州劉企賢

西州來索湛然詩笑點霜毫錄鄙辭底事行藏元有數
斯文否泰本由時碩材未信 明君棄雅操何慙暴吏
欺此語頗涉人忌諱等閒勿使細民知

和劉子中韻

蓬山散人劉詡子中頗通儒幼依全真出

家今已還俗故有擇術不可不慎之句

蓬山北海遊珥筆陳良謀徒步而南來意氣凌馬周貪
吏亂法令如茨不可束子中有大志每甘跨下辱他日
得從龍其鋒誰敢觸今日君之來非為五斗粟君子
慎擇術痛恨陪全真調心正是妄堪笑學鳥伸一日錯
下脚萬劫含酸辛平生大夢中不識庵中人一言贈吾
子宗匠宜相親

李庭訓和予詩見寄復用元韻以謝之

忝位台司歲月深中書自笑不如岑殷周禮樂真予事
唐舜規模本素心鄭五每慚難作相胥靡終欲強為霖

隄西妙語虛推獎舒卷寒窓盡日吟

和黃山張敏之擬黃庭詞韻

黃山無媒亦無梯蕭條白晝閔荆扉凌晨端坐嗽玉池
闌干首偕先生飢惠然寄吾黃庭詞湛然一笑幾脫頤
一鶴南翔一不飛十年一夢今覺非故山舊隱蒼松歌
而今老盡虬龍枝曾學四老餐紫芝從譏懷寶而邦迷
塵緣一掃無子遺隔穀觀月猶依稀汪洋法海無邊涯
螢光詎可窺晨晞蓮花自是生污泥污泥不染清涼肌
彩雲易散碎琉璃人間四相天五有為無為俱有為
壽窮塵劫元非遲湛然醉搖芭蕉卮薔薇深蘸書淋漓

白眼一望須彌低，黃山先生耽書癡。退藏不露龍麟姿，對人不恥樊縕衣。自甘貧困元知微，籬邊黃菊香離披。門前山色寒參差，不以下體遺封菲。新詩遠寄盤龍塢，胸中滿貯夷齊薇。忘機臨水狎鷗鷺，燕居申之不愆儀。含光隱秀如文犀，乘閑綸釣垂清漪。躬耕禾黍方離、須信君子能自卑。予知先生之獨悲，深憂海內生民疲。生民擾攘如棼絲，笑予素餐徒位尸。先生識鑑如元龜，旁通發而為聲詩。照我穹廬生光輝，窮通進退元有時。至人終不貪危機，他時天子求壻箎。欲行周禮修周基，先生好應千年期。沙堤行人羨輕肥，鳳凰到底鳳池棲。太平釣石須君持，蒼生未濟無言歸。

寄嵩公堂頭同叅

嵩公聞道住南宮，笑寫新詩託去鴻。准備金桃三百顆，因風寄與老髯公。

寄移刺子春

說與沙城劉子春，湛然垂老酷思君。同遊青塚秋將盡，共飲天山酒半醺。璽紙題詩熟鍊字，氍毹談道細論文。五年回首如真夢，衰草寒烟正斷魂。

寄妹夫人

三十年前旅永安，鳳簫樓上倚欄干。

先叔故居初學書

畫同遊戲靜閱琴碁相對閑聚散悲歡燈影裡興亡成
敗夢魂間安書風送來天際望斷中州一髮山

送姪九齡行

我欲歸休與願違而方知命正宜歸閭山自有當年月
一舸西風賦式微

送姪了真行

吾兄繼世祿襲封食東平幼子死王事長女閨門英孀
居二十年禮佛讀傳燈一旦遇宗匠了真訓其名前歲
陽翟破道服潛偷生寧死不受辱託疾燕山京湛然憐
孤族贖汝為編氓死生本如夢寵辱真若驚莫忘離亂
苦長思厭世情三學有龍溪叩叅宜盡誠喝碎須彌山
打破乾闥城兩頭俱放下枯木一枝榮

和少林和尚英粹中山堂詩韻

我愛高山堂山堂秋寂々蒼煙自搖蕩白雲風出入冷
冷溪水寒細々琴絲濕離塵欲無事又有閑蹤迹

和武善夫韻

不待潛身似許由鑿閭辜負萬山秋未竭犬馬雖為慊
忽憶猿鶴却自羞黃閣賴懸新篆印白霄元有舊漁舟
他時雪夜尋良友且學當年王子猷

和馮揚善韻

揚善從來慕晉卿
滄浪濁處不濯纓
閩東易學孰能與
冀北詩聲莫與京
今日窮途雖蹇剝
他時行道自亨貞
須知遯世元無悶
莫怨龍鍾出

帝城

和董彥才東坡鐵杖詩二十韻

女媧未補青天裂
神液飛精散為鐵
稽生箕踞鍛洪爐
白汗翻漿滴清血
黑虬彷彿欲飛躍
鱗介蒼々生乳節
情知中散氣凌雲
肯與凡工爭巧拙
柳君傳與東坡老
神物終須歸後傑
坡仙為壽文定公
酬和新詩誇勝劣
觀妙堂名龍尾硯
睢陽并此為三絕
睢陽城破兵火炎

神器不隨烟燭滅
了然居士出伊洛
登山渡水相扶挈
燕然分付我清谿
妙語雕鐫跨先哲
遠來携贈白霄老
天理似為予所設
湛然忝位本無功
致

主澤民愧臯契
再遊北海復何恨
與君同步龍沙雪
大澤深山無所驚
掃除魑魅驅亮蠶
輕篁歷々吐微語
閑對幽人如鼓舌
有時拈起擊須彌
須彌擊碎同丘垤
雲門遠遁德山去
敢對髯翁開口說
一時驚倒野狐禪
奔走不來予閩闈
他年神武掛冠去
誰知劫外乾坤別
橫擔此杖入千峰
大方獨步無蹉跌

冬夜彈琴頗有所得作詩三十韻以遺猶子蘭
夜坐彈離騷

彈秋宵步月秋夜步月二曲

彈秋水

彈秋思用樂天韻二絕示景賢

彈廣陵散終日而成因賦詩五十韻

吾山吟

從萬松老師乞玉博山

寄萬壽潤公禪師用舊韻

寄聖安澄公禪師

寄甘泉禪師謝惠書

送房孫重奴行

從龍溪乞西巖香并方

乙未元日

付從究

旦日遺從祖

旦日示從同仍簡忘憂

元日勸忘憂進道

轉燈

錄寄新詩呈冲霄

寄東林

借琴

戲景賢

再用前韻二首

寄景賢

再用知字韻戲景賢

復用前韻戲呈龍崗兼善長二首

慕樂天

彈廣陵散

戲劉潤之

用劉潤之韻

用張道亨韻

道亨予故人也間閔二十年今寓居平水
以詩見寄因和其韻以謝之

大安之季君政乖屯文用事符雲雷邊軍驕懦望風潰
燕南趙北飛兵埃民財已竭轉輸困元之思治如望梅
太白經天守帝座長星勾已中台玄臺密表告天道
災妖變異無不該奸臣構禍謀不軌魚鱗之首侵宸階
蹂血京師萬人死君臣自此相嫌猜居庸失守紫荆破
大兵掣電騰八孩潛議遷都避凶禍銜枚半夜宮門開

河表偷生聊自固京城留後除行臺力窮食盡計安出
元戎守節甘自裁虬龍奮迅脫大難微波沉滯獨黃能
王師神武本不殺一發鹿臺能散財威聲遠震陝洛懼
勢同拉朽如枯摧髯公退縮養愚拙白麻一旦天邊來
萬里 龍庭謁 天子輶車軋風塵埋言輕無用
緘嘿浮沉鴛鴦相趨陪布幕氈廬庇風雨日中一食如
持齋瀚海波聲寒涵湧金山峰勢高崔嵬十年行役亦
艱苦鹽車強駕同駑駘美漣如飴潤喉吻行伶獨撥寒
爐灰故園夢斷幾千里熱然迴首白雲堆彈缺悲歌望
明月山城明月空徘徊往事如絲不堪憶令人感慨生

餘哀聖人繼運踐九五歡聲騰沸天之涯萬國梯航喜
奔走幣帛交列陳瓊瑰 天子恩威溢中外遠邇翕然
無不懷四民樂業庶政舉宗臣勩力諸王諧 行殿受
朝設鐘鼓明堂祭祀陳大壘卿雲輪菌自紛郁妖星不
復侵天街否道已窮受諸泰人心已順天心迴制度一
新從簡略禁網踈濶如天恢賢材尚隱若冥鴈區區弋
人何慕哉自慚忝位司鈞軸可憐多士無梯媒願學留
侯引年去不與赤松遊蓬萊閭陽舊隱度殘朽扁舟蓑
笠江湖涯

題龐居士陰德圖

易易難、各一機非難非易亦新奇若將三句分優劣
露柱燈籠暗皺眉

和馮揚善韻

天道不可窮此理自古然大暴壽盜跖至仁天顏淵偉
材鮮遭遇君臣難兩全庸愚厭梁肉廣文寒無羶未逢
知音人伯牙故絕絃我愛馮公子孔教窮高堅憂道不
憂貧一室如罄懸却笑庠序生供薦徒備員詩書貯便
腹一斗吟百篇遠蹈顏孟迹近比蘇黃肩寧受跨下辱
不為天下先昇平已有期上道化日躔九州成一統刑
賞歸 朝權汴梁三戰定樂浪一檄傳先生謁 承明

萬里來秦川徒步沙磧中往復幾一年揅著說易傳應
詔命席前十年符億兆十世盈十千男兒志在道何論
胝與胼一旦得榮遇閭巷車馬填窮通固由命何必興
致煎用之自可進舍之便可還自笑髯中書有過仍下
俊三代不同禮勉欲相襲沿賢人正退隱強起居官聯
冰炭豈共器安可渾愚賢可惜和氏姿庸工浪雕鐫不
能作大器取次成弃捐潛龍喻君子或躍或在田未遂
馬周志好壑揚雄屢伏臘粗酒脯旦夕充羹膾窮途不
足泣弔影無自憐人生一瞬息日月如璣旋學道如牧
羊後者為之鞭離群謝富貴遁世安林泉勿學躁進人

扼腕長呼天

和秀玉韻并序

三學老人背佛說法教僧幽半藏謗之清
谿老人有頌因和之

清谿作竊語湛然大笑之僅能知大用尚未識大機貪
隨言語轉錯認二阿師箇中閑挨子卓然絕百非三學
未嘗坐何說非與是半藏未有言奚論讚與毀解語非
千舌能知誠非智為報清溪公無事莫生事

示從智

知人者明自知者智仁人一言博哉其利

答聶庭玉

文章太守鎮榆關遠寄新詩與湛然卓爾功名君勉力
歸與活計我加鞭扶衰幸有東坡杖遣興猶存玉澗泉
布襪青鞋任真率東垣山水不拈錢

繼柏巖大禪師韻

行盡千程與萬程誰能退步見巖宸饒渠解釋庭前雪
笑彼難除室外塵翡翠簾前猶是汝琉璃殿上更何人
直須鶴出銀籠外受用壺天不夜春

和張善長韻

下馬如虹氣焰雄驚人詩筆有誰同銀鈎老字學顏體

王振寄辭類國風今日白衣聊養素他年黃屋好推忠
經營江左湏豪哲占取雲臺第一功

愛棲嵒彈琴聲法二絕

須信希聲是大音猱多則亂吟多淫世人不識棲嵒意
祇愛時宜熱鬧琴

多著吟猱熟客耳強生取與媚俗情純音簡易誰能識
却道棲嵒無木聲

冬夜彈琴頗有所得亂道拙語三十韻以遺猶

子蘭 并序

余幼年刻意於琴初受指於弭大用其閑

雅平澹自成一家予愛棲嵒如蜀聲之峻
急快人耳目每恨不得對指傳聲間閱二
十年予奏之索於汴梁得烏中道而卒其
子蘭之琴事深得棲嵒之遺意甲午之冬
予扈從羽獵以足疾得告凡六十日對彈
操弄五十餘曲棲嵒妙旨於是盡得之因
作是詩以紀其事云

湛然有琴癖不好凡絲竹兒時已存心壯年學愈篤倉
忙兵大際遺譜不及錄回首二十秋絲桐高閣束棲嵒
有後人萬里來相逐能繼箕裘業待予為季叔今冬六

十日對彈五十曲五旬記新聲十朝溫已熟高山壯意
氣秋水清心目陽春撼瓊玖白雪碎瑤玉洛浦太含悲
楚妃嘆如哭離騷泣鬼神止息振林木秋思盡雅興三
樂歌清福自餘不暇數渴心今已沃昔吾師弭君平澹
聲不促如奏清廟樂威儀自穆々今觀棲崑意節奏變
神速雖繁而不亂欲斷還能續吟猱從簡易輕重分起
伏一聞棲崑聲不覺傾心服彼此成一家春蘭與秋菊
我今會為一滄海涵百谷稍疾意不急似遲聲不踣二
子終身學今日皆歸僕我本嗜踈懶富貴如桎梏幸遇
萬松師一悟消三毒早晚掛冠去閭山結茅屋蔬笋粗
充庖糲飢脫粟有我春雷子豈憚食無由旦夕飽純
音便是平生足

夜坐彈離騷

一曲離騷一椀茶箇中真味更何加香銷燭燼寄廬冷
星斗闌干山月斜

彈秋宵步月秋夜步月二曲

碧玉聲中步月歌彈來彈去不嫌多從教人笑成琴癖
老子佯呆不管他

彈秋水

信意彈秋水清商促軫成只疑天上曲不似世間聲海

若誠無敵河神已 平三朝不彈此心竅覺塵生

彈秋思用樂天韻二絕示景賢

秋思而今不入時 平和節奏若嫌遲
香山舊譜重拈出 不問知音知不知
粼々斷似烏蛇蚶瑟々微如古殿苔
玉澗鳴泉獨受用 穹廬祗少景賢來

彈廣陵散終日而成目賦詩五十韻并序

嵇叔夜能作廣陵散 史氏謂叔夜宿華陽
亭夜中有鬼神授之韓 以為揚州者廣
陵故地魏氏之季母丘儉輩皆都督揚州

為司馬懿父子所殺叔夜痛憤之懷寫之
于琴以名其曲言魏之忠臣散殄於廣陵
也蓋避當時之禍乃託於鬼神耳叔夜自
云新固其曲不以傳袁孝尼唐乾符間待
詔王遨為季山甫鼓之近代大定間汴梁
笛後完顏光祿者命士人張斫一彈之因
請中議大夫張崇為譜序崇備序此事渠
云驗于琴譜有井里別姊辭鄉報義取韓
相投劍之類皆刺客聶政為嚴仲子刺殺
韓相俠累之事特無與揚州事相近者意

其叔夜以廣陵名曲微見其意而終畏晉
禍其序其聲假聶之事為名耳韓臯徒知
託於鬼物以避難而不知其序其聲皆有
所託也崇之論似是而非予以為叔夜作
此曲也晉尚未受禪慢商與宮同聲臣行
君道指司馬懿父子權侂人主以悟時君
也又序聶政之事以譏權臣之罪不啻使
累安得仗義之士以誅君側之惡有所激
也不然則遠引聶政之事甚無謂也泰和
間待詔張器之亦彈此曲每至沉思峻迹

二篇緩彈之節奏支離未盡其善獨棲嵒
老人混而為一士大夫服其精妙其子蘭
亦得棲嵒之遺意焉

湛然數從軍十稔苦行役而今近衰老足疾困卑濕歲
暮懶出門不欲為無益穹廬何所有祇有琴三尺時復
一絃歌不猶賢博奕信能禁邪念閑愁破堆積清旦炷
幽香澄心彈止息薄暮已得意焚膏達中夕古譜成巨
軸無慮聲千百大意分五節四十有四拍品絃欲終調
六絃一時劃初訝似破竹不止如裂帛忘身志慷慨別
妙情慘戚衝冠氣何壯投劔聲如擲呼幽達穹蒼長虹

如玉立將彈發怒篇寒風自習之瓊珠落玉器電墜漁
人笠別鶴唳蒼松哀猿啼怪栢數聲如怨訴寒泉古澗
澁幾折變軒昂奔流禹門急大絃忽一捻應絃如破的
雲烟速變滅風雷恣呼吸數作撥刺聲拍邊轟霹靂一
鼓息萬動再弄鬼神泣叔夜志豪邁聲名動蠻貊洪爐
煨神劍自覺乾坤窄鍾會來相遇箕踞方袒裼一旦諧
殺之始知襟度阨新聲東市絕孝尼無所獲密傳迨王
遨曾為山甫客近代有張研妙拍莫能及琴道震汴洛
屢陪光祿席器之雖有聲鍊此頭垂白中間另起意沉
思至峻迹節奏似支離美玉成破璧為山虧一篲未精
誠可惜我愛棲崑翁翻聲從舊格始終成一貫雅趣超
今昔三引入五序始作意如翕縱之果純如將終繳而
絳嵇生能作此史臣書簡策又謂神所授傳自華陽驛
韓臯破是說以為避晉隙張崇作譜序似是未為得我
今通此論是非自懸隔高與宮同聲斷知臣道逆權臣
侷人主不啻韓相賊安得聶政徒元惡誅君側上欲悟
天子下則有所激惜哉中散意千古無人識

吾山吟

見鑄學鼓琴未期月頗能成弄有古調絃
泛聲一篇鑄愛之請予為文因補以木聲

稍隳括之歸於羽音起於南呂終于太簇
亦相生之義也以文之首句有吾山之語
因命為吾山吟聊塞鑄之請不敢示諸他
人也湛然題

吾山吾山予將歸予將歸深溪蒼松圍茅亭局柴扉水
邊林下琴書樂矣水邊林下琴書樂矣不許市朝知猿
鶴悲吾山胡不歸

從萬松老師乞玉博山

吾師珍惜玉山壚可歎雕文朴喪初無黨無偏三足崎
不緇不磷一心虛禮佛誦課須資汝示衆拈香正起予

對此好彈三澗雪因風遠寄萬松書

寄萬壽潤公禪師用舊韻

懶答禪師一紙書禪師佳句古誰如不才歎我垂々老
美裕憐君綽々餘斷臂志能如慧祖點胸終不似雲居
三閩叅到縱橫處識破黃龍脚似驢

寄聖安澄公禪師

澄公屢有寄來書不著寒溫問訊予老栢依然籠古殿
庭中有怪栢數株旃檀無恙鎮精廬金鱗透網三乘外大隱居
鄧十載餘聖安居市中祇有些兒堪恨處向人刮覓護身符

寄甘泉禪師謝惠書

萬松節外有孫枝德業文章冠一時不惜臨風寄新句
知音消得湛然詩

送房孫重奴行

汝亦東丹十世孫家亡國破一身存而今正好行仁義
勿學輕薄辱我門

從龍溪乞西崑香并方

予愛龍溪老人之西崑香屢乞之每恨得
少旋踵而盡因道鄙語乞香并方

我愛龍溪新樣香西崑風韻卒難忘深玄欲說舌頭短
妙觀先通鼻孔長秋水彈時宜受用碧崑讀處更相當

清香妙譜都拈出莫惜十年舊藥方

乙未元旦

劫前別有一壺天萬古長空無後先建化門頭聊爾了
也隨徒衆賀新年

付從究

曠劫茫茫困路塵回頭便是故園春而今既遇松軒老
究竟元來不死人

旦日遺從祖

乙未旦日從祖索詩浪道數句以遺之

塵世春風歲又遷僚屬來賀古川前誰知萬法生心上

不覺雙毛落髮邊人生能得幾
屐文章不直一文錢
威音 畔乾坤別且道而今是幾年

旦日示從同仍簡忘憂

乙未旦日從同索詩因道拙偈二十韻仍
簡忘憂

昔我馳星輶駐車歸化城汝方來摠衣從同訓其名侍
予垂十年百事無一成律曆且及半琴道猶未精禪書
置一隅尚未窮一經大道若滄海萬古長澄清酌之而
不竭注之而不盈偃鼠得滿腹亦足飽鯤鯨又如大圓
鏡歷劫長圓明中間無影像應物而現形漢胡遮相照

出沒能縱橫又如萬鈞鐘寂然藏雄聲隨叩而即應圓
音自鏘鏗小擊而小響大撞而大鳴又如長明燭積歲
長熒々分為百千萬光明如日星惠之而不費是為無
盡燈日月照天下不可語瞽盲雷霆碎山岳聾者未嘗
聽枯木元無花却怨春不平作偈以勸汝可以為盤銘
元日勸忘憂進道

乙未元日忘憂居士索詩勉道數語因勸
其進道云

劫外風光別人間日月遷南洲添一歲北海又三年榮
利蝸粘壁功名蟻慕羶萬緣都放下好叩祖師禪

轉燈

乙未元日安慶以轉燈見贈忘憂居士索
詩走筆作偈以驚世云

安慶作戲燈惠然來贈我藏燈借微明細火薰其座乘
茲風火力盤旋如轉磨中有角抵人揮臂不知禍團
十萬匝輪迴莫能超此燈雖戲具無異大因果三世塵
沙佛皆如轉燈過三千大千界成壞亦風火所以明眼
人重道輕利貸生死比夢寐榮華等涕唾長行此觀心
人間都看破多少看燈人知音無一箇

錄寄新詩呈冲霄

冲霄酷愛玉泉詩媿我年來無好辭錄寄新詩三十首
莫教俗子等閑知

寄東林

屢承東林同叅賜書未遑裁荅亂道鄙語
以代手訥云

同叅萬里寄書來盥手緘封手自開沒骨舌頭我難說
無根樹子若能栽金鵬手段平翻海任老釣竿不釣能
何日萬松軒側畔笑談抵掌一開懷

借琴

龍崗居士本知音叅透淵明得趣心暫借桐君休吝惜

玉泉習氣未忘琴

戲景賢

景賢愛彈雉朝飛作是詩戲之

牧犢曾嘆雉朝飛七十無妻是以悲何事龍崗愛彈此
欲學白傅覓楊枝

再用前韻

景賢彈雉朝飛予作詩戲之蒙寵和有者
有餘陰乞一枝之句予再用前韻以拒之
過住行雲不敢飛一聲還噎一聲悲蠻兒深慙龍崗意
唱得香山楊柳枝

又

妙舞盤中塵不飛採蓮一曲遶梁悲慕素魯蠻獨當兩
貫珠歌韻柳腰枝

寄景賢

因足疾在告彈琴逾時腕臂作痛自訟其
癡作詩以寄景賢

湛然有過必人知笑寄龍崗自訟詩閻浮衆生苦為樂
華嚴皇覺藥能醫十年探甲足疾作三月彈琴臂力衰
因病得閑却病閑中雖病也便宜

再用知字韻戲景賢

薄德從來本畏知
龍崗又有和來詩
機閑不解活龍弄
諺有是語癖疾還如死馬醫

大舜再逢難永訣
周公不夢覺吾衰
鳳池元是變龍宅
山鹿野麋終不冝

復用前韻戲呈龍崗居士兼善長詩友

君有蠻兒我已知
湛然授筆上新詩
翠眉已惹禪心動
玉頰休教獺髓醫
舊有藥爐雖竭底
新來鼎器却扶衰
隆王準能青眼不
解雲霓也自冝
西人多服白衣

其二

行雨行雲一夜飛
襄王從此莫含悲
蠻兒侍寢龍崗老

恰似柔梯生柳枝

慕樂天

荆水荆水出渾如八節灘
玉泉佳趣類香山
常編周易

忘深意貝葉佛經送
老閑爽我琴書池
五畝侑人詩酒
竹千竿樂天活計都相似
脂粉獨嫌素與蠻

彈廣陵散

居士閑彈止息時
胸中鬱結了無遺
樂天若得嵇生意
未肯獨吟秋思詩

戲劉潤之

從劉潤之借杜詩因豪奪之作是詩以戲

之
休嘆久假不云歸長笑還書是一癡居士親行萬里地
政須百註杜陵詩

用劉潤之韻

箇中消息本忘言一念從渠一萬年大地遍開皆是水
頑石不擊固無煙成佛莫落謝公後建業從教祖氏先
萬法悉從心地起元來禍福不由天

湛然居士文集卷之十一

湛然居士文集卷之十二

琴道喻五十韻以勉忘憂進道

彈琴逾時作解嘲以呈萬松老師

勉景賢

和潤之

劉潤之作詩有厭琴之句因和

懷古一百韻寄張敏之

示忘憂

和金城寶宮旭公禪師三絕

再和世榮二十韻寄薛玄之

和蘭仲文二十六韻

又和仲文二首

用曹楨韻

怨浩然

從國才索閑煎茶賦

贈高善長一百韻

再賡仲祥韻寄之

寄金城士大夫

誠之索倡

遺姪淑卿香方倡

為子鑄作詩三十韻

琴道喻五十韻以勉忘憂進道 并序

予幼而喜佛蓋天性也壯而涉獵佛書稍
有所得頗自矜大又癖于琴因檢閱舊譜
自彈數十曲似是而非也後見琴士弭大
用悉弃舊學再變新意方悟佛書之理未
盡遂謁

萬松老人旦夕不輟叩叅者且三年始蒙
見許是知聖諦第一義諦不在言傳明矣
邇因忘憂學鼓琴未期月稍成節奏又知

學道之方在君子之自強耳故作琴道喻
述得旨之由勉子進道之漸云

昔我學鼓琴豪氣凌青天輕笑此小技何必師成連寶
架翻舊譜對譜尋冰絃自彈數十弄以謂無恙肩有客
來勸予因舉莊生篇時君方誦書輪扁居其前釋椎而
入請何故讀殘編上古已久矣不得見聖賢遺書糟粕
餘與道雲泥懸臣年七十秋雙鬢如垂綿斲輪固小巧
巧性非方圓心手兩相應不能語子焉是知聖人道安得
形言詮至今千載間此論不可遷琴書紙上語妙趣焉
能傳不學妄穿鑿是為誰之愆予方謁弭君服膺乃拳

拳相對受指訣初請歌水仙吟猱不踰矩節奏能平々
起伏與神會態狀如雲烟朝夕從之遊琴事得大全小
藝尚如此大道寧不然當年嗜佛書經論窮疏箋公案
助談柄賣弄猶頭禪一遇 萬松師駕駘蒙策鞭委身
事洒掃樞衣且三年圓教攝萬法始覺擔板徧回視平
昔學尚未及埃涓漸能入堂奧稍々窮高堅疑團一旦
碎桶底七八穿洪爐片雪飛石上栽白蓮佛祖立下風
俯視威音先忘憂西域時師我求真筌經今十五春進
退猶遷延望涯自退縮甘心嗟無緣將求無價實未肯
酬一錢未啟半篲土欲酌九俛泉美玉付良工良工得

雕鐫良金不受冶徒費爐鞴聞君近好琴停燭夜不
眠彈之未期月曲調能相聯君初未彈時曾不知勾蠲
學道亦如此惟患無精專誰無摩尼珠誰無般若船立
志勿猶豫叩叅宜勉旃他時大徹悟沛然如決川毛端
吞巨海芥子含大千瞬息一世過生死相縈纏此生不
得覺曠劫徒悲煎吾言真藥石療子沉痾痊

彈琴逾時作解嘲以呈 萬松老師

一曲悲風歷指寒昔年曾奉萬松軒本嫌浮脆刪吟柳
為愛軒昂變撞敦高趣釀成真有味煩襟洗盡了無痕
禪人若道聲塵妄孤負觀音正法門

勉景賢

昨日景賢坐間屢稱東坡真人中之龍也
若慕其才而異其志採其華而弃其實又
何益於事哉因作偈以勉之云

既慕東坡才當如東坡志君才如東坡其志未相似詩
似東坡詩字如東坡字胡不學東坡且學長不死

劉潤之館于忘憂門下作述懷詩有弟子二三
同會食誰曾開口問先生之句余感而和之

從來重士還相重到底輕人却自輕醜廢翻然便歸去
至今高尚穆先生

劉潤之作詩有厭琴之句因和之
學士既歸夫子道吾儒宜識仲尼心當年刪出詩三百
時復絃歌不廢琴

懷古一百韻寄張敏之

興亡千古事勝負一枰碁感恨空興歎悲吟乃賦詩三
皇崇道德五帝重仁慈禮廢三王謝權興五伯滴焚書
嫌孔孟峻法用高斯政出人思亂身亡國亦隨阿房修
象魏徐福覓靈芝偶語真虛禁長城信謾為只知秦失
鹿不覺楚亡騅約法三章日息垂四百基漢興學校啓
文作典章施黷武疲中夏窮兵攘四夷嗣君恩稍失劉

氏德難衰新室雖興難真人已御期魏吳將奮起靈獻
自荒嬉賊子推移漢奸臣鳩築郿三朝如峙鼎四海若
棼絲纒奉山陽主已生司馬師仲謀服孟德葛亮倍曹
丕唯晉成獨統平吳混八維有初終鮮克居治亂誰思
蟬鬢充蘭掖羊車遶竹岐孫謀無遠慮神器委癡兒國
事歸椒室民飢詢肉糜為人昧菽麥聞蟆問官私衛瓘
嘗幾諫何曾已預知五胡雲擾攘六代電奔馳川谷流
腥血郊原厭積屍天光分耀日地里裂瓜時歷數當歸
李驅除暫假隋西陲開却善東鄙討高麗鸞駕如江國
龍舟泛汴漪錦帆遮水面粉浪汚河湄府藏金帛積生

靈氣力疲盜賊天下起章奏樂中欺海內空龍戰河東
有鳳姿元戎展鷹犬頡利助熊羆奉表遵朝命尊王建
義旗經營於盜手禪讓託君辭豪哲歸我鼓要荒入我
羈太宗真令主貞觀有皇規正美開元治俄成天寶悲
曲江還故里林甫領台司裂土封三國纏頭愛八姨霓
裳猶未罷鞞鼓恨來遲逆寇陵丹闕君王捨翠眉兩京
賊黨滅方鎮重權移朱李元堪嘆石劉亦可嗤九州重
構亂五代薦荒飢遼宋分南北翁孫講禮儀昔宋事遼為兄仍請
隨代以序昭穆至季年連為翁宋為孫宣和風侈靡教主德庸卑背約絕
鄰好興師借寇資懸知喪唇齒何事撤藩籬失地人皆

怨蒙塵悔可追遼家遵漢制孔教祖宣尼煥若文章備
康哉政事熙朝廷嚴衮冕郊廟奏堦荒校獵溫馳射行
營習正奇南州走玉帛諸國畏鞭笞天祚人上朝鮮
叛海涯未終三百祀不免一朝危鴨綠金朝起鴨綠江起

義之地桑乾王璽遺金兵逼京師天祚西狩遺傳國璽于雲中之桑乾河竟不獲後遼

興大石西域統龜茲萬里威聲震百年名教垂大石林牙遼之

宗臣挈衆而亡不滿二十年克西域數十國幅員數萬里傳教主凡百餘年頗尚文教西域至今思之廟號德

宗武元平宋地殷禮雜宗姬金謂箕子之裔雜用周禮治國崇文事

拔賢尚賦詞邦昌君洛汭劉豫立青淄大定民興詠明

昌物遠宜日中須景昃月滿必光虧肘腋獨夫難丘墟

七廟隳

北朝天輔祐南國俗瘡痍天子潛巡狩宗臣嚴守陴山
西盡荆枳河朔平豺狸食盡謀安出兵羸力不支長圍
重數匝久困再周期太液生秋草姑蘇遊野麋忠臣全
節死餘衆入降麾 文獻生三子 東丹第八枝虛名
如畫餅遺業學為箕自笑蓬垂髻誰憐雪滿髭撫膺長
感慨搔首幾嗟咨車蓋知何處衣冠問阿誰自

天明下詔知我素通著發軔裝琴劍登車執策綏穹廬
或白黑驛騎半黃馭肥臠白如甔瓊漿甘似飴天山連

北府

天山之北唐北庭都護府在焉

瀚海過西伊

伊州之西北有瀚海伊州又謂之西州

天馬窮渤

神兵過月氏感恩承

聖勅寄住到尋愚

尋愚度西域城名西人云尋愚肥也度城也通謂之肥城

春色多

紅樹秋波摠綠陂

西域風俗家必有園必成趣多有方池圓沼

不須賒酒飲

隨分有驢騎畎畝棲禾粟園林足果梨春粳光璨玉煑

飣滑流匙

聖祖方輕舉

明君應樂推

龍庭陳大禮

原廟獻明棗萬國朝

金陞千官列

玉墀求賢為輔弼舉我忝丞疑才德真為慙顛危不解
持顛從麋鹿性豈戀鳳凰池投老誰為伴黃山有敏之

示忘憂 并序

予作懷古詩百韻非徒作已使世之人知
成敗之可鑑出世之人識興廢之不常也
因作偈以見意云

歷代興亡數張紙十年勝負一盤碁因而識破人間夢
始信空門一著奇

和金城寶宮旭公禪師三絕

知公已得夜明符任運騰騰無所拘見說金城多長者
有人青眼待君無
南北東西揔一家緣生擬議便生瑕人々錯認髯居士
只有禪師不眼華
旭老今年錐也無糞堆却得舊明珠穹廬半夜無燈燭
讀盡平安一紙書

再和世榮二十韻寄薛玄之

予嘗和李世榮詩二十韻薛玄之和元韻
見寄以求拙語因再和之

尚記承平日為學體自強經書興我志功業逼人忙蟄

窟長思震癸心本慕陽蛟龍初得雨日月近依光事主
心無隱遭時策建長引君當正道陳事上封章亦既尊
仁義胡為失毅劉歲規盡忠赤人物敢雌黃斷似南山
定言令北斗昂勸君師魏鄭嫉惡法張絳青眼蒙高顧
白眉忝最良誰知天有數不覺漢亡疆人笑段干木誰
師田子方上蒼垂大命天闕冊明王殷室君雖滅仁人
道未亡南州遠煙水北海幾星霜仁政時將治
明君國寢昌卿雲知有慶嘉穀又呈祥名遂宜思退機
危乃自戕歸與今好賦聞道故園荒

蘭仲文寄詩二十六韻勉和以謝之

我愛仲文公敦純有古風科名擢乙選制策肯 表作
事能謀始為人克有終養如鄒軻去聲氣成自仲尼鎔致
主忠誠懇容人便腹空一朝淹驥足百里試鳩工牛及
聊施割囊錐已脫鋒屯方雷雨動泰未地天通聚散悲
歡裡興亡夢寐中勢傾秦失鹿奸殞鯨為熊不學東方
朔誰微皇甫嵩洛陽傳白傳江夏譽黃童上國平諸域
輿情達四聰百司將布置多士想登庸未識荊州面徒
思衛玠容中原期混一

天子訪英雄嘉運人皆幸亨時君又逢汚俗風已變
明主德方隆施雨皇恩布如流直諫從凱元威勳力稷

契各言忠我愧凡庸士恩霑造化工兵氛箕尾沒劔氣
斗牛衝西華將歸馬南陽莫卧龍孝廉為選舉仁義作
旃幪歷運千年合衣冠萬國同草儀獨有子行待泰山
封

又

仲文才筆冠人間工部壇前第一班世上久無孔北海
雲中誰識謝東山忘懷詩酒醒還醉適意琴書樂且閑
野有遺賢猶未用中書寧得不胡顏

又

室中忝預萬松籌脫得中間與兩頭反覆人心厭殷室

咄嗟天下屬宗周直湏勇退中書事未肯榮貪留國侯
收拾綸竿與蓑笠華亭却覓舊漁舟

用曹禎韻

禎金城人字幹臣始冠上詩于我
文采可觀因和元韻以勉後進云

征南都護將旋旆平北將軍已罷師寰海謳歌歸大舜
明堂鐘鼓奏咸池咸陽父老傾心日魯國書生得志時
收拾琴書我歸去朝廷人物有臯夔

怨浩然

韓浩然嘗以詩許昇元寶器玉潤鳴泉二
琴予已有謝詩今得書以玉潤遺周漢臣
藏昇元而託以他辭因用浩然新韻以怨

之漢臣小字六和予嘗戲呼為六居士

先難後易真交契醉許醒違蓋世情玉潤白輸六居士
昇元烏有一先生昔蒙佳句誠歡忭今得芳緘且歎驚
一入侯門深似海騷人空夢帳中聲昇元寶器亦名帳中寶

從國才索閑煎茶賦

聞國才近得閑之手書煎茶賦以詩索之
聞君久得煎茶賦故我先吟投李詩為報君侯休吝惜
照人瓊玖笑多時

贈高善長一百韻

高善長本書生也屢入御園而不捷乃翻

然醫隱悉究難素之學後進成師法烏與
龍岡居士善尤長於詩而酷愛予之拙語
蓋自厭家鷄耳因漫成俚語一百韻以贈
之

君本遼陽人居華表傍隨任來燕然卜築金臺坊幼
蒙父兄訓讀書登上庠大義治三傳左氏為紀經詩書
究微理易道宗京房史學亦精妙議論如馨香行道有
餘力下筆能詩章典雅繼李杜浮華笑陳梁當年闢科
舉郡國求圭璋御園屢不捷在前饒批糠先生乃醫隱
退身慕羲皇難素透玄旨鍼砭能起彊可並扁跡可

聯和緩芳門生皆良醫西海高名揚昔我知君名方且
王事忙兵塵隔東西忽成參與商君初涉洛渥我已達
燉煌瀚海浪奔激金山路彷徨西遊幾萬里兩鬢今蒼
蒼西方好風土大率無蚕桑家々植木棉是為墾種羊
年々旱作魁未識舞 決水溉田圃無歲無豐穰遠
近無飢人四野棲餘糧是以農民家處々皆池塘飛泉
遶曲水亦可斟流觴早春而晚秋河中類餘杭濯足或
濯纓肥水如滄浪雜花門側柏園林如綉粧爛醉蒲萄
酒渴飲石榴漿隨分有絃管巷陌雜優娼佳人多碧髯
皎々白衣裳市井安丘墳畎畝連城隍錢貨無孔郭賣

飢稱斤量甘瓜如馬首大者狐可藏採杏兼食核

西方杏仁

皆生食之甘香如芭攬

食瓜悉去礮西瓜大如鼎半枚已滿筐芭

攬賤如枣可愛白沙糖人生為口腹何必思吾鄉一住
十餘年物我皆相忘

神祖上仙去

聖主登明堂駟騎徵我歸忝位居巖廊河表寒舊盟廊
秦成戰場翠華乃南渡鳶馭聲鏘々六軍臨孟津偏師
出太行間路入斜谷南鄙侵壽唐犄角皆受敵應戰寔
未遑一旦汴梁破何足依金湯下詔求明醫先生隱藥
囊馳軺來北闕失指空倉惶我於群雞中忽見孤鳳凰

下馬執君手涕淚其如 我嘆白頭翁君亦嘆髯郎停
燈話舊事談笑吐肺腸酬酢覓嘉句沉思搜微茫湛然
訪醫藥預備庸何妨高君略啟口確論聞未嘗醫術與
治道二者元一方武事類藥石文事如膏梁膏藥日
用藥石藏巾箱一朝有急病藥石施鋒銚病愈速藏藥
膏梁復如常緩急寇難作大釵須長槍寇止兵弗戢自
焚必不長發表勿攻裡治內無外傷朝廷有內亂安可
搖邊疆 一場或警急中 決自戕陰病陽脉生陽証陰
脉止暴法譬之陰仁政喻之陽太平雖日久恣暴降百
殃大亂遍天下行仁降百祥一君必二臣佐使仍叅詳

不殊世間事烝民無二王國老似甘草良將比大黃一
緩輔一急二柔濟一到病來不速治安居養豺狼疾作
倘無藥遇水乏舟航病固有寒熱藥性分溫涼療熱用
連藥理寒宜桂薑君子與小人禮刑令相當虛者補其
羸寔者馮其強扶衰食枸杞破血服檳榔抑高舉其下
天道猶弓張損餘補不足貧富無低昂寒多成冷瘡熱
盛為瘡瘍政猛民傷殘政慢賊猖狂保生必求源胃府
為太倉四時胃為主端居正中央朝廷天下本 固邦
家昌實 而虛 其謀元不 五行不偏勝所以壽而
康太宗平府兵是致威要荒未病宜預治未亂宜預防

賦臣弑君父禍難生蕭牆辨之田不早即漸成堅霜心
腹尚難治向復及膏肓茫然聞此語不覺胡床謝君
贈誨言苦口如藥良門一而得二和璧并夜光走筆書
新詩一笑呈龍岡

再賡仲祥韻寄玄之

金城薛玄之用李世榮舊韻寄詩於予索
拙語已和寄忽思冰巖再賡仲祥元韻以

寄之

能談仁義兵經傳宗素臣字畫類閑、句法如之純澹
然與世疎渭水獨垂綸蒿萊塞庭除塵土霑衣紳歸我

夫子門三月無違仁後生來從學善誘能循、顏卷不
改樂范甌長生塵仰不愧於天俯不作於人進德方軌
乾慎行而修身旅食秦晉間騎驢三十春珠玉炙人口
麗藻嘉彬、今年又絕糧生涯如在陳歌詠猶不輟真
為葛天民 詩過子卿離騷齊靈均忘機天壤間舉措
皆天真濯足滄浪中鷗鷺來相親胸中萬卷書下筆端
如神素負經濟才人品伊臯倫桂林祗一枝亦何慚却
說

寄金城士大夫

遠聞金城學齋絕糧因奉粟十斛助蒸藜

之資故作小詩以礪本土學士大夫

金城人士本多奇何事庠宮久
資周急無輕五秉粟
傷時因寄一篇詩

誠之索偈

誠之久侍萬松師何事十年下手遲
劫火光中須退步
青春寧有再來時

遺姪淑卿香方偈

姪淑卿疾作索安息香于予欲辟邪也將
謂汝是箇中人猶有這箇在因作香方偈
以遺之

我有一香々秘之不取說心生種々法生心滅種々法
滅退身一念未生前此是真香太奇絕邪神惡鬼永沉
蹤外道 魔皆腦裂

為子鑄作詩三十韻

乙未為子鑄壽作是詩以遺之鑄方年十
有五也

皇祖遼太祖奕世功德積鬱弓三百鈞天威々萬國一
旦義旗舉中原如捲席東鄙收勾麗西南窮九譯古器
獲軒鼎神寶得和璧南陬稱子孫皇業幾三百赫々東
丹王讓位如夷伯藏書萬卷堂丹青成畫癖四世皆太

師名德超今昔我祖建四節功勳冠黃閣先考文獻公
弱冠已卓立學業飽典墳創作乙未曆入仕三十年廟
堂為柱石重義而疎財後世遺清白我受先人體競
常業十三學詩書二十應制策禪理窮畢竟方年二
十七萬里渡流沙十霜泊西域自愧無才術忝位人臣
極未能扶顛危虛名徒伴食汝方志學年寸陰真可惜
孜孜進仁義不可為無益經史宜勉旃慎毋耽博奕深
思識言行每戒迷聲色德業時軌之自強當不息幼歲
侍

皇儲且作春宮客一旦衝青天翱翔騰六翮儒術勿疎
廢祖道且薰炙汝父不足學汝祖真宜式酌酒壽汝年
五福自天錫

湛然居士文集卷之十二

湛然居士文集卷之十三

楞嚴外解序

心經宗說後序

糠 教民十無益論序

釋氏新聞序

屏山金剛經別解序

書金剛經別解後

賈非熊修 天子廟疏

永安寺請余為功德主疏

請旭公住寶宮寺疏

請文公住玉山開堂出世疏

請嚴菴主任東堂出世疏

請希庵主任晉祠奉聖寺開堂疏

請學庵主任翠微山寶林寺開堂出世疏

請石州海秀首座住文水壽寧寺疏

太原山開化寺請予為功德主因作疏

重修 宣聖廟疏

燕京大萬壽寺化水陸疏

請奧公禪師開堂疏五首

請湘公住持興教寺疏

請東林老人住雲巖寺疏

請栢巖儼公疏

祁州重修 宣聖廟疏

安慶織萬佛疏

請聰公和尚住山陰縣復宿山疏

題萬壽寺碑陰

和公大禪師塔記

萬壽寺創建厨室上梁文

茶榜

約善長和詩戰書

寄萬松老人書

萬松老師萬壽語錄序

祭姪女淑卿文

和林城建行宮上梁文

為武川摩訶院創建佛牙塔疏

楞嚴外解序

昔洪覺範有言天台智者禪師聞天竺有首楞嚴經旦暮西向拜祝願此經早來東土續佛慧命竟不得一見今板鬻遍天下有終身不聞其名者因起法輕信劣之嘆若夫徵心辨見證悟窮魔明三界之根探七趣之本

原始要終廣大悉備與禪理相為表裡雖具眼衲僧不可不熟繹之也予故人屏山居士牽引易論語孟子老子莊列之書與此經相合者輯成一編謂之外解實漸誘吾儒不信佛書者之餌也吾儒中喜佛乘者固亦多矣其全信者鮮焉或信其理而弃其事者或信其理事而破其因果者或信經論而誣其神通者或鄙其持經或譏其建寺塵沙之世界以為迂闊之言成土之劫波反疑駕馭之說亦何異信吾夫子之仁義詆其禮樂取吾夫子之政事舍其文學者耶或有攘竊相似之語以謂皆出于吾書中何必讀經然後為佛此輩尤可笑也且

竊人之財猶為盜矧竊人之道乎我屏山則不然深究其理不廢其事其于因果也則舉作善降祥之文引羊祐鮑靚之事其于塵界也則隘鄒子之說嫉禦寇之談其神通也則云左慈術士耳變形于魏都皆同物也疑吾佛不能變千百億化身乎其于劫波也則云郭璞日者卜年于晋室若合符券疑吾佛不能記百萬之多劫耶其于持經也則云佛日禪師因聞誦心經咒言不大悟田夫俚婦持念諸課者詎可輕笑之哉其于建寺也則云阿蘭若法當供養彼區々者尚以土木之功為費何庸望之甚耶其評品三聖人理趣之淺深也初云稍

尋舊學且窺道家之言又繙內典至其遠處吾中國之書似不及也晚節復云予以此求三聖人垂化之理而後知吾佛之所以為人天師無上大法王者非諸聖之所以能侔也學至于佛則無可學者乃知佛即聖人聖人非佛西方有中國書中國無西方書也或問屏山何好佛之深乎荅云感息之深則深報之屏山所謂心不負人者矣渠又云吾佛之所誨人者真寔如不誑不妄豈有毛髮許可疑者耶噫古昔以來篤信佛書之君子未有如我屏山之大全者也近代一人而已泰和中屏山作釋迦文佛贊不遠千里以序見託于萬松老師

永長巨豪劉潤甫者笑謂老師曰屏山兒時聞佛以手
加額既冠排佛今復贊佛吾師之序可慎與之庸詎知
他日得不復似韓歐排佛乎老師曰不然今屏山信解
入微如理而說豈直悔悟于前非亦將資信于來者且
兒時喜佛者生知宿稟也既冠排佛者華報盡惑也退
而贊佛者不遠而復也而今而後世尊所謂吾保此

海矣後果如吾師言予與屏山通家相與爾汝
曾不檢羈其子阿全輩待予以叔禮天兵既克汴梁阿
全挈遺稿來燕寓居萬松老師之席老師助鋟木之資
欲廣其傳阿全致書請予為引予亦不讓援筆疾書以

題其端不惟彰我萬松老師冥有知人之鑑抑亦紀我
屏山居士克終全信之心且為方來淺信竊道者之戒
云甲午清明后五日湛然居士漆水移刺楚才晉卿叙
于和林城

心經宗說從序

白華山主措折脚鐺煮熟沒米粥萬松野老用穿心梳
盛與無口人雖然指空話空爭奈依實具實嗟見渾掄
吞枣只管誦持故教混沌開眉妄生穿鑿如明以字莫
認經頭未解本文且看注脚湛然居士漆水移刺楚才
晉卿詳勘印行

糠 教民十無益論叙

昔予友以此論見寄囑予求序以行世予恐謗歸于講
主者辭而不序遂採萬松老師賦意及講主餘論述辨
邪論之意以謂世人皆云釋子黨教護宗由是飛謗流
言得以藉口予本書生非釋非糠從傍上義辨而證之
何為不可乎予又謂昔屏山居士序輔教編有云儒者
嘗為佛者害佛者未嘗為儒者害誠哉是言也蓋儒者
率掌銓衡故得高下其手其山林之士不與物競加以
力孤勢劣曷能為哉予觀作頭陀賦教君子皆儒也予
不辯則成市虎矣不獨成市虎抑恐崔浩李德裕之徒

一唱一和撼搖佛教為患不淺故率引儒術比而論之
以勵吾儒為糠 所惑者論既述所謂予友者復以書
見示其大略曰講主上人者以糠 叛教頽風乃檢閱
藏教尋繹儒經積有年矣窮諸佛之深意達三乘之至
真列十篇之目成一家之言語辨而詞溫文野而理親
聞之者是非莫逃誦之者邪正斯分雷震獅吼邪推魔
奔良謂偃德草之仕風釋疑氷之陽春噫或佛道之未
喪也諒必由子斯文乎是以信奉佛教者展轉錄傳不
可勝紀京城禪伯尊宿欲流之無窮不憚萬里徃復數
書託子為序今之士大夫才筆勝子者固亦多矣豈不

能序此一書乎以子素淘汰禪道涉獵佛書頗知旨歸故也子何讓焉此老不避嫌疑自其謗讟而為此書彼且不避子何代彼而避謗乎吾觀子所著辨邪論止為儒者述儒之信糠者止二三子而已矣市井工商之徒信糠者十居四五自非此書彼曹何從而化之乎子所得者少所失者不為不多矣書既至于不能荅謹以書意序諸論首丙戌重午日題于肅州鄯善城

釋氏新聞序

昔仰嶠叢林為燕然之最主事僧輩歷久不更執權附勢動搖住持人泰和中本寺奏請萬松老人住持上許之萬松忻然奉詔人或勸之曰師新出世彼易師之年少彼不得施其欲必起風波無遺後悔乎師笑而不荅既院師一遵舊法無所變更惟拱默而已罷主事輩依例辭職師因其辭也悉罷之師預于衆中詢訪耆德選為衆推仰者數人至是咸代其職積歲頽風一朝頓革遠近翕然稱吾師素有將相之材矣迨後章廟秋獵于山主事輩白師曰故事車駕巡幸本寺必進珍玩不然則有司必有詰問師責之曰十方檀信布施為出家兒予與若不具正眼空食施物理應償報汝不聞木耳之緣乎富有四海貴為一人豈需我曹之珍貨也哉

且君子愛人也以德豈可以此瑕類貽君主乎目手錄
偈一章詣行宮進之大蒙祿賞有成湯狩野恢天經呂
尚漁磯浸月鈞之句誠仁人之言也翌日章廟入山行
香屢垂顧問仍御書詩一章遺之師亦淡如也車駕還
宮遣使賜錢二百萬使者傳勅命師跪聽師曰出家兒
安有此例使者怒曰若然則予當迴車師曰傳旨則安
敢不聽不傳則亦由使者意竟焚香立聽詔旨章廟知
之責其使曰朕施財祈福耳安用野人閑禮耶上下悚
然服吾師不屈王公之前矣此二事天下所共知者也
其餘師之隱德默行未播于人間者可勝道哉師之切

于扶聖教急於化人心也萬分之一見之于此書乎師
應物傳道之暇手不釋卷凡三閱藏教無書不讀每有
多聞能利害于佛乘閑涉于教化者悉錄之目之曰釋
氏新聞將使見書而知歸聞言而向道真謂治邪疾之藥
石濟迷塗之津梁也豈小補哉石門洪覺範著林間錄
辯而且文間有偏黨之語後之成人之美者未嘗不歎
息於斯焉我萬松老師之意扶教利人也深是以推舉
他宗談不容口此與覺範之用心相去萬里者也讀是
書者當知是心矣於戲偉哉予請刊是書行于世目為
之序甲午上元后一日湛然居士漆水移剌楚才題

屏山居士金剛經別解序

佛法之西來也二千餘祀寶藏琅函幾盈萬軸可謂廣大悉備矣獨金剛一經或明眼禪客若脫白沙彌上至學士大夫下及野夫田婦里巷兒女子曹無不誦者以頻見如閑姑置而不問者有之以至理巨測望涯而退者有之噫信其小而不信其大信其近而不信其遠信其所聞而不信其所未聞信其所見而不信其所未見似是而非他執一而廢百者比之然又何訝焉偉哉屏山居士取儒道兩家之書會運奘二師之論牽引雜說錯綜諸經著為別解一編莫不融理事之門合性相之

義折六如之生滅剖四相之鍵闕謂真空不空透無得之得序圓頓而有據識宗說之相須辯因緣自然喻以明珠論諸佛衆生譬之圓鏡若出聖人之口冥契吾佛之心可謂天下之奇才矣噫此書之行于世也何止化書生之學佛者偏見衲僧無因外道皆可發藥矣昔予與屏山同為省掾時同僚譏此書以為餌餒餒之具予尚未染指于佛書亦少惑焉今熟繹之自非精于三聖人之學者敢措一辭于此書乎吁小人之言誠可畏哉乙未元日湛然居士漆水移刺楚才晉卿序于大磧黃

石山

書金剛經別解後

孔子有云吾十有五而志于學三十而立四十而不惑是知學道未至于純粹精微之域雖聖人亦少惑焉昔樂天荅制策稍涉佛教之譏中年鄙海山而修兜率垂老為讚佛發願文乃云起因張本其事見于本集子瞻上萬言頗稱釋氏之弊晚節專翰墨為佛事臨終作神咒浪出之偈且曰著力即差其事見于年譜退之屈論于大顛而稍信佛書韓文公別傳在焉永叔服膺于圓通而自稱居士歐陽公別傳在焉是知君子始惑而終悟初過而後悛又何害也屏山先生幼年作排佛說殆不忍聞未幾翻然而改火其書作二解以滌前非所謂改過不吝者予於屏山有所取焉後之人立志未定惑于初年者當以此數君子為法乙未清明日湛然居士題于別解之後

賈非熊修 夫子廟疏

天產宣尼降季周血食千祀德難酬重新庠序獨無力
試向滄溟不釣鈎

孝義永安寺請予為功德主因作疏

塵緣不盡淹鳳池而有年習氣難忘慕禪林而未暇適
遇昭公老子請作永安主人乞聞一聲何須再讓葛藤

舊業宛如馬耳之風松菊新堂便是終焉之計謹疏

請旭公禪師住應州寶宮寺疏

孫枝出自萬松中便好移來植寶宮覆蔭人天正今日
不好鼓動劫前風

請文公庵主任王山開堂出世疏

見大做翁當仁不讓便請承當何須再勘

請嚴庵主任東堂出世疏

西堂棄東堂山東過山西禪師開狗口居士展驢蹄

請希庵主任晉祠奉聖寺開堂疏

晉祠山水冠人間好請希公向北閑餘了蒙頭三覺睡

逢人休說趙州閑

請學庵主任翠微山寶林寺開堂出世疏

金城元有翠微山寶刹禪林積歲閑笑請學公來領略
一鉢游戲白雲間

請石州海秀首座住文水壽永寺疏

聞道霖師退壽寧秀公難弟亦難兄新詩遠寄石州去
貶起眉毛便好行

太原山開化寺灰燼之餘再新故宇請予為功

德主因作疏

竊以塵緣有數否則泰、則亨聖道無窮變則通、則

久惟開化之故刹寔太原之名藍兵火以來劫灰而已
住持人固有定老功德主乃請湛然良慰殷勤強為領
略禪心佛語誰知教外別傳梵刹蓮宮更無中唱出
謹疏

重修 宣聖廟疏

精藍道觀已重新獨有庠宮尚坳垣試問中州士君子
誰人不出 仲尼門

燕京大萬壽寺化水陸疏

竊以生死蒙恩便見法門不二怨親普濟始知檀度無
私仰惟佛陀興悲爰自阿難張本欲啟無遮之大會必

資有衆之良緣但肯同心便希垂手謹疏

請與公禪師開堂疏 五首

竊以深達大本何妨摘葉尋枝截斷衆流便是隨波逐
浪欲整雲門窠窟必求佛覺見孫伏惟與公和尚道合
圓通法傳圓照逢人便出方為禪子家風戀土難移未
是衲僧氣息謹疏

竊以轉身就父從來禪子宗風借路還家好箇衲僧消
息伏惟無公和尚受戒崇壽得法聖安未闡微猷權棲
大覺因席就請何須特地人情准帖奉行折合這齋公
案謹疏

竊以釋迦慳迦葉富無物與人與公俏聖安憨慢藏侮
盜既收鈍斧子不藉破皮鞋須要粧龍似龍何礙將錯
就錯拖將十字街裡便好投衙推來百尺竿頭更教進
步謹疏

竊以法海彌深曹水五流分派化風猶扇雲門一葉重
華與公庵主透圓照之重関提圓通之正令善作降魔
相能談文字禪開裡刺頭最好逢人便云穩處下脚何
礙遇緣即宗謹疏

竊以當年嚼飯喂嬰兒聖安左錯今日把棒喚狗子居
士風顛你打開漆桶徹底承當我擘破面皮須要相見
橫榔栗木獨行正令莫壓弱倚強與旃檀佛共演梵音
好挽行奪寺謹疏

請湘公上人住持新院仍名興教寺者因作疏
寶刹成空隨劫灰而已滅精廬如聖逐化日而重新為
國報恩可名興教赤軸黃卷且圖摘葉尋枝寶藏琅函
何礙尋行數墨謹疏

德興府岷谷雲嵒寺請東林老人住持疏

昔日山中養聖胎峪中松檜手親栽院荒松老無龍象
便請東林更一來

公幼年嘗在此寺
有手植松在焉

請栢嵒儼公疏

良弼施宅創天寧却請天寧舊衲僧為報栢高休遜讓
閑中續出祖師燈

州重修 宣聖廟疏

宣尼萬世帝王師可嘆荆榛沒古祠重整庠宮闡文教
顯觀日月再明時

安慶織萬佛疏

予自忝預政事以來懶為疏文恐物議挾
勢故也安慶者工巧妙天下自矧新意織
萬佛為施嘉其意曰破戒作此疏云

十方三世萬如來不犯梭頭寶座開單手元知不成拍

三臺湏要大家催

請聰公和尚住山陰縣復宿山疏世傳文殊顯
化再宿于此

山故
得名

昔日文殊曾復宿當年聰老可重来公舊嘗
在此山此山便是

真佛窟何必區々禮五臺

題萬壽寺碑陰

昔達磨西來禪宗大播門庭峻峭機變驟馳非世智辨
聰所能曉也其與奪之間固有賓主抑揚之際不無推
實其未具透閑眼者豈免隨語生解之病哉香山俊公
和尚受法于大明渠謂洞山之後偏正五位失其本意

亦行權之語與同叅榮公聞之果吞鈎 俊公門人輩
從而勒諸石遠發後世之一笑噫受師之道而反謗之
是自謗也何止自謗也曹山枝子青州諸師之道皆不
足法矣頌香山亦近世之豪邁者也忍為此事邪昔雲
門拈世尊初生因緣云我當時若見一棒打殺與狗子
喫琅瑯覺云雲門可謂將此身心奉塵刹是則名為報
佛恩臨濟臨終謂二聖云誰知吾正法眼藏向這瞎驢
邊滅却至今法道大行是知宗門之語一擡一搯豈可
以世間語言定其準的也哉若香山果無毀大明意後
之子孫宜改覆車之轍不然則自有勝默老人之韻語

予手書于故碑之陰以為來者誠其辭曰燕俊與朔榮
齊足出大明俊趨住巨剎黨奮梟獍探抱洞山足逆
分大明睛聞見弔澆李搦腕皆含情榮甘溺齏甕掉尾
求羶腥曲助碑其言欺賊晚來誠我覽取諸譬：彼秦
築城秦非不謀固無德秦亦頌上德無可德下德方紀
銘端然居上德非碑道亦行况聖不自會古德云其足
聖人法聖人

不會其肯自矜盈修毋致子有反是而未聆目花只自見
耳磬約誰聽雖欲信天下未必同為聲不見三葉祖削
跡捨身名見孫愈岳立史傳愈金鏗不見北宗下功勳
石上爭期昌竟何昌千古招論評俄柔慶基敗大明先
師崇記

曰彼有黨借必不得好嗣
果敗于慶柔基三人也
玷累斯文貞贅然真虛堂徒
表黨宗明

和公大禪師塔記

師本平水人俗姓段氏幼習儒業甫冠應經義舉回閱
春秋左氏傳悟興衰之不常慨然投筆退居山林年三
十棄俗出家禮平陽大慈雲寺僧宗言為師受戒披剃
頗習經論後聞教外別傳之旨乃傾心為遍謁諸方因
緣不契師知萬松老人之聲價照南北直抵燕然而
見之居數載師資道契始獲密許人頗知之丙戌夏六
月故勸農使王公為功德主作大齋又蒙行省相公洎

以下僚佐專使賈疏勸請開堂出世因住持大萬壽禪
寺師素剛毅寡合未期退居漁陽之盤山報因寺建州
元帥葛公權府朱公彈壓樊公聞師之名飛疏敦請辭
不獲已杖錫北行詣建州梨花道院以塞其命未幾示
微疾移居閭山之崇福寺養病一日忽召門人普淨輩
謂之曰生死去來猶空花水月何足為訝遂淨髮更衣
端坐而囑後事乃作頌曰臨行一句當面不諱皓月清
風不居正位頌畢右脇而寂師將順世有本寺傳戒大
師臨謂之曰善為道路師笑而不答令眾且去勿諠眾
皆出聞師吐一聲眾驚視之師已寂矣三日神色不變

茶毗之日頗有祥異數州士民焚香拜禮者絡繹于路
師俗壽四十六僧臘一十六其徒迎其靈骨藏於萬壽
祖塋之側噫師之度萬壽也每聞誦經之聲形不憚之
色由是人皆譏之臨行之際命其徒諷尊勝呪者何哉
殊不知天善知識臨機應物一抑一揚一奪一縱若珠
之走盤千變萬化詎可以一途而測耶至于巨川海和
尚平日亦行此令執相者諷之而謂毀梵行掠虛者讚
之而謂無礙禪皆失之矣後之學者當以此為誡己丑
之清明其徒囑不為記遂以所聞之語信筆記之湛然
居士云

萬壽寺創建厨室上梁文

萬壽寺創建厨室浪著上梁文六首幸付

工人輩歌之用光法席

拋梁東香積移來不犯功却笑維摩無手段但將盂飯
到塵中

拋梁南底箇因緣最好叅試問助緣多少衆前三三與
後三三

拋梁西巧匠騎驢倒上梯四面無門何用鎖十方沒壁
不須泥

拋梁北柱石宛有擎天力欲模此樣向諸方慴殺僧絲

描不得
拋梁上手不傷材真大匠虛堂窮叔鎮叢林借與兒孫
為榜樣
拋梁下聊倩般輪成大厦朝香飯供諸佛承事悉無
空過者

茶榜

今辰齋退特為新堂頭與公長老設茶一中聊表住持
開堂陳謝之儀仍請知事大眾同垂光降者竊以箇中
滋味誰是知音向上封題罕逢藻鑑伏惟新堂頭長老
名超絕品價重諸方黃金碾畔拈微塵輸他三昧手碧

玉甌中轟巨浪別是一家春睡鬼潛奔便使至人無夢
湯聲微發解教醉眼先醒諗老三盃莫作道理會盧公
七椀且是仁義中雖然櫛桶新陳不得顛預甘苦便請
大家下口且圖一衆開懷幸甚

約善長和詩戰書

予奉善長詩百韻仍乞光和渠謙抑退讓
以降啟見戲予亦戲作戰書以督之聊發
一笑耳

維旃蒙協洽之歲三月甲午朔湛然謹致書于詩將善
長先生幕府愚聞李杜齊名已有登壇之序元白並駕

嘗與定霸之書在昔云然于今亦可既久陳于師旅宜
一決于雄雌無約而和者必謀有備則所以亡患在德
不在險雖粗聞于古語受降如受敵則為戒于兵家伏
惟善長先生冀北無雙斗南第一能投壺而講禮善橫
槊而賦詩詞鋒折萬里之衝筆陣掃千人之敵將畧多
多而益辯雄材一一而難陳遇險韻而愈奇見大敵而
信勇君倡之而來挑戰我和之以為應兵方及交綏輒
陳降啟前鋒少却尚未損于一毫勇氣未衰遂引退于
三舍張彘師以誘我遺厚利以餌予曠日持久以老我師
重幣甘言以驕我志深藏九地必發九天故示之以不

能將攻我之所短倘弗遵於術勝亦非功苟不推于至
誠盟之何益此奚疑耳理亦灼然兵不戰而屈人可為
上策心未服而納款豈無詐謀若非先見之明徒貽後
悔之誚是以載嚴文壁爰整詩兵比尔于立尔矛一乃
心齊乃力文章燦爛依稀整々之旗聲律精嚴彷彿堂
堂之陣乃一鼓而成列決再戰而立功願天下之英雄
唯使君與操嘆文章之微婉非夫子而誰竚待兵戶願
聞金諾謹奉戰書以聞指不多及

寄萬松老人書

嗣法弟子從源頓首再拜師父丈室承手教諭及弟子

有以儒治國以佛治心之語近乎破二作三屈佛道以
徇儒情者此亦弟子之行權也教不云乎無為小乘人
而說大乘法弟子亦謂舉世皆黃能任公之餌不足投
也故以是語餌束教之庸儒為信道之漸焉雖然非屈
佛道也是道不足以治心僅能治天下則固為道之餘
滓矣戴經云欲治其國先正其心未有心正而天下不
治者也是知治天下之道為治心之所兼耳普門示現
三十二應法華治世資生皆順正法豈非佛事門中不
一法者歟孔子稱夷齊之賢求仁而得仁死而不怨
後世行者難之又安知視生死如逆旅坐脫立亡乃衲

僧之餘事耳且五善十戒人天之淺教父益慈子益孝
不殺之仁不妄之信不化自行于八荒之外豈止有恥
且格哉是知五常之道已為佛教之淺者兼而有之弟
子且讓之以儒治國以佛治心庸儒已切齒謂弟子叛
道忘本矣又安足以語大道哉又知稚川子尚以叅禪
卜之立見其効師嘗有頌試掣分鉗鎚一下便知真假
正謂此耳呵々春深萬莫為道珍重區々不備

萬松老人萬壽語錄序

予忝侍萬松老師謬承子印因遍閱諸派宗旨各有所
長利出害隨法當爾耳雲門之宗悟者得之于緊仍迷

者失之于識情臨濟之宗明者得之于峻拔者失之
于莽鹵曹洞之宗智者得之于綿密愚者失之于廉纖
獨萬松老人得大自在三昧決 玄微全曹洞之血派
判斷語錄具雲門之善巧拈提公案備臨濟之機鋒為
仰法眼之爐煇兼而有之使學人不墮于識情莽鹵廉
纖之病真間世之宗師也略舉中秋日為建州和長老
圓寂上堂云有人問既是建州遷化為甚萬壽設齋師
云此夜一輪滿清光何處無又問不是盡七百日又非
週年大祥開勘今日設齋師云月色四時好人心此夜
偏衆中道長老座上誦中秋月詩佛法安在師云萬里

此時同皎潔一年今夜最分明將此勝因用嚴和公覺
靈中秋玩月徹曉登樓直饒上生兜率西往淨方未必
有燕京蒸梨餹枣爆栗燒桃衆中道長老只解說食不
見有纖毫佛法師云謝子證明即且致為甚中秋閉目
坐却道月無光有餘勝利迴向諸家檀信然軟蒸豆角
新煮鷄頭葡萄駐顏西瓜止渴無邊功德難盡讚揚假
饒今夜天陰暗裏一般滋味忽若天晴月朗管定不索
點燈老師語錄似此之類尤多不可遍舉且道五派中
是那一宗門風具眼者試辨看噫千載之下自有知音
乙未夏四月湛然居士漆水移刺楚才晉卿序於和林

城

祭姪女淑卿文

維乙未之春三月二十六日叔湛然居士謹以蔬食清茗致祭于猶子舜婉淑卿之靈維靈胄出遼室支分太宗我考賢王夙植于令德吾兄按察載振于清風汝幼奉母訓長知父從禪理頗究儒學悉通稟鄭娘之標格有靈昭之心胸不食葷于筭年欲為尼于高高德播人口名達帝聰遣使求于故鄉有詔入于深宮守志持節慎心飾躬垂及知命尚為嬰童古所未有來者孰同章奏久掌名位日隆上謂之女學士人呼之官相公屢有

諫諍多所彌縫德殊辭輦之班功勝當熊之馮忽家止而國破嘆勢盡而途窮果全身而不辱示微疾而善終正悟之名得之於空老徒悟之號乞之於髯翁信幻有之非有知真空之不空來兮無跡去兮無蹤來無跡兮出燕山之白雲去無蹤兮聳和林之青松明日灰飛煙滅後天涯無處不相逢嗚呼哀哉伏惟尚饗

和林城建行宮上梁文

拋梁東萬里山川一望中靈沼靈臺未為比宸宮不日已成功

拋梁南一帶南山揖翠嵐創築和林建宮室鄧侯功業

冠曹參

拋梁西碧海寒濤雪拍提臣庶稱觴來上壽高呼拜舞
一聲齊

拋梁北聖主守成能潤色明堂壯麗鎮龍沙萬世魏
威萬國

拋梁上棟宇施功導大壯鳴鞘聲散翠華來五雲深處
瞻天仗

拋梁下柱石相資成大厦君臣鐘鼓樂清時喜見山陽
歸戰馬

為武川摩訶院創建佛牙塔疏

佛日增輝國政和靈牙有詔賜摩訶因風吹火何勞力
垂手同修宰渚波

湛然居士文集卷之十三

湛然居士文集卷之十四

法語示猶子淑卿

和潤之韻

贈景賢

寄東林

寄萬壽潤公禪師

寄甘泉慧公和尚

遺龍岡鹿尾二絕

和景賢贈鹿尾二絕

中秋召景賢飲

請定公住大覺疏

補大藏經板疏

武川摩訶院新建瑞像殿疏

請與公住崇壽院

寄聖安澄老乞藥

信之和予酬賈非熊三字韻見寄因再賡元韻以復之

雲漢遠寄新詩四十韻因和而謝之

德新先生惠然見寄佳製二十韻和而謝之
子鑄生朝潤之以詩為壽因繼其韻以遺之

扈從旋師道過東勝秦帥席上繼杜受之韻

屏山居士鳴道集序

用梁斗南韻

贈姪正卿

寄張鳴道

送省掾郭仲仁行

送燕京高慶民行

和趙庭玉子贇韻

贈東平主事王玉

固敬之 修夫子廟

寄萬壽堂頭乞湖山

寄東林同叅

寄簡堂頭

寄孔雀便面奉萬松老師

荅倪公故人

送王璘行

繼介丘穆景華韻

繼平陶張才美韻

德柔嘗許鞍玉轡且數年矣作詩以督之

卜隣一絕寄鄭景賢

寄岳君索玉博山

雲中重修宣聖廟疏

寄光祖

送德潤南行

再和萬壽潤禪師書字韻五首

贈景賢玉潤鳴泉琴

丙申元日為景賢壽

景賢作詩頗有思歸意因和元韻以勉之

景賢名予飲以事不果翌日予訪景賢值出予開

尊盡醉而歸留詩戲之

和景賢召飲韻

丙申上元夜夢中偶得

送門人劉德真征蜀

送門人劉復亨征蜀

趙州栢樹頌

黃龍三闋頌

和太原元大舉韻

喜和林新居落成

題新居壁

太原修 夫子廟疏

和林建佛寺疏

法語示猶子淑卿

汝自謂幼年嘗禮空禪師求名因書頌云父母未生前
凝然一相圓釋迦猶不會迦葉豈能傳此語極妙且道
汝作麼生會古昔以來有志師僧辭親出家尋師訪道
千辛萬苦三二十年祇為此一段空劫以前大事尚有
未透脫者汝幼居閨閣久在掖庭未嘗用功叩叅大善
知識但博尋宗師語錄徒增狂慧深背真道賣弄滑頭
於道何益所以古人道叅須實叅悟須實悟又云滿肚
學來無用處閻王不要葛藤看真良言也正如空老所

書頌亦論父母未生前面目又道釋迦猶不會迦葉豈
能傳此是何意趣若云釋迦不會能仁四十九年橫說
豎說見藏琅函遍滿人間未後拈花以傳教外之旨且
道此法從何而得若云迦葉無傳西天二十八祖東土
歷代諸師相傳之道自何而來若謂釋迦不會迦葉無
傳這空禪師亦是佛祖兒孫寫此頌圖箇甚麼箇中關
捩盡在此兩句不可不細叅詳予今為汝透漏些子消
息父母未生前老夫云水泄不通凝然一相圓老夫云
針劄不入釋迦猶不會老夫云非思量處迦葉豈能傳
老夫云識情難測父母未生前老夫云三更神世界凝
然一相圓老夫云半夜鬼乾坤釋迦猶不會老夫云只
許老胡知迦葉豈能傳老夫云直饒將來他亦不要父
母未生前老夫云頭圓象天凝然一相圓老夫云足方
象地釋迦猶不會老夫云寒山撫掌迦葉豈能傳老夫
云拾得呵々老夫為汝橫批豎判正用顛拈十字打開
兩手分付了也一句子薦得可與佛祖為師一句子薦
得可與人天為師一句子薦得自救不了閑中試定省
看其或未明若到燕然問取萬松老子

潤之館於忘憂門下生徒乘駟渠徒步抵和林
城有詩云破帽麻鞋布腿裯強扶衰病且徒

行區々不道圖他甚一夜山妻罵到明予憐
而和之

踈筍籬邊正脫裊故山清處便宜行鏡湖他日應屬我
好向湖邊訪四明

贈景賢

茶隣藥物成邪氣琴伴簫聲變鄭音可惜龍岡老居士
却將邪教污真心

寄東林

東林已秀兩三枝覆蔭人天正此時貪向龍宮翻貝葉
惱人不寄玉泉詩

以來書云見閱
藏經故有是語

寄萬壽潤公禪師

林泉人笑鳳凰枝我慕林泉嘆後時
時得人來問消息
太平和尚又無詩

寄甘泉慧公和尚

東林枝勝桂林枝不惜甘泉濟旱時
鐵額銜頭含笑面
可人能字更能詩

去歲秋獮予謁龍岡因彈秋水龍岡出山羊一

雙為贈渠笑曰已口價矣予愛客多設鹿尾

漿今年上獵于秋山龍岡託以鹿尾可入

藥得數十枚悉以遺予因錄近和人詩數篇

以報仍作詩二絕為引聊發一笑耳

秋水清聲忽變商
龍岡曾遺二山羊
今年祇奉詩三首
為報先生鹿尾漿

去歲山羊酬過價
今年鹿尾不直錢
龍岡藥物都竭底
只得髯翁詩數篇

和景賢贈鹿尾二絕

日暮長楊獵騎歸
西風弓硬馬初肥
今年鹿尾休嫌少
且喜君王不合圍

禁鬻酷思濃鹿汁
香蔬久厭小兒拳
龍岡採得班龍尾
一串穿來寄玉泉

中秋召景賢飲

中秋北海景淒淒
好拚今宵醉似泥
快請龍岡疾過我
與君同泛玉東西

請定公住大覺疏

龕龕寶藏照人寒
奧老功成住聖安
却請定公來領略
收拾香大禮旃檀

補大藏經板疏

十年天下滿兵埃
可惜金文半劫灰
欲析微塵出經卷
隨緣湏動世間財

武川摩訶院敕建瑞像殿疏

邦人創刻旃檀像寺衆新修率堵波兩段因緣非細事
成功須仗大檀那

請與公住崇壽院

泥湫昔日隱螭龍一震重新大覺宮却請收雲歸舊壑
晨昏香火禮師翁

泥湫院圓通禪師真堂在焉

寄聖安澄老乞藥

登高回首望燕山試道新詩怨聖安
得護身符子去二年不寄大還丹

信之和予酬賈非熊三字韻見寄因再賡元韻

以復之

鷄鶉徒羨大鵬南駕馬終須後
裊駮至理猶刪萬歸一庸儒剛說二生三
透閑活眼嫌金屑戀土癡人宿草庵
寄與雲川賢太守洗心滌慮君參

惱人捷徑起終南虛黍沙堤相國駮
幻術莫驚殷七七

真誰識後三三家隣荆水

玉泉也

宜栽竹綠在香山好

結庵斫斷葛藤窠已後閑家破具不須參

鴻鴈翩翩自北南歸與何日駕歸驂
潛龍在下宜和九

即鹿無虞戒六三洛不好遊白傅寺
濟源重覓侍中庵

衰翁自揣何多幸昨夢齋中得罷參

萬松老人住持大覺寺傍其齋曰昨

夢

舊隱醫閣白 南故山佳處好停驂
貪嗔痴者元無一詩酒琴之樂
有三菱芙蓉中橫短艇松筠聲裡
稱危菴有人問道來相訪
一椀清茶不放茶

雲漢遠寄新詩四十韻因和而謝之

允文符太一天相
泰文昌泛海難追
蟲封留欲學良穢
形伴珠玉朽本廁
松樟直節心雖赤
衰年鬢已蒼伴食
居相府無德報君
王草甲濡春雨葵心
頌太陽大權歸禁
闕成箕出巖廊自
北王師發平南上
策長皇朝將草命
亡國自顏綱漢水
徧師渡長河一葦
航股肱無敢惰元
首載歌康晞令傳
諸域英雄守四方
大勲雖已集遺

命未嘗忘萬國來
馳幣諸侯敬奉璋
兆民涵舜德百郡
仰天光大威如吉
重軋體自強碩賢
起編戶良將出戎
行太廟陳籩豆明
堂服冕裳宋朝微
亡滅皇嫡久成戕
政亂人思變君愚
自底亡右師潛入
劍元子直臨襄殺
氣侵南斗長庚壯
玉堂

幽州之分

弓猶藏寶玉劍未識干

將皇業超千古天
威聳八荒元戎施
虎略勇士展鷹揚
武繼元封跡文聯
貞觀芳宮庭敢諫
鼓帷幄上書囊佇
待卿雲見行觀丹
鳳翔武文能迭用
威德是相當多士
思登用遺賢肯退
藏詩書搜鳥篆功
業才龍驤國用恒
無闕民財若不傷
八音歌頌雅百戲
屏優倡聖澤傳朝

露明刑肅暮霜永垂塵劫祚一混九州疆重任司鈞石
微材匪棟梁思歸心似醉感媿淚如滂嚴子終辭漢黃
公合隱商窮通真有數憂樂寔難量雖受千鍾祿何如
歸故鄉
乙未閏月上旬日玉泉書

德新先生惠然見寄佳製二十韻和而謝之

當年職都水曾不入其門德重文章傑年高道義尊雖
聞傳國士恨不識王孫韻語如蘇武離騷類屈原煙霞
供好句江海入雄吞意氣輕三傑才名冠八元著述歸
至曠議論探深源籍籍名雖重區區席不溫家貧謁魯
肅國難避王敦北鄙來雲內西邊吐蕃勉將嚴韻繼

不得細交論遠害雖君智全身亦聖息大才宜應詔豪
氣傲司閤學識先哲風流遺後昆莫尋三島客好謁
萬松軒六度真光發三毒妄影奔素絲忘染習古鏡去
塵昏爐上飛寒雪胸中洗熱煩到家渾不識得象固忘
言心月孤圓處澄泚泚六根
乙未閏月上休日玉
泉書

子鑄生朝潤之以詩為壽予因繼其韻以遺之
巖松傲歲寒枝幹騰千尺男兒若稽古功名垂竹帛我
祖東丹王施仁能善積我考文獻公清白遺四壁盛名
流萬世馨香光赫赫予生嘆不辰西域十年客貧困志

不渝未肯忘平昔昔日出燕然辰當攝提格鶉尾得鳳
毛續後予無責汝知學不學何辜雲泥隔為山虧一篑
龍門空點額遠襲周孔風近追顏孟跡優游禮樂方造
次仁義宅繼夜誦詩書廢時母博奕勤惰分龍猪三十
成骨骼致之寢食廢安可忘朝夕行身謹而信于禮順
而撫祥麟具五蹄溟鵬全六翮為人攸五常奚憂仕與
謫成功不自滿始知謙受益慎毋忘此詩吾言真藥石
甲午重午前三日湛然居士書

扈從旋師道過東勝秦帥席上繼杜受之韻

去國十年久還鄉兩鬢皤三川猶梗澁百越政干戈東

勝城無恙西征事若何凭高吟望久尊酒酌長河

屏山居士鳴道集序

屏山居士年二十有九閱復性書知李習之亦二十有
九叅藥山而退著書大發感嘆日抵萬松老師深攻亟
擊宿稟生知一聞千悟注首楞嚴金剛般若贊釋迦文
達摩祖師夢語贅談翰墨佛事等數十萬言會三聖人
理性之學要終指歸佛祖而已江左道學倡于伊川昆
季和之者十有餘家涉獵釋老膚淺一二著鳴道集食
我園榘不見好音誣謗聖人聲瞽學者噫憑虛氣任私
情一讚一毀獨去獨取其如天下後世何屏山哀矜著

鳴道集說廓萬世之見聞正天下之性命發揮孔聖幽
隱不揚之道將攀附游龍駸々乎吾佛所列五乘教中
人天乘之俗諦疆隅矣鳴道諸儒力排釋老拚陷韓歐
之隘黨孰如屏山尊孔聖與釋老鼎峙耶諸方宗匠皆
引屏山為入幕之賓鳴道諸儒鑽仰藩垣莫窺戶牖輒
肆浮議不亦僭乎予忝歷宗門堂室之奧懇為保證固
非師心昧誠之黨如謂不然報惟影響耳屏山臨終出
此書付敬昂臣曰此吾末後把交之作也子其秘之當
有賞者者昂臣聞予購屏山書甚切不遠三數百里徒
步之燕獻的稿於萬松老師轉致於予々覽而感泣者

累日昔予嘗見鳴道集甚不平之欲為書糾其蕪謬而
未暇豈意屏山先我著鞭遂為序引以鍼江左書生膏
肓之病烏中原學士大夫有斯疾者亦可發藥矣甲午
冬十有五日湛然居士漆水移刺楚才晉卿序

用梁斗南韻

丁年學道々難成却得中原浪播名否德自慚調鼎器
微材不可典璣衡誰知東海潛姜望好向南陽起孔明
收拾琴書作歸計玉泉佳處老餘生

贈姪正卿

遼室東丹九葉芳曾陪劍珮侍明昌學書寫盡千林葉

習射能穿百步楊興廢人間戰白蟻菜枯枕上夢黃梁
故山咫尺宜歸去莫使因循三迳荒

寄張鳴道

張君宗派自留侯壯歲成名入士流一代詩聲如玉振
千鈞筆力挽銀鈎平山邂逅初青眼汴水伶仃已白頭
遙想荷花好時節故人吟倚仲宣樓

送省掾郭仲仁行

蘭省而今已預名還鄉衣錦也為榮遼陽幹事須祥悉
速駕星輶上玉京

送燕京高慶民行

國用繁多我政憂上章清選倅徵收好陪劉晏勤王事
早使錢如地上流

和趙庭玉子贄韻

萬里龍庭白草秋時時歸夢舊漁舟酌殘白酒難成醉
老盡黃花無限愁久識人心多厭政喜逢天下已歸劉
而今子入中州去莫惜寒梅寄隴頭

贈東平主事王

聖主方思治邊臣未奉行憑君達此意無得負蒼生

周敬之修夫子廟

天皇有意用吾儒四海欽風盡讀書可愛風流賢太守

天山初起仲尼居

寄萬壽堂頭乞湖山

削玉剜瓊出自然依稀崑竇吐雲烟禪師手段掀山嶽
便好移來向玉泉

寄東林同叅

東林屢有寄來詩忙裡何嘗報一辭豈是玉泉生吝惜
言無滋味不宜時

寄簡堂頭

巨川生下此村牛千百頭中祇一頭鼻孔遼天無主伴
不風流處也風流

寄孔雀便面奉萬松老師

風流彩扇出西州寄與白蓮老社頭遮日招風都不礙
休從侍者索犀牛

答倪公故人

玉泉回報故人書問子叅玄着意無且趁萬松鑪鐵熱
疾忙索取護身符一作夜明符

送王璘行

天涯九日出龍沙冬後冬前却到家餽運功成須報我
好遊天漢上浮槎

繼介丘穆景華韻

北海慵傾北海尊予懷為向景華伸奇才管葛堪為匹
何事唐虞不得臣行道欲期丹鳳出忘機且與白鷗親
龍庭萬里休辭遠六出奇書正賴陳

繼平陶張才美韻

才美風流自一時因風來寄湛然詩新朝制度知將近
晚節功名未是遲識子固為天下士微君孰撫我民瘼
援毫欲繼清新句笑我却無黃絹辭

德柔嘗許柞鞍玉轡且數年矣作詩以督之

異物當時許晉卿幾年思渴動詩情龍庭風細沙堤軟
玉轡雕鞍正好行

卜隣一絕寄鄭景賢

龍沙幽隱子真家自撥寒泉出淺沙我願卜隣穹帳側
旋分清酌煮新茶

寄岳君索玉博山

玉鑪精巧若裁肪寄與髯翁也不妨古廟多年無氣息
直消一炷返魂香

雲中重修宣聖廟疏

槐宮悉混玉石焚廟貌依然唯古雲須仗吾儕更修葺
休教盛世喪斯文

寄光祖

漁陽光祖冠當時筆法詞源我獨知君有家雞君自厭
為何徧愛玉泉詩

送德潤南行

燕然民庶久瘡痍摩撫瘡痍政此時暴吏猾胥諂君日
開緘三復味予詩

再和萬壽潤禪師書字韻五首

憂道

不肯參禪不讀書徒喧口鼓說真如未能即色明真色
只道無餘已有餘法眼凋殘浮海去為山寂寞少人居
一從三聖承當後季世寥々無瞎驢

述懷

寶藏翻窮貝葉書方知真理本如々一心不動無生滅
萬古長空豈欠餘妙藥更靈難忘口長安雖貴不堪居
毛吞大海渾閑事誰訝瓢中出白驢

警世

看盡人間萬卷書校量佛法總難如本無妄疾剛尋藥
幸有回波好乞餘方丈名山真碧海含元古殿是皇居
行人半老家何在終日騎驢却覓驢

傷時

金馬門前數上書子虛新賦笑相如萬言警策才無敵

六國縱橫智有餘，千里兵車討奸宄。五更朝馬候興居，功名賺得頭如雪。不悞團圓，如磨驢。

投老

叢裡瑤琴架上書，箇中真味更何如。伴閑美竹千竿許，養老田園二頃餘。睡起焚香誦圓覺，興來緩軫品幽居。宮音有此曲夕陽半下山，偏好吟入煙霞穩跨驢。

贈景賢玉澗鳴泉琴

玉泉珍惜玉泉琴，不遇高人不許心。素軫四三排碧玉，明徽六七粲黃金。臨風好奏朝飛曲，對月宜彈清夜吟。渠能彈雉朝飛清夜吟贈與龍岡老居士，須教下指便知音。

丙申元日為景賢壽

龍沙一住二十年，獨識龍岡鄭景賢。詩筆饒君甘在後，琴棋笑我強爭先。冷官何啻廣文樂，歸計猶存谷口田。劫外壺天壽無量，請公勤叩祖師禪。

景賢作詩頗有思，歸意因和元韻以勉之

我訪龍岡老，珠璣咳唾間。酒熟香馥，琴滑水潺。王吉名河中栽菊，和林也有山。但能心放下，何處不安間。

景賢召予飲，以事不果，翌日予訪景賢，值出予

開尊盡醉而歸，留詩戲之

昨朝命我初無興，今日尋君不在家。不問主人都飲盡，

醉吟倒載黑羶車

和景賢召飲韻

書滿穹廬酒滿尊
龍岡召我謝殷勤
琴中別有無絃曲
醉裡開懷舉似君

丙申上元夜夢中偶得

趨佛越祖透真空也
與馮山說夢同
面貌眼睛鼻孔裡
大千沙界一漚中

送門人劉德真征蜀

門第遼陽劉德真
剛直木訥近乎仁
憐君粗有才學術
師我精通天地人
今日從軍征西劍
他時擁旆入三秦

三辰測驗須吾子
創作天朝寶曆新

送門人劉復亨征蜀

誠之識吾二十年
不讀經書不學禪
誤爾儒冠好投筆
逼人勲業可加鞭
浣花溪畔春如畫
濯錦江邊酒似川
壯歲從軍真樂事
鄧侯遺躅勉爭先

趙州柏樹頌

古佛猶存舊道場
庭前依舊栢蒼蒼
莫謗諸州無此語
禪林奔走錯商量

黃龍三闋頌

我手何似佛手

稱頭斤兩湏端的短少毫厘不可欺
函閔辨認合同券未肯輕放過伊

我脚何似驢脚

行令如同車脚圓你三文後我三錢
直饒道底分明是也是當年鸚鵡洲

如何是上座生緣

只打野盤無寺宿不供餽口趁村齋
上戶莫椿虛物力僧司無得錯推排

和太原元大舉韻

魏帝兒孫氣似龍而今飄泊困塵中
君遊泉石初無悶

我秉鈞衡未有功元氏從來多慨慷
并門自古出英雄李唐名相沙堤在
好與微之繼舊風

喜和林新居落成

登車憑軾我怡顏飽看和林一帶山
新構幽齋堪偃息不閑閑處得閑

題新居壁

舊隱西山五畝宮和林新院典刑同
此齋喚省當年夢白晝誰知是夢中

太原修夫子廟疏

并門連歲不年豐證父攘羊禮義空
既倒狂瀾扶不起

直須急手建庠宮

和林建佛寺疏

龍沙玄教未全行故築精藍近帝城須仗檀那垂手力

一輪佛日 然明

湛然居士文集卷之十四終

湛然居士文集序

夫文章以氣為主浩然之氣養於胸中發為文章不期
文而文有餘矣古之君子其文見于簡策宏深渾厚言
近而音遠辭約而義深非後世以雕篆為工者所能比
蓋其浩然之氣貫于中也諸葛孔明暨近代范文正公
懷王佐之才有關物成務之略自任天下之重初不歆
以文名世然出師一表可與伊訓說命相表裏而萬言
一書議者必比于管仲樂毅二子者豈嘗學為如此之
文也哉其忠義之氣形之于文亦不自知其所以然也
嗚呼世之作文者非不衆也言語非不工也及其建功

定業任大持重不若昔之人者其胸中所養者小也今
吾湛然居士其庶幾乎公當 聖廟開闢之際膺藍梅
鼎鬲之任仰贊 天子茂弘德威臣上古所不臣之國
籍禹貢所不籍之地公之功業著見於天下炳如日星
雖月氏殊俗垂荆遠方莫不仰戴其威名觀其從事征
討軍務控德宜其不暇留意于文字間然雄篇傑句散
落人間復如彼其多或吟咏其情性或寄意于玄機千
彙萬狀會歸于正又皆肆筆而成若不用意為此者入
雖服其精敏意者何為而能然耶殊不知公善養其浩
然之氣充于其中形于言動發于功業見于文章有不

得不然者矣孔子曰有德者必有言其是之謂乎邇者
中書省都事宗公仲亨更新此集募工鏤版過雲中同
監納樊子通見屬為序徵以為文章者公之餘事也公
之德業天下共知之固不待文而顯也其文天下共傳
之又奚待以序而彰哉雖然不為之辭者徵東海一鄙
人也幸齒于門下士之末若復獲挂名于文集中固所
願也於是乎書

癸巳年十月晦日九山居士李徵子徵序

湛然居士集世無刻本內弟歸安蜀檢先世遺書得此
集于亂帙中蓋為太僕公震川先生所藏有手澤存焉
予欲得之不能乃從借抄共十四卷按焦澹園國史經
籍志載有移刺楚材湛然集三十五卷又耶律楚材集
十二卷一列于金一列于元今讀是集詩文中多自署
漆水移刺楚材晉卿似即一人當時或有兩集焦澹園
遂疑為二人誤列于兩朝耳元史列傳楚材字晉卿遼
東丹王突欲八世孫父履以學行事金世宗終尚書左
丞楚材三歲而孤母楊氏教之學及長博及群書旁通
天文地理律曆衍數及釋老醫卜之說下筆為文若宿

構者仕為左右司員外郎元太祖定燕聞其名名見之
處之左右呼為吾圖撒合里而不名楚材美鬚髯吾圖
撒合里蓋華言長鬚人也歷事太祖太宗三十餘年累
歲至中書令年五十五終于位至順元年贈經國議制
寅亮佐運功臣太師上柱國追封廣寧王謚文正

十二卷 戊午秋九月上澣迂齋金侃錄并識

